

საქართველოს სახელმწიფო სამართლებრივი (ნიმუშები სახელმწიფო იმპერიიდან)

შ ი ნ ა ე რ ს ი:

1. შესავალ
2. საქართველოს საზღვრები და მათი დაფასება.
3. საქართველოს ტერიტორიის განხილვა სტრატეგიის თვალსაზრისით.
4. საქართველოს მდგომარეობა დავით აღმაშენებლის გამეფების დროს.
5. დავით აღმაშენებლის სამხედრო მოღვაწეობა, მისი მოქმედებების საერთო გეგმა.
6. მუდმივი ჯარის დაარსება, ჯარის მაშინდელი, საომარი წყობილება, ბრძოლა კლარჯეთში.
7. მეფე დემეტრის და გიორგი III სამხ. მოღვაწეობა.
8. მეფე თამარი. პოლიტიკური მდგომარეობა.
9. შანქორის ომი და საქართველოს საზღვრების საბოლოო გამაგრება და დაცვა.

ტფილისი
„სრომა“, მუხრანის ქუჩა.
1915 წ.

სამხედრო ხელოვნება საქართველოში

(ნიმუშები სამხედრო ისტორიიდან)

1.

შესავალი

თანამედროვე საშინელმა ომმა, მიუხედავად ტექნიკურ საშუალებათა უკიდურესობამდე განვითარებისა, დაგომტკიცა და ცხად ჰყო, რომ სტრატეგიის და სამხედრო ხელოვნების ძირითადი დებულებანი უცვლელნი დაშთნენ. ამ მთავარ დებულებათ იგივე ადგილი უჭირავთ, რაგვარიც წინად ეკუთნოდათ. ბრძოლის წარმოება, ჯარის მოხმარება და გამარჯვების მოპოება კვლავ ამ ძირითად პრინციპების აღსრულებაზეა დამოკიდებული. დღეს ჯარის სარდალს იგივე მოეთხოვება, რაც მოეთხოვებოდა ყოველთვის მრავალ საუკუნეთა განმავლობაში. თუ დღეს მას ხელთ ბევრად მეტი ტექნიკური საშუალებანი აქვს, ნუ დაგვავიწყდება, რომ ამგვარადვე აღქურვილია მისი მოპირდაპირე.

გენიოსი სარდლები, ჰანიბალი, ალექსანდრე მაკედონელი, იულიოს კეისარი, ტიურენი, ფრიდრიხ დიდი და ნაპოლეონი სტრატეგიაში ერთსადაიმავე პრინციპებით ხელმძღვანელობდნენ.

სტრატეგიის დებულებანი მეტად მარტივი სახისანი არიან. თითქმის ერთი მთავარი დებულებით შეიძლება განისაზღვროს მთელი სტრატეგია: იმოქმედე გარემოების დაგვარად. მართლაც მარტივი და უცილობელი დებულებაა. მაგრამ ამ მარტივ წინადადებაში ესოდენ ბევრი რამ არის ჩამარხული, რომ თუ გახსნით ფრჩხილებს, მთელი ზღვა სხვა და სხვა დებულებათა გადაგეშლებათ თვალწინ. სწორედ ამით აიხსნება, რომ მიუხედავად თვით სტრატეგიის, როგორც თეორიის, სიმარტივისა კაცობრიობის ისტორიაში, საუკუნეთა განმავლობაში ნამდვილი სტრატეგები, დიდი სარდლები, მეტად ცოტაა, თითოთ დასათვლელი. ძველ საბერძნეთის ისტორიაში მხოლოდ ეპამინონდი, ალექსანდრე მაკედონელი არიან ცნობილნი როგორც გენიოსი სარდლები. თვით რომი, რომელიც თავის სახელმწიფოებრივ წეს-წყობილებით და მისწრაფებით ნამდვილ სამხედრო სახელმწიფოს წარმოადგენს, მხოლოდ ერთს დიდებულ სტრატეგს, იულიოს კეისარს დაგვისახელებს, ფართე იმპერიალისტურ პოლიტიკის მწარმოებელს კართაგენს წარმოუშვია მხოლოდ პანიბალი.

ევროპაში მთელს საშუალო საუკუნოებათა განმავლობაში თითქმის არ ვხედავთ ასეთსავე დიდებულ სარდლებს. ტიურენი, გუსტავ ადოლფი, ფრიდრიხ დიდი და ნაპოლეონი უკვე ახალ ისტორიას ეკუთვნიან. აღსანიშნავია, რომ ბუმბერაზი სარდლები მაშინ ჩნდებოდნენ, როდესაც მათი მშო-

ბელი ერი აღყვავების და გაძლიერების პროცესს განიცდიდა. ამ ხანაში ვითარდებოდა და ძლიერდებოდა ერის ცხოვრების ყოველი დარგი, მისი კულტურა მაღალ საფეხურებს აღწევდა და სწორედ ამ დროს ევლინებოდნენ მას დიდებული სარდლები და წინამძღოლნი.

თუ რომ შევისწავლით და დაეაკვირდებით დიდებულ სარდლების მოღვაწეობას, მოქმედებას, ნათლად დავინახავთ, რომ იგინი ყოველთვის სასტიკად და მტკიცედ იცავდნენ სტრატეგიის ძირითად მოთხოვნილებას და მათი მოქმედება სწორედ დასტურია ამ მოთხოვნილებათა აუცილებლობისა. მათი მოქმედების გეგმა ყოველთვის მარტივია, ისევე მარტივი როგორც სტრატეგიის დებულებანი. მაგრამ ამ მარტივის გეგმის აღსრულებისათვის რამდენი ენერჯია, რამდენი ძალები, ჯათა სჭირდებოდათ ავტორებს. და მიტომ, რომ მთავარ დებულებებში, რომელიც ზემოდ მოვიყვანეთ, არის ცნება გარემოება და ამ ცნებაში იმდენი სათუო და გამოსაცნობი საგანია, იმდენი სადავო კითხვები, შემთხვევას ესოდენი დიდი ადგილი უჭირავს, რომ ნამდვილი სიძნელე სწორედ ამ გარემოების გამოცნობაში და გათვალისწინებაშია. თქვენს წინაშე მოპირდაპირეა, რომლის ზრახვანი და გულის ნადები თქვენ არ იციოთ. სწორედ აქ იჩენს თავს ნიქი, უნარი და შორს მკვრეტელობა სარდლისა. თუ რომ მედიცინაში პირველი ადგილი დიაგნოზს უკავია, სამხედრო ხელოვნებაში

სწორედ გარემოების გამოცნობას და გათვალისწინებას ეკუთვნის პირველობა. ბრძოლის შედეგი იმაზეა დამოკიდებული, რამდენად განსკვრეტს და გამოიცნობს სარდლის ბასრი თვალი და მახვილი გონება გარემოებას. გენიოსი სარდლისათვის ზოგჯერ საკმარისია სულ მცირდენი რამ მოქმედება მოპირდაპირისა, გინდ ეს მხოლოდ მტრის მოწინავე მზვერავეების აღმოჩენა იყოს, რომ იგი უკვე მიხედეს მოპირდაპირის მთავარ განზრახვას. ნაპოლეონისათვის ხშირად საკმარისი იყო გაეგო, რომელ მხრით მოდიან მზვერავეები, რა და რა გზებით შეამჩნიეს იგინი, მან უკვე იცოდა რომელი სარბერაციო მიმართულებით იმოქმედებს მოპირდაპირის მთავარი ჯარი.

სტრატეგიის აღნიშნული მთავარი დებულება დღევანდელ ომშიაც კვლავინდებურად მეფობს. ყოველისფერი დამოკიდებურია გარემოებაზე. და ყოველი მოქმედება გარემოებასთან შეფარდებული უნდა იყოს.—სარდლის ნიჭი და უნარი სწორედ ამ გარემოების აწონ-დაწონაში და მის ღირსეულ დაფასებაში გამოიხატება. გეგმა გარემოებაზეა დამყარებული და გეგმის აღსრულებისათვის საშუალების გამოძებნა შედარებით უფრო ადვილი საქმეა, აქ სათუო და სადაო კითხვებს ადგილი არა აქვს. ყველა სარდალმა კარგად იცის რა აქვს მას ხელთ. აქ ადგილი მხოლოდ სარდლის ნების ყოფას აქვს. გეგმა დაუყოვნებლივ და შეუჩერებლივ აღსრულებულ უნდა იქმნას.

გარემოების გათვალისწინების და განსკვრეტის უნარი შესათერისი გეგმის შემუშავებისათვის და ძლიერი ნებისყოფა გეგმის დაუყოვნებლივ და შეუჩერებლი განხორციელებისათვის, აი ის თვისებანი, რომელთა მატარებელი არის ყოველი ნამდვილი სარდალი. ზემოდ დასახელებული გენიოსი სარდლები სწორედ ამით იყვნენ უხვად დაჯილდოვებულნი. ასეთ პიროვნებას ერი მხოლოდ მაშინ წარმოშობდა, როდესაც აყვავების და ძლიერების ხანაში იყო. სწორედ მაშინ თვით ერში დაგროვილია ენერჯია და სჩქეტს ძლიერი ნებისყოფა, სწორედ მაშინ თვითერია შორს გამკვრეტი და წინდახედული.

პატარა საქართველომ თითქმის მთელი თავისი სიცოცხლე ომიანობაში და ბრძოლაში გაატარა. თითქმის მთელი მისი ისტორია არის სამხედრო ისტორია. გეოგრაფიულ მდებარეობის და ისტორიულ პირობათა წყალობით ქართველი ერი მუდამ იარაღით აღჭურვილი ბრძოლის ველზე თითქმის განუწყვეტლივ იბრძოდა. ამ პირობებში სამხედრო ხელოვნება უსათუოდ უნდა განვითარებულიყო. ქართველმა ერმაც განიცადა აყვავების და ძლიერების ხანა და ამიტომ მასაც უნდა დაჰბადებოდა ნიჭიერი და სახელგანთქმული სარდალი. ერის სამხედრო ხელოვნება სწორედ მის აყვავების და ძლიერების დროისა უნდა განვიხილოთ, რადგანაც სწორედ ამ დროს საესებით და ნათლად გვეხატება ამ ხელოვნების თავისებურობა და თვისება.

ჩვენ აქ ქართველ ერის სამხედრო ხელოვნების ისტორიას არა ვწერთ. საქირო და საკმაო მასალები ხელთ არა გვაქვს და არც საკმაოდ მომზადებული ვართ. ჩვენ მოვიყვანთ მხოლოდ ზოგიერთ მაგალითებს საქართველოს ძლიერების დროიდან და შეიქცედებით ამ მაგალითების სტრატეგიის თვალსაზრისით დაფასებას. დარწმუნებული ვართ, რომ მკითხველისათვის საინტერესო იქნება ქართველ ერის დიდი სარდლების მოღვაწეობის გაცნობა. ასეთი სარდლებით, როგორც იყვნენ მეფე დავით აღმაშენებელი, გიორგი მესამე და თამარის დროს მეფე სოსლანი და მხარგძელი, ყველა ერი სიამოვნებით დაიკვირებს. ჩვენ ნათლად დავინახავთ, რომ ეს დიდებული მამულიშვილები ყოველთვის მტკიცედ იცავდნენ და ასრულებდნენ სტრატეგიის მთავარ მოთხოვნილებებს და ამით ღვაწლი ამ მხრით სამართლიანად მოითხოვს ამ სარდლების გენიოს სარდალთა პანთეონში მოთავსებას.

მეთერთმეტე და მეთორმეტე საუკუნოები იყო ის ხანა, როდესაც საქართველოს აყვავებამ და გაძლიერებამ უმწვერვალესობამდე მიაღწია. ამავე დროს დასავლეთ ევროპაში ფეოდალური ეწესწყობილება განმტკიცდა, რომის პაპის გავლენა მეტად გაძლიერდა და პაპი თითქმის მბრძანებელი იყო თვით ხელმწიფეებისა. დაიწყო ჯვაროსნობის ომები. რაინდობამ მხგრად ფეხი მოიკიდა და სამაგიეროდ სამხედრო ხელოვნება, როგორც ხელოვნება დაეცა. რაინდს არც სამ-

შობლოსი, არც ერისა არა სწამდა-რა, მისმა მოღვაწეობამ უფრო ავანტიურისმის ხასიათი მიიღო. სპორტად გადაიქცა. მხოლოდ სახელის მოხვეჭა, ქალისადმი უსაზღვრო თაყვანისცემა და ვითომდა ეკლესიისა და სარწმუნოების დაცვა. მართალია მათი დევიზი ვითომ მაშვრალთა და დევნილთა დაცვა იყო, მაგრამ ეს სრულიადაც ხელს არ უშლიდა იმავე რაინდს მგზავრი გაეძარცვა ან სოფელი აეოხრებინა. სამხედრო საქმემ ასე ვსთქვათ ინდივიდუალისტური ხასიათი მიიღო. იგი ნამდვილი ჯირითობა იყო, თალაგნობა, იგი ხელობად გარდაიქცა და სტრატეგიას აქ ადგილი აღარა ჰქონდა. იმავე დროს ბიზანტიის დაცემის და დასუსტების ნიშნები ცხადათ ემჩნეოდა. აღმოსავლეთ ევროპაში მოსკოვის სამეფო მხოლოდ გამოდიოდა ისტორიის ასპარეზზე. მხოლოდ მეათე საუკუნეში მიიღო მან ქრისტიანობა და სამეფოს გაერთიანების პროცესი მხოლოდ იწყება.

• სულ სხვა სურათი გვეხატება კავკასიაში და მცირე აზიაში. არაბებმა მაჰმადის შემდეგ მეტად გაანვითარეს სამხედრო ხელოვნება, ბევრი რამ ახალი შემოიღეს ბრძოლის წარმოებაში. მამაცი, კარგად გაწვრთნილი ჯარი, ფანატიზმით გატაცებული დიდს საშიშს ძალას წარმოადგენდა ენერგიით სავსე ნიჭიერ ხალიფების ხელში. აკი ამიტომ თავზარი დასცეს ევროპას და აზიას, დაიპყრეს სირია, პალესტინა, გაანადგურეს ძველი სპარსეთი და მცირე აზიის ნაწილი და შემოიჭრნენ კავ-

კასიაში. თითქმის სამი საუკუნე . დაჰყვეს არაბებმა საქართველოში და ამ ხნის განმავლობაში მათი ბატონობის მძიმე უღელს მუდამ გრძნობდა ქართველი ერი. მუდმივ ბრძოლაში და შეტაკებებში იზრდებოდა და იწვრთნებოდა ქართველების ჯარი. ცხადია, არაბთა სამხედრო ხელოვნებამ დიდი გავლენა იქონია ქართველების სამხედრო ხელოვნებაზედ თუ მოვიგონებთ, რომ იმ დროს სწორედ არაბებმა გაანავითარეს და მაღალ საფეხურზე აიყვანეს სამხედრო ხელოვნება, დაერწმუნდებით, რომ ქართველების ჯარს კარგი მასწავლებელი ჰყავდა. სიმ დროინდელ ჯარის მოქმედებას, მის ტაქტიკას ცხადათ ემჩნევა ეს გავლენა. არაბებმა წინანდელი ბრძოლის წესი და ჯარების ბრძოლისათვის დაწყობა შესცვალეს, მათ სამხედრო წყებას ცხადათ ემჩნევა დანაწილება, იგი უფრო მოძრავია, უფრო ადვილად სარგებლობს ბუნებრივი და ხელოვნური სიმაგრეებით, თვით ბრძოლის პროცესში ერთგვარი თანდათანობაა. ჩნდებიან წინმავალი და უკანმავალი რაზმები, მზვერავები, პირის-პირ შეხლის გარდა, მიმართავენ აგრედვე ჯარის წვერების შემოვლას, საკვები გზების გადაქრას. განსაკუთრებული მნიშვნელობა ეძლევა ცხენოსან ჯარის ხმარებას. არაბთა ჯარი არ ცდილობს უსათუოდ სწორს და წინად არჩეულ ბრძოლის ველზე გამართოს ბრძოლა, იგი პირიქით ხშირად ცდილობს მოულოდნელად და სწრაფად დაეცეს მტერს, სადაც კი მოასწრობს.

ყველა ეს ცხადად ემჩნევა, როგორც დავინახავთ ქართველების ჯარს და ამით კი არაბთა გავლენა მტკიცდება.

მეორეს მხრით ხანგრძლივ ბატონობის შემდეგ, როგორც ეს ყოველთვის ხდება, არაბები თანდათან სუსტდებიან, თვით მათ შორის შინაგანი უთანხმოება და ამირთა ურთიერთ ცილობა იჩენს თავს და ყველა ეს, რა თქმა უნდა, მათ სამხედრო ძალას ასუსტებს და თვით ჯარში დეზორგანიზაცია შეაქვს, რასაც თან სამხედრო ხელოვნების დაცემა მოსდევს. სამაგიეროდ ქართველი ერი იღვიძებს, წიელში მაგრდება და თანდათან მძიმე ულლის მოშორებას ცდილობს. კულტურით არაბები იმდენად მალლა არ იდგნენ ქართველებზე, რომ დაპყრობილი ერი გადაეგვარებინათ და საშუაშოდ შთანთქათ. თავის მხრით არც ქართველები იყვნენ იმდენად კულტუროსანი, რომ არაბები გაეთქვიფათ და ერთ ერთად ქცეულიყვნენ. არაბები ესტუმრნენ საქართველოს და სტუმრადვე დაშთნენ. სტუმრობა იგი ნაძალადევი იყო და ასეთი სტუმარა ბოლოს და ბოლოს უსათუოდ დაუძლურების გზას დაადგებოდა და დაადგა კიდევ. ✓

სწორედ ამ ხანაში საქართველოში გამეფდა დავით აღმაშენებელი. ვიდრე მის სამხედრო მოღვაწეობას შეუდგებოდა, საჭიროა გავითვალისწინოთ საქართველოს მაშინდელი საზღვრები და მდებარეობა და დავათასოდ სწორედ სამხედრო ხელოვნების თვალსაზრისით. / საქართველოს ჩრდილოეთით საზღვრავდა მთა კავკასიისა, დასავლეთით,

ზღვა პონტოსი (შავი ზღვა) და აღმოსავლეთით ერთ დროს ზღვა გურგანისა (კასპიისა) სამხრეთით კი „საზღვარი ხშირად იცვლებოდა და სწორედ ამ საზღვრის დაცვა-გაფართოება იწვევდა დაუცხრომელ ბრძოლას. იმ ხანაში, რომელსაც ჩვენ ვეხებით, საქართველოს აღმოსავლეთის ასპარეზი გურგანის ზღვის ბევრით დასავლეთით მდებარეობდა. აქ მის მოსაზღვრედ შირვანი, არანი და დვინი იყვნენ. აღნიშნულ საზღვართა შიგან მდებარეობდა ძველი საქართველო. საქართველო რამდენიმე კუთხედ იყოფებოდა, რომელნიც ერთი მეორისაგან მომეტებულ ნაწილად ბუნებრივ ხაზებით ისაზღვრებოდნენ. ✓

სახელმწიფოს დაცვისათვის საზღვრებს დიდი მნიშვნელობა აქვს. ღია საზღვრები, ადვილად გასავლელი, მეზობელ სახელმწიფოთა ურთიერთობას უადვილებენ, ვაჭრობა-მრეწველობის განვითარებას ხელს უწყობენ, ურთიერთზე გავლენის მეტს საშუალებას აძლევენ, სამაგიეროდ სახელმწიფოს დაცვას მეტად აძნელებენ, მტერს შემოსევას უადვილებდნენ. მათი დაცვისათვის უფრო მეტი ჯარია საჭირო. ასეთს საზღვრებს მუდამ უნდა უდარაჯონ. ✓ თუ პატარა საქართველომ აუარებელ მტერთა შემოსევას გაუძლო, თუ იგი სამუდამოდ არ გაჰქრა დედამიწის ზურგიდან, თუ მან დააღწია მაინც და მაინც თავი ირგვლივ შემორტყმულ გაშმაგებულ მტერთ, ამის მიზეზი, სხვათა შორის, საქართველოს საზღვრების ბუნებრივ თვისებებ-

ში უნდა ვეძიოთ. ✓ ამ მხრით საქართველო ერთს უზარმაზარ ბუნებრივ ციხეს წარმოადგენდა, რომელსაც რამდენიმე შესავალი კარი ჰქონდა. ამ ციხის გალავანს, ე. ი. საზღვრებს სუსტი ადგილებიც მოეპოვებოდა და ჩვენ დავინახავთ, რომ საუკეთესო ქართველ სარდლების ყურადღება სწორედ ამ სუსტ ადგილების დაცვისა და გამაგრებისაკენ იყო მიქცეული.

/ მეტად პატარა სამეფო იყო საქართველო, იგი ფართე იმპერიალისტურ პოლიტიკას ვერ აწარმოებდა, იგი ვერ აწარმოებდა ამიტომ ფართე შეტევითი ომს. იგი იბრძოდა მხოლოდ თავის დაცვისათვის და თუ ზოგჯერ მისი სახელოვანი სარდლები შორს უცხო ტერიტორიაში ილაშქრებდნენ და მტრის სამეფოს თითქმის შუაგულს შეესეოდნენ, ეს მხოლოდ აქტიური მოგერებითი ომი იყო. ჯარი აქ არა შედებოდა და ბრუნდებოდა სამშობლოში. ეს იყო საზღვრების აქტიური დაცვა. ამ რიგად ქართველები თავიდან იცლიდნენ მტრის შემოსევას საკუთარ მიწა-წყალში. ამგვარი ბრძოლისათვის დიდი აქტივობა და ინიციატივის უნარი იყო საჭირო. ჯარი სამშობლოს მუდმივ დარაჯად უნდა მდგარიყო, მუდამ მზად ყოფილიყო შემომსევე მტრის დასახვედრად. ჩვენ დავინახავთ, რომ საუკეთესო ქართველი სარდლები საკმაოდ იჩენდნენ ინიციატივასა და აქტივობას.

ჩრდილოეთით მაგარი და ძლიერი ზღუდე, ბუნებრივი კედელი ჰფარავდა საქართველოს. კავკასიის მთები მხო-

ლოდ სამ ადგილას იყო გასავლელი 1) ოსეთის გზით, რომელიც ქუთაისიდან იწყება და რაქა-ლექხუმით ჩრდილო-აღმოსავლეთისაკენ მიდის, გადალახავს კავკასიის მთებს (ქანქახის გადასავალი) და მიდის ეხლანდელ დარკობთან; 2) დარიალის ხეობა, არაგვის და თერგის ველებით; 3) გზა დარუბანდისა. პირველი გზა მეტად მძიმე სავალი იყო; მეორე მართალია შედარებით უფრო ადვილი სავალია, მაგრამ ვიწრო ხეობის დაცვა და გამაგრება ძნელი არ იყო და სულ მცირედი ჯარი გააჩერებდა მრავალ რიცხოვან მტერსაც კი; მესამე გზა მეტად შორი და ამასთანავე მძიმე სავალი იყო. გარდა ამისა იმ დროს კავკასიის მთების იქით არ მოიპოვებოდა ისეთი ძლიერი და დიდი სახელმწიფო, რომლის ჯარი შესძლებდა მაღალი ქედის გადმოლახვას და საქართველოში ფაროე შესევას. თუ შემდეგში ოსები და ლეკები შემოცვივდებოდნენ და იკლებდნენ საქართველოს ჩრდილოეთ ნაწილს, ეს უფრო ყაჩაღური დაცემა იყო ხოლმე, მცირე ჯგუფებით მოდიოდნენ და თუ ახერხებდნენ რასმეს, მხოლოდ იმიტომ, რომ იმ დროს თვით საქართველო დაქსაქსული, გაძვალტყავებული და ღონემიხდილი, დაუძლურებული იყო და ავაზაკთა ბრბოს თარეში უადვილდებოდა. ✓

ასე რომ ჩრდილოეთით საქართველო თითქმის სავსებით უზრუნველყოფილი იყო. ამგვარადვე უზრუნველი იყო დასავლეთის მხრით, შავი ზღვის ნაპირებით. იმ დროს არ მოიპოვე-

ბოდა ამ ზღვის ნაპირას მდებარე ნაოსნობით ძლიერი სახელმწიფო. ერთად-ერთი ბიზანტია, რომელსაც სხვებთან შედარებით ნაოსნობა უფრო განვითარებული ჰქონდა, მაინც ზღვით ფართო ოპერაციებს ვერ აწარმოებდა. მაშინდელი ხომალდები შორს ზღვით გალაშქრებას ვერ ბედავდნენ, მით უმეტეს ისეთი მოუსვენარი ზღვით, როგორცაა შავი ზღვა. თუ ეხლაც კი დესანტის გადასხმა, როდესაც ზღვაში რკინით მოქედელი გოლიათები თავისუფლად ნავარდობენ, მაინც ძნელ ოპერაციად ითვლება, მაშინ ხომ ეს თითქმის შეუძლებელი იყო. ამიტომ ბიზანტიელები საქართველოში ყოველთვის ხმელეთით ილაშქრებდნენ. ასეთი იყო ჩრდილოეთის და დასავლეთის საზღვრები. ✓

✓ აღმოსავლეთის საზღვრები დანამდვილებით და ზედმიწევნით არ არის გამორკვეული, ყოველ შემთხვევაში ამ საზღვრებს ზემოაღნიშნულ საზღვრებზე მეტი მნიშვნელობა ჰქონდათ. მოსაზღვრე სახელმწიფონი მართალია, იმდენად ძლიერნი არ იყვნენ, საფრთხეს წარმოადგენდნენ, მაგრამ თვით საზღვარი იმგვარივე იყო და იმდენად ახლოს კენტრთან, რომ ამ მხრით საფრთხე მოელოდა. უფრო მნიშვნელოვანი და საშიში მიმართულება განძიდან მომავალი გზებია. ამ მიმართულებით წამოსული მტერი მტკვრისა, ან და ივრის ნაპირებით ადვილად შეესეოდა საქართველოს, საქართველოს დედა ქალაქი, ტფილისი ამ მხრით საკმაოდ დაფარული არ იყო.

მართალია მტკვრის მარცხენა ნაპირი და ქვემო ივრის ველი თითქმის უდაბნოს წარმოადგენენ, ამ გზით სვლა ჯარისათვის მეტიდ ძნელია, მაგრამ თუ მხედველობაში მივიღებთ, რომ წამოსული ჯარი თავის მარცხენა წვერს მტკვრის მარჯვენა ნაპირით მდებარე მთებს მიაბჯენდა და ამით უზრუნველყოფდა, გარდა ამისა, ჩვენ ვიცით, რომ საქართველოს სამხრეთითაც მოსაზღვრედ მაჰმადიანთა სამეფონი ჰყავდა და მაჰმადიანები ხშირად შეერთებული ძალით მოდიოდნენ იერიშით, დავრწმუნდებით, რომ ამ შემთხვევაში განძის მიმართულებას დიდი მნიშვნელობა ეძლეოდა. აქედან შეიძლებოდა ქართველ ჯარისათვის გვერდით მოეფლოთ და იმ დროს, როდესაც იგი სამხრეთით შემოსეულ მტერს ებრძოდა, განძიდან წამოსულ მოპირდაპირეს მისი მარცხენა წვერისათვის მოეფლო და ზურგით მოჰქცეოდა. განძის მიმართულება იმდენად საშიში იყო ქართველებისათვის, რომ ხშირად ნახჭავანიდან წამოსული თურქები განძაზე მოდიოდნენ და აქედან შეესეოდნენ ხოლმე საქართველოს ტერიტორიას. ამიტომ განძას ქართველები დიდს მნიშვნელობას აძლევდნენ და ხშირად ილაშქრებდნენ აქედკენ ღდი შანქორის ომი თამარის დროს კწორედ ამ მიზეზით იყო გამოწვეული. თავის მხრით ქართველების მოპირდაპირეთ კარგად ესმოდათ განძის მნიშვნელობა და ამიტომ განძის მფლობელს გაჭირების დროს მისი მეზობლები ყოველთვის აქტიურ დახმარებას უწევდნენ.

უპირატესობა ეკუთნოდა საქართველოს სამხრეთის საზღვარს. სახელმწიფოს დაცვისათვის სწორედ ამ საზღვარს ჰქონდა მთავარი მნიშვნელობა. აქ საქართველოს მეზობლად ძლიერი და დიდი სახელმწიფოები იყვნენ. სპარსეთი, 'მემდეგ არაბები და თურქები, ბიზანტია. ერთი მეორის მეტოქეობაში და ცილაობაში ყველა მათგანს თვალი მუდამ საქართველოსაკენ ექირათ. დიდი მნიშვნელობა ჰქონდა იმას, თუ ვის მხარეს იქნებოდა საქართველო. სპარსეთის და არაბ-თურქების ბიზანტიასთან ომების დროს საქართველოს ჯარს შეეძლო ამა თუ იმ მოპირდაპირესათვის დიდი სამსახური გაეწია, ან დიდი ზიანი მიეყენებინა. მაგრამ თვით საქართველოსათვისაც სამხრეთის საზღვარს დიდი პოლიტიკურ-კულტურული და სტრატეგიული მნიშვნელობა ჰქონდა: უმთავრესი სავაჭრო გზები, საერთაშორისო ურთიერთობა და დამოკიდებულება, სწორედ ამ საზღვრებს ეკროდნენ მაშინდელი კულტურული ქვეყნები, აქედან მიდიოდნენ გზები ბიზანტიაში და რომში, მაშასადამე ევროპაში. აქ მოსაზღვრე დიდი სახელმწიფონი იმპერიალისტური მისწრაფებით გატაცებული იყვნენ. სწორედ ამიტომ მთავარი შემოსევაწი და შეტევანი აქედან იყო მოსალოდნელი და ეს ასეც ხდებოდა. ამ საზღვრებით შემოსეული მტერი უახლოესი გზით შეიჭრებოდა შუაგულ საქართველოში და მიადგებოდა მის მნიშვნელოვან ცენტრებს. ამიტომ საჭიროა ამ საზღვრის უფრო დაწვრი-

ლებითი განხილვა. საქართველოს ნაწილი, რომელიც ამ საზღვარს ეკრა მუდმივ ბრძოლის ასპარეზად იყო ქცეული.

ამ საზღვრის მნიშვნელობა და თვისებანი ჩვენთვის რომ უფრო ნათელნი იყვნენ, უნდა საქართველოს შემადგენელ კუთხეების მდებარეობა და მათი საზღვრები გავითვალისწინოთ.

ჩრდილოეთით მოსაზღვრე კავკასიის მთების დასავლეთ ნაწილს შეადგენდნენ მთანი აფხაზეთისანი. კავკასიის მთების მთავარ ქედიდან ბევრი შტოები გამოდის და მათ შორის ჩვენთვის აღსანიშნავია: 1) ღიზის მთა, რომელიც დაახლოვებით მდ. ყვირილას სათავედან იწყება და მიდის სამხრეთ-დასავლეთისაკენ, თითქმის ბორჯომის ხეობამდე; აქედან მიტრიალდება უფრო დასავლეთით და აქ მის გაგრძელებას ეწოდება მთა ლაღოსი (ზოგიერთ ეხლანდელ რუქაზე ახალციხის მთებს უწოდებენ), შემდეგ ეს შტო პირდაპირ დასავლეთისაკენ წავა და ასე თითქმის ზღვის პირას იღწევს. ამ ნაწილს უწოდებენ აქარის მთებს. 2) მთა არსიანისა, რომელიც იწყება იქ სადაც ლაღოს და აქარის მთები ერთდებიან და მიდის პირდაპირ სამხრეთისაკენ თითქმის არტანუჯის და არტაანის შუა მდებარე ადგილამდე; და 3) მთანი კახეთისანი, რომელნიც იწყებიან ზემო არაგვის მარცხენა ნაპირით, ჯერ მიდიან სამხრეთით გომბორამდე და შემდეგ სამხრეთ-აღმოსავლეთისაკენ აქვთ მიმართულება. შემდეგ აღსანიშნავია, სომხეთის მთა, იწყება ფარაენის

ტბასთან ახლოს, მიდის ჯერ სამხრეთით და შემდეგ აღმოსავლეთისაკენ მიღრიალდება.

დასახელებული მთები სტრატეგიის მიხედვით მთელ საქართველოს ტერიტორიას სამს მთავარ ნაწილად ჰყოფენ: დასავლეთი ნაწილი—ზღვის პირით დაწყებული აღმოსავლეთით ლიხისა და არსიანის მთებამდე, შუაგული ნაწილი—ლიხისა და არსიანის მთებიდან დაწყებული კახეთის და სომხეთის მთებამდე და აღმოსავლეთი ნაწილი—კახეთი, ე. ი. ივრის და ალაზნის ველები. სტრატეგიის მხრით ეს ნაწილები სხვა და სხვა ღირსების და მნიშვნელობისანი არიან. — განვიხილოთ ყველა მათგანი ცალცალკე. დასავლეთი ნაწილი ანუ ასპარეზი ჩრდილოეთით ისაზღვრება აფხაზეთის და სვანეთის მთებით, აღმოსავლეთით ლიხისა და არსიანის მთებით, სამხრეთით მთა კოლასი და ორჯოხის მთა; დასავლეთით ზღვის პირი. დასახელებულ საზღვართა შიგნით მდებარეობდნენ შემდეგი მხარენი, ჩრდილოეთით მოყოლებული სამხრეთისაკენ: აფხაზეთს და სვანეთს მოსდევდნენ ეგრისი (სამეგრელო), ქუთაისი და რაქა-ლეჩხუბი, შემდეგ გურია, რომლის სამხრეთ საზღვრად აქარის მთები იყო, შემდეგ აქარა, შავშეთი და კლარჯეთი და მერმე ტაო ბასიანი. დასავლეთი ასპარეზი აღმოსავლეთ დასავლეთითაც იყოფებოდა მთებით. გარდა აქარის მთებისა, ასეთივე მიმართულებისანი არიან შავშეთის და კლარჯეთის მთანი. ასე რომ ასპარეზი სამი მხრით

თითქმის შემოზღუდულია მთებით და გარდა ამისა სამ ალაგას გადაჭრილია აგრედვე მთებით. მეტად ხელსაყრელია ტოპოგრაფია ამ ტერიტორიის დაცვისათვის. სამხრეთიდან ბასიანი ტაოთი წამოსულ ჯარს წინ ელობება ჯერ კლარჯეთის მთები. შემდეგ შავშეთისა და მერმე აჭარისა. აღმოსავლეთიდან წამოსული ჯარი მიაწყდება ან ლიხის ან და არსიანის მთებს; ჩრდილოეთით ხომ ეს ასპარეზი თითქმის მიუვალია. მივაქცევთ ამგვარ მდებარეობას მკითხველის ყურადღებას. ამგვარი ტოპოგრაფიის წყალობით მაგალითად აფხაზეთი ეგრისითურთ შედარებით საქართველოს სხვა კუთხეებთან ბევრით უკედ იყო დაფარული და მტრის შემოსევისაგან ცოტად თუ ბევრად უზრუნველყოფილი. ამ გარემოებით აიხსნება, რომ სწორედ აფხაზეთში დაიბადა პირველად აზრი განცალკევებულ და დანაწილებულ საქართველოს გაერთიანებისა. აფხაზეთი მტრის დარბევისაგან უფრო იყო რჩენილი და შენახული და თვით საქართველოს მეფეები არა ერთხელ გაჭირების დროს აქა ჰპოვებდნენ საფარს აფხაზეთის მეფეები იმდენად არ იყვნენ მტრისაგან დაჩაგრული და სასოწარკვეთილნი და სწორედ მათ უნდა გამოეჩინათ ინიციატივა დიდს საისტორიო საქმეში, საქართველოს გაერთიანებაში. გარდა მთებისა, მდინარეთა მიმართულებაც ხელს უწყობდა ამ ასპარეზის დაცვას. აჭარის მთების გასწვრივ ჩრდილოეთით დის რიონი, იმავე მთების გასწვრივ სამხრეთით დის აჭარის

წყალი; შავშეთის და კლარჯეთის მთათა შუა დის იმერხევი; ქვემო კოროხი ჰფარავს სამხრეთ - დასავლეთის მხრით. ამ რიგად ასპარეზი თვით ბუნებით კარგად არის გამაგრებული და სამხრეთიდან წამოსულ მტერს დიდს წინააღმდეგობას გაუწევს. ამით აიხსნება, რომ ბასიან-ტაოთი შემოსეული მტერი საქართველოსკენ გალაშქრებისათვის არტაანზე მიმავალ გზებს ირჩევდა და დასავლეთ ასპარეზს აღმოსავლეთით უვლიდა. აღმოსავლეთის მხრით ამ ასპარეზში შესევა ან არტაანის ან და სამცხის მხრით შეიძლებოდა. პირველ შემთხვევაში მტერს არსიანის მთა უნდა გადაეღაზა არტაან-არტანუჯის გზით (ანაკერტის გადასავალი, ეხლანდელი იალაგიუზქამის გადასავალი). სწორედ აქ იყო მაგარი ციხე ანაკერტი. მეორე შემთხვევაში ახალციხიდან შეიძლებოდა შესევა აჭარაში, რისთვისაც აგრედვე არსიანის მთები უნდა გადაეღაზა, გოდერძის გადასავალით. აქ ციხე გოდერძი იყო აშენებული. და ახალციხიდანვე შეიძლებოდა ქუთაისისაკენ გალაშქრება, რისთვისაც ლადოს მთის გადაღაზვა იყო საჭირო (ზეკარის გადასავალი) აქ აშენებული იყო მაგარი და ძლიერი ციხე ოძრახე (აბასთუმანი) ყურადღების ღირსია ამ ორი ციხისათვის ადგილების არჩევა. ციხე ოძრახე ჰფარავდა ლადოს მთის გადასავალს და ამასთანავე ჰკეტავდა მდ. კერშევეტის ველის შესავალს. ეს მდინარე კი შემდინარეა ხონის წყლისა. მაშასადამე ეს ციხე ჰფარავდა რიონის ველში,

ქუთაისთან ჩამავალ გზას. შემოვლა და აცდენა ამ ციხისა შეუძლებელი იყო. მას ორივე მხრით მაღალი მთები და ხეები არტყია და ქუთაისისაკენ წამოსული მტერი უსათუოდ ამ ციხეს უნდა მისდგომოდა. ამ გვარივე მნიშვნელობა ჰქონდა გოდერძის ციხეს, იგი არსიანის მთაზე გადასავალის დაფარვის გარდა ჰკეტავდა აგრედვე აქარის წყლის ხეობას და ამ ხეობით როგორც აქარაში აგრედვე, შემდეგ ქოროხის ხეობით, შავშეთ-კლარჯეთშიაც შეიძლებოდა შესევა. გოდერძის ციხის აცდენა და შემოვლაც შეუძლებელი იყო. ერთის მხრით აყუდებულა ნაომარის და მეორეს მხრით თლილოს მთები. მათი სიმაღლე თითქმის 800 ფუტს უდრის.

აღსანიშნავია სამხრეთით არტანუჯის ციხე, ეს კარი საქართველოსი. არტანუჯით მოდიოდა დიდი გზა „გზა ქართლისა“. ამ გზით მომავალი ჯერ კლარჯეთს შევიდოდა და შემდეგ „არსიანის კარით“ ან სამცხეში ან და ჯავახეთში და აქედან კი ქართლში. გარდა ამისა არტანუჯი ჰკეტავდა ქოროხის ველში ჩასავალ გზას. არტანუჯის სამხრეთით აგებული იყო ქოროხის ველში ციხე თუხარისი (იშხანის მახლობლად). ამ ციხის ახლოს ერთდებოდნენ ტრაპეზუნთიდან, არზრუმიდან და ხოროსნიდან მომავალი გზები. აქვე ახლოს ქოროხს უერთდება ოლთისის წყალი და თავის-თავად ცხადია, რა მნიშვნელობა ჰქონდა თუხარისის ციხეს.

ასეთი იყო და აკლეთის ასპარეზი. სულ სხვას წარმოადგენდა შუა-გული

ნაწილი, ცენტრალური ასპარეზი: იგი ჩრდილოეთით დაფარულია აგრედვე კავკასიის მთებით. მაგრამ სწორედ აქ არის საუკეთესო გზა კავკასიის მთების გასავალი. როგორც ნათქვამი გვექონდა, იმ დროს ჩრდილოეთის საზღვარის იმდენი მნიშვნელობა არა ჰქონდა, ჩრდილო-აღმოსავლეთით ამ ასპარეზს კახეთის მთები საზღვრავდნენ და აღმოსავლეთით მდ. მტკვრის ნაწილი და შემდეგ მტკვრის შემდინარე ბერდუჯი (ახლანდელი დებედჩაი): სამხრეთით მთანი სომხითისანი, ქ. ანისის და კარის მიდამოები და შემდეგ მთა—კოლასი. დასავლეთით—ლიხის, ლაღოს და არსიანის მთები. ამრიგად მხოლოდ ჩრდილოეთით და დასავლეთით ჰქონდა საკმაო საფარი, მაღალი, ძნელად გასავალი მთები და ეს მთები მას საზღვრავდნენ თავისივე სამეფოს ნაწილებისაგან და სწორედ იქ, სადაც ძლიერი საფარი იყო საჭირო, ე. ი. აღმოსავლეთით და სამხრეთით, იქ ჩვენ ასეთს ზღუდეებს არა ვხედავთ, საიდანაც ყოველთვის შიში იყო, ბევრი კარები, ადვილად შესავალი ჰქონდა ასპარეზს. საუბედუროდ, მთავარ ქედებისა და მდინარეების მიმართულე-ბაც უძნელებდა ტერიტორიას დაცვას და შტერს შემოსევას უადვილებდა. ამ მთავარ ქედებს მიმართულე-ბა უმთავრესად ჩრდილოეთიდან სამხრეთისაკენ აქვთ. არსიანის მთა და მისი გაგრძელება მთა—კოლასი, სოღანლულის მთა, სომხითის მთების ნაწილი, ფარაენის ტბის აღმოსავლეთით („მოკრია გორი“) და სწორედ ამ მთათა შუა მო-

დიან საუკეთესო გზები ჩრდილო-დასავლეთის ან და ჩრდილოეთისაკენ. მდინარეებსაც აგრედვე იგივე მიმართულება აქვთ: მტკვარი, თითქმის ტასისკარამდე (ქვიშხეთის მახლობლად), საერთოდ ჩრდილო-აღმოსავლეთისკენ დის; ასეთივე მიმართულება აქვთ უმეტეს ნაწილად მის შემდინარეებს. მხოლოდ თვით მტკვარი ტასისკარიდან დაწყებული მცხეთამდე დასავლეთიდან აღმოსავლეთისაკენ დის და ტფილისის მახლობლად კიდევ ასეთი მიმართულება მის ორს შემდინარენ ალგეთის წყალს და ქციას (ხრამი) აქვთ. რახსი (არაქსი) ეჩმიაძინიდან დაწყებული ნახჭავანდე სამხრეთ-აღმოსავლეთისაკენ დის ასე რომ მისი ხეობით ადვილად შეიძლებოდა შემოსევა ანისისაკენ საქართველოს ტერიტორიაში. მართალია, აქაც არის ორი ქედი, რომელთაც მიმართულება აღმოსავლეთ-დასავლეთისაკენა აქვთ: თრიალეთის მთა და სომხეთის მთების სამხრეთი ნაწილი, მაგრამ ამას მნიშვნელობა ეკარგება, რადგანაც თრიალეთის მთა და მისი ნაწილი არჯავანის მთა მდ. მტკვრის ნაპირის ახლოს მდებარეობენ და ტფილისისაკენ წამოსული ჯარი ადვილად მოუვლის მათ სამხრეთით. აგრედვე ადვილად მოუვლის დასავლეთით სომხეთის მთებს.

ამ რიგად ცხადია, რომ ცენტრალურ ასპარეზის სამხრეთი საზღვრები ადვილი გადასალახი იყვნენ. მთების შუა და მდინარეთა ველებით მტერი პირდაპირ წამოვიდოდა შუაგულ ქართლისაკენ და სამეფოს მთავარ ცენტრებს

მიადგებოდა. და სწორედ ამ მხრით როდიოდა საქართველოში მრავალი კარგი გზები. სწორედ ამ მხრით მოიწვედნენ მტრები და სწორედ ამიტომ, სხვებთან შედარებით ცენტრალური ასპარეზის ნაწილები ყველაზე მეტად ირბეოდნენ. ყველაზე ხშირად აწიოკებულ და აოხრებულ იქმნენ. ცენტრალურ ასპარეზის ხელში ჩაგდებით და აქ დამკვიდრებით შემოსეული მტერი მთელი საქართველოს ბატონად ხდებოდა და მთელს სახელმწიფოს შუაზე არღვევდა: ცასავლეთ-საქართველოს სწყვეტდა აღმოსავლეთისას და იადვილებდა როგორც დასავლეთის ასპარეზში შესევას, აგრედვე კახეთის დაპყრობასაც. ზემოდ აღვნიშნეთ, რომ დასავლეთ-საქართველოში შესევა, ე. ი. არსიანის მთის გადალახვა შედარებით უფრო ადვილი იყო, ვიდრე სამხრეთის მხრით შესვლა, სადაც მთელი რიგი მთებისა და მდინარეებისა წინ ელობებოდა, ამიტომაც არის, რომ ვიდრე ცენტრალურ ასპარეზის საზღვრები სათანადოდ არ გაამაგრეს და არ დაიმკვიდრეს, ვერ შესძლეს ქართველებმა საქართველოს საბოლოო გაერთიანება. ამიტომაც არის, რომ მას შემდეგ, რაც თურქებმა შემდეგში საბოლოოდ წაჰგლიჯეს საქართველოს ცენტრალურ ასპარეზის სამხრეთი ნაწილი, საქართველომ ვეღარ გაისწორა წელი, ვეღარ გაუძლო მტრებს უღმობელ ბედის წინაშე მოიხარა ქედი და „ჩრდილოეთისაკენ“ აღაპყრო თვალნი.

შუაგულ ასპარეზის საერთო განხილვის შემდეგ, გავითვალისწინოთ ის მთა-

ვარი საოპერაციო მიმართულებანი, საიდანაც მტერს შეეძლო მაშინდელ საქართველოში შემოსევა. დაეწყოთ სამხრეთ - დასავლეთიდან. როგორც ვსთქვით, შემოსევა მდინარეთა ველებით და მათა შუ ხეობებით შეიძლებოდა. კარნუა ქალაქის (არზრუმი) წამოსულ ჯარს შეეძლო გადმოელახა ბასიანი და მდ. ოლთისის ველით გადმოეგლო ოლთისი, კოლა და შემდეგ ზემო მტკვრის ველით არტაანს მისდგომოდა. არტაანს განსაკუთრებული მნიშვნელობა ჰქონდა ამ შემთხვევაში; აქედან შეიძლებოდა როგორც დასავლეთის ასპარეზში, არსიანის მთის გადალახვით შესევა (არტანუჯში გადასვლა), აგრედვე არსიანის მთის აღმოსავლეთით სამცხეში გადასვლა და ახალციხის დაპყრობა. აქედან კი მტერს შეეძლო როგორც აქარაში, აგრედვე ლადოს მთის გადალახვით, ქუთაისისაკენ გალაშქრება. იმავე ახალციხიდან ბორჯომის ხეობით ზემო ქართლში შესევა და ქ. გორის დაპყრობა შეიძლებოდა; ასე რომ არტაანის და ახალციხის დაპყრობა მტერს ბევრ გზებს უხსნიდა და მას გარემოებისა და საკუთარ მიზნის მიხედვით შეეძლო ამათუ იმ საოპერაციო მიმართულების არჩევა. აღნიშნული გზით წამოსულ ჯარს შიში მოელოდა მხოლოდ დასავლეთ ასპარეზის მხრით. კლარჯეთ-შავშეთ-აქარის მხრით შეიძლებოდა მას გვერდით დასცემოდნენ და უკან სახევი გზა გადაეჭრათ. მაგ., ციხე ანაკერტის, არსიანის კარის ან და ციხე გოდერძის მხრით, მაგრამ ამ შემთხვევაში მტერს

შეეძლო იმავე ზემო მტკვრის ველით დაეხია, მთა კოლისათვის აღმოსავლეთით მოეარა და კარის (ყარსი) მიდამოებში გადასულიყო.

არტაანის მნიშვნელობა მარტო ამით არ ისაზღვრებოდა: აქედან შეიძლებოდა ჯავახეთში შესევა მდ. მტკვრის ხეობით. ჯარი პალაკაციოს ტბას (ებლანდელი ჩალდირგიელ) ჩრდილოეთით მოუვლიდა და ახალქალაქს დაიპყრობდა. ახალქალაქიდან კი მას შეეძლო გალაშქრება: ბაკურიანს გადალახავდა და ბორჯომის ხეობაში ჩავიდოდა ან და ფარავნის ტბას ჩრდილოეთით ასცდებოდა და მდ. ქციის (ხრამი) სამშვილდის მიადგებოდა, რომელიც წინა საფარი იყო ტფილისისა. ახალქალაქიდან, რა თქმა უნდა, ახალციხეშიაც შეიძლებოდა გადასვლა.

ცხადია რა დიდი სტრატეგიული მნიშვნელობა ჰქონდა აღნიშნულ სამკუთხედს — არტაან-ახალციხე-ახალქალაქი. ეს იყო შუაგული, ციტადელი მთელი იმ ბუმბერაზ ციხისა, რომელსაც წარმოადგენდა საქართველო. ამ სამკუთხედის ხელში ჩაგდებათ და აქ დამკვიდრებით მტერს საშუალება ეძლეოდა თავისუფლად ეწარმოებინა ოპერაციები და ის მიმართულება აერჩია, რომელსაც მოისურვებდა. საკვები და უკან დასახევი გზები საკმაოდ მოეპოვებოდა, ოლთისისაკენ, კარისაკენ, ანისისაკენ და თუნდაც ერევან-ნახჭავანისაკენ. მაშასადამე საქართველოს ცენტრალურ ასპარეზის და მაშასადამე მთელი სამეფოს დაცვისათვის აუცილებელივ საჭირო იყო აღნიშნულ

სამკუთხედის მედგარი დაცვა და გამაგრება. მეორე მიმართულება, რომლითაც შეიძლებოდა ცენტრალურ ასპარეზში შემოსევა, იყო კარის მიმართულება. ხოროსნიდან წამოსული ჯარი ჩრდილოეთით რაბს გადალახავდა, აღმოსავლეთით მოუვლიდა სოლანლულის მთებს და მიადგებოდა კარს (ყარსი). აქედან კი მას შეეძლო ან არტაანში ან და ახალქალაქში გადასვლა. მაშასადამე იმავე სამკუთხედს ჩაიგდებდა ხელში, რომლის შესახებ ზემოდ გვქონდა ნათქვამი. კარიდან შეიძლებოდა აგრედვე ჩრდილო-აღმოსავლეთით გალაშქრება. იგი გადალახავდა სომხეთის მთებს (ბეზაბდალის გადასავალი) და ჩავიდოდა ლორის მინდორში. აქედან ან სამშვილდეს მიადგებოდა, ან და მას სამხრეთ-აღმოსავლეთით მოუვლიდა, მაგ. მდ. ბერდუჯის ველით. შემდეგი მიმართულება საქართველოში გალაშქრებისათვის იყო ქ. ანისის მიმართულება. ქ. დვინიდან წამოსული ჯარი დიადინს მიადგებოდა, შემდეგ რაბს გადალახავდა იგდირს და ყულფის შუა და მიადგებოდა ქ. ანისს. ანისიდან მას შეეძლო, როგორც დასავლეთით კარისაკენ გალაშქრება, აგრედვე ჩრდილოებისაკენ ახალქალაქზე, ან და ჩრდილო-აღმოსავლეთით ლორის მინდორით სამშვილდისაკენ ან და ლორითვე ბერდუჯის ხეობით უფრო აღმოსავლეთით გადასვლა. შთება კიდევ ერთი მიმართულება, რაბსის ველი ნახკაჯანიდან მოყოლებული ეჩმიადინ-ერევნამდე. ადარბაგანიდან წამოსულ ჯარს ამ მიმართულებით შეეძლო

ჩრდილოეთისაკენ ტფილისის სამხრეთ სანახევებში შესევა, ან და გელაქუნის ტბის აღმოსავლეთით განძა-შამქორისაკენ გალაშქრება, ე. ი. რანში შესვლა. ერევნიდანვე შესაძლებელი იყო წამოსვლა გელაქუნის ტბის დასავლეთის ნაპირით და მდ. ახსტაფის და შემდეგ მტკვრის ველებით ტფილისზე დაცემა

მთავრ შიმართულებების განხილვა ცხადად გვიმტკიცებს, რომ ერთობ საქართველოს და კერძოდ მის ცენტრალურ ასპარეზის დაცვისათვის აუცილებელივ საჭირო იყო ოლთისის—კარის—ანისის—ლორის და შამქორის ხაზის დაპყრობა და გამაგრება. მხოლოდ მაშინ, როდესაც საქართველოს დამცველთ ხელთ ეპყრათ ეს ხაზი, მხოლოდ მაშინ შეეძლოთ თავისუფლად სუნთქვა და სამეფო ცოტად თუ ბევრად უზრუნველყოფილი იქნებოდა მტრის შემოსევა-დარბევისაგან. ცენტრალურ ასპარეზის დასავლეთ ნაწილში განსაკუთრებული მნიშვნელობა, როგორც ვსთქვით, ჰქონდა სამკუთხედს — არტაანი — ახალციხე — ახალქალაქი. ასეთივე მნიშვნელობა ჰქონდა ასპარეზის სამხრეთ-აღმოსავლეთის ნაწილში სამკუთხედს, კარი—ანისი—ლორი. ამ ორ სამკუთხედში ერთიე რომ ჩაეარდნოდა მტერს ხელში, ეს უკვე მისთვის დიდი გამარჯვება იყო. სწორედ ამიტომ აუცილებელივ საჭირო იყო შემოაღნიშნულ ხაზის მედგარი დაცვა და გამაგრება. საქართველოს სახელოვანი სარდლები კარგად ჰგრძნობდნენ ამას, მათ ეს კარგად ჰქონდათ გათვალისწი-

ნებული. დიდის ნიჭით აღჭურვილი სარდლები თანდათანობით, მეთოდურად მიისწრაფვიდნენ ამ მიზნის განხორციელებისაკენ. ამ ხაზის დაცვა უსათუოდ აქტიური უნდა ყოფილიყო, ე. ი. ქართველების ჯარს უფრო სამხრეთით უნდა გაელაშქრა, აქტიური მოგერიებითი ბრძოლა ეწარმოებინათ. რა წამს მათ საკმაო ძალა მოიკრიბეს, რა წამს მოლონიერდნენ, შეერთდნენ, მაშინადვე შეუდგნენ ამ აქტიურ მოგერიებითი ბრძოლას. გალაშქრება კარნუ კალაქისაკენ, ხოროსანსა, ნახკავან-თავრიზისაკენ ეს აქტიური მოგერიებითი თავის დაცვა იყო. თამარის დროს, როდესაც საქართველოს ძლიერებამ უწვევრეალესობამდე მიაღწია და მთელს მცირე აზიაში უძლიერეს სამეფოდ ითვლებოდა, ქართველების ჯარმა ტრაპეზუნთიკ კი აიღო, მაგრამ თამარმა ეს სამფლობელო უწყალობა საბერძნეთის მეფეთა სავარეულოს წევრს და ამით დიდი პოლიტიკური გამჭრიახობა გამოიჩინა. საქართველოსთან შემოერთება სახეირო არ იქნებოდა, რადგანც ამ სამთავროს დაცვა-შენარჩუნება დიდს ძალას და შრომას მოითხოვდა.

ცენტრალურ ასპარეზის მიმოხილვის დასრულებისთვის საჭიროა აღვნიშნოთ მისი შემადგენელი ნაწილები. ამ ასპარეზის უდიდეს ნაწილს ქართლი შეადგენდა. დასავლეთით მას საზღვრავდნენ ლიხის და სომხითის მთანი; სამხრეთით იგივე სომხითის მთანი; აღმოსავლეთით რანი და შემდეგ ჰერეთი და კახეთი. ჩრდილოეთით ოვ-

სეთი და ძურძუკეთი. ქართლის ნაწილები იყო ზემო და ქვემო ქართლი და გარდაბანი. ჩვენთვის საინტერესოა ეს უკანასკნელი ნაწილი. გარდაბანს, როგორც ირკვევა, შეადგენდნენ ეხლანდელი ბორჩალოს მაზრა, და ეხლანდელივე ტფილისის და გორის მაზრის ნაწილები მტკვრის მარჯვენა ნაპირზე მდებარენი. გარდაბანი მთელი ქართლის სატარი იყო დასავლეთის, სამხრეთის და სამხრეთ-აღმოსავლეთის მხრით. გარდაბანს თითქოს განგებ აშენებული საზღვრები აქვს: სამხრეთით და სამხრეთ-აღმოსავლეთით მას უფლიან და ჰვარავენ სომხითის მთები; ჩრდილოეთით და აღმოსავლეთით მტკვარი და სამხრეთ-აღმოსავლეთით მდ. ბერდუჯი. გარდა ამისა რენიდან ტფილისისაკენ მომავალი გზები გადაჭრილია მრავალი ხეებით და მტკვრის მარჯვენა შემდინარეებით. დასავლეთით ან სამხრეთით შემოსულ მტერს წინ გადაელობებიან თრიალეთის ან და სომხითის მთანი. ამ მხრით გარდაბანი ბუნებრივი სატარია ქართლისა ტფილისითურთ. გარდა ბანშივე ტფილისის სამხრეთით განთქმული სამშვილდის პოზიცია, რომლის დაკარგვა ტფილის დაკარგვას მოასწავებდა ხოლმე. დანარჩენი ნაწილები ცენტრალურ ასპარეზისა იყვნენ: სამცხე (ქ. ახალციხით), ჯავახეთი (ქ. ახალქალაქით), არტაანი (ქ. არტაანით), კოლა და ტაო (ოლთისით). ამ კუთხეების მნიშვნელობა უკვე ვიცით. საკმარისია მოვიგონოთ სამკუთხედი არტაან-ახალ-

ციხე-ახალქალაქი. შემდეგ გვრჩება ცენტრალურ ასპარეზის ნაწილები აბოცი, ჯავახეთის სამხრეთით, უფრო სამხრეთით „ქვეყანა პალაკაციო“ და მერმე კარის და ანისის მიდამოები. ყველა ამათ მნიშვნელობა საოპერაციო მიმართულებათა განხილვით გასაგებია ჩვენთვის.

დაგვრჩა აღმოსავლეთის ასპარეზი— კახეთი და ჰერეთი. ამ ასპარეზს ის საერთო მნიშვნელობა ჰქონდა, რომ იგი ჰტარავდა ჩრდილო-აღმოსავლეთით საქართველოს, მისი სამხრეთ-აღმოსავლეთით მოდიოდნენ გზები მტკვრისა, ივრისა და ალაზნის ველე-ბით. ამ მხრით მის მოსაზღვრეთ იყვნენ შირვენი, მოვაკანი და რანი. მართალია ეს მოსაზღვრე სამეფონი, ან საამირონი დიდს ძალას არ წარმოადგენდნენ, მაგრამ მათ, როგორც მაჰმადიანებს, სამხრეთით მდებარე მაჰმადიანთა დიდი სახელმწიფონი ყოველთვის მხარს უჭერდნენ. აგრად ამისათვის შირვანისა და მეტადრე რანის მფლობელთ, საქირო დროს, შეეძლოთ შემოსეოდნენ საქართველოს სწორედ იმ დრო, როდესაც მისი ჯარი სადმე სამხრეთის საზღვრებზე ბრძოლაში იქნებოდა გართული. ამიტომაც არის, რომ ქართველი სარდლები ყოველთვის დიდს ყურადღებას აკუთვნებდნენ შირვანს და რანს. ერთ დროს ეს სამთავრონი მოხარკედ იყვნენ საქართველოსი. როდესაც აფხაზთა მეფეებმა საქართველოს გაერთიანების საქმე იწყეს, მათ უპირველეს ყოვლისა შირვანის და რანის სამფლობელოებს მი-

აქციეს ყურადღება. შუაგულ საქართველოს განთავისუფლების და შემოერთების საქმის დაწყების მხოლოდ მაშინ შეიძლებოდა, როდესაც კახეთის, მასასადამე შირვანის და რანის მხრით აფხაზთა მეფენი უზრუნველყოფილი იქნებოდნენ. გარდა ამისა ჩვენ ვიცით, რომ საქართველოს გაერთიანების წინააღმდეგ ყოველთვის დიდგვარიანი თავადობა იყო, მეტადრე ქართლის ერისთავები, განსაკუთრებით სამშვილდის, გარდაბანის მფლობელები. იმდენად არ ექაშნიკებოდათ მათ საქართველოს გაერთიანება, რომ ხშირად იარაღით ხელში წინააღმდეგობას უწევდნენ და არა ერთხელ ისეთს საზარელ საშუალებასაც კი მიმართავდნენ, რომ მაჰმადიანთა ჯარები მოჰყავდათ თავისივე საკუთარ სამშობლოს აწიოკება-აოხრებისათვის. და აი სწორედ ამ შემთხვევაში შირვანს და რანს დიდი მნიშვნელობა ეძლეოდა. იგინი ყოველთვის მზად იყვნენ მხარი დაეჭირათ ურჩ და თავგასულ ქართველ თავადებისათვის. საქართველოს შეერთების იდეით გატაცებულს ადამიანს ამ გარემოებისათვის უსათუოდ დიდი ანგარიში უნდა გაეწია და უწევდნენ კიდევ, როგორც ქვემოთ დავინახავთ.

ასეთი სახით გვეხატება მაშინდელი საქართველს ტერიტორიის საერთო მნიშვნელობა სტრატეგიის თვალსაზრისით.

ჩვენ ვეხებით საქართველოს ძლიერების და აყვავების ხანას, რომელიც იწყობა დავით აღმაშენებლის მეფობით.

მძიმე პირობებში მოუხდა დავით აღმაშენებელს ტახტზე ასვლა. „სამეფოს საქმეები აწეწილ-დაწეწილი იყო, ქვეყანა თურქების თარეშისაგან მოქანცული იყო, „გაოხრებული იყო ქართლი“ ისე, რომ მებატიანეს სიტყვით „თვინიერ ციხეთასა სადამე არა იყო კაცი სოფელსა შინა, არცა რა შენებულობა“. ამასთანავე „ქალაქი ტფილისი, რუსთავი, სომხითი ყოველი, სამშვილდე, აგარანი თურქთა ჰქონდეს. მხოლოდ „თრიალეთი და კლდე კარნი და მიმდგომი ქუეყანა მათი ლიპარიტს“, ეჭირა და საქართველოს „მეფეს დავითს წინაშე იყვეს რეცა ერთგულად... ამიტომ როდესაც დავით აღმაშენებელი გამეფდა, „მაშინ საზღაური სამეფოსა“ აღმოსავლეთით ნამდვილად თითქმის მარტო „მთა მცირე ლიხთა და სადგომი სამეფო წაღულისთავი“ იყო... ამას გარდა ტფილისის საამიროს თრიალეთს გარდა მთელი სამხრეთ-აღმოსავლეთი საქართველო ეპყრათ და თავისუფლად დანავარდობდნენ“. (საქართველოს ისტორია“, ი. ჯავახიშვილისა, გვ. 503—507).

მაშასადამე სწორედ ცენტრალურ ასპარეზის სტრატეგიის თვალსაზრისით უმთავრესი ნაწილი საქართველოს მეფის ხელთ არ იყო. ამასთანავე ქვეყანა აოხრებული და აწიოკებული იყო. გარდა ამისა კახეთიც სრულიად საქართველოს გარეშე იმყოფებოდა. და ამავე დროს არც ურჩი დიდგვარიანი თავადები იყვნენ დაშოშმინებულნი. მეტადრე თრიალეთის და კლდე-კარის

და მიმდგომ ქვეყანათა მფლობელი ლიპარიტი, ე. ი. გარდაბანის მეტი ნაწილის ერისთავი და იმ ნაწილისა, რომელსაც ტფილისის საამიროს დაპყრობაში დიდი როლი უნდა აესრულებინა. დავით აღმაშენებელს, როგორც სჩანს, ეს გარემოება კარგად ჰქონდა გათვალისწინებული. მის გამეფების შემდგომ არ გასულა ხუთი წელიწადი, რომ ლიპარიტი ამირამან იწყობათვე მამულ-პაპულთა კალთა სლვა, რაძეთუ ზაკვიდა წინაშე მისისა“. მაგრამ დავით აღმაშენებელი სხვა ხასიათის კაცი იყო და სტაცა ხელი ლიპარიტს და დაატყვევა. ლიპარიტმა ქედი მოიხარა და შენდობა ითხოვა. დავითმა შეინდო და გაანთავისუფლა, მხოლოდ მრავალი ფიცი ერთგულებისა ჩამოართვა ლიპარიტს. დიდი გამჭრიახობა გამოიჩინა აქ დავითმა. მას შეეძლო რა თქმა უნდა ერთხელ და სამუდამოდ მოეშორებინა თავიდან ლიპარიტი, მაგრამ იმ საქმისათვის, რომელიც უკვე განზრახული ჰქონდა, კახეთის შემოერთება, ლიპარიტისადმი მეტისმეტად მკაცრ მოპყრობას შეიძლება დიდგვარიან თავადებზე მძიმე შთაბეჭდილება მოეხდინა, რაც არა ხელსაყრელი იქნებოდა. უმჯობესი იყო ლიპარიტი გაეშვა დავითს, დარწმუნებულს, რომ იგი ფიცს უსათუოდ გასტეხდა, მაშინ კი მისი მკაცრად და აშკარად დასჯა ადვილი შესაძლებელი იქნებოდა და ვერც ვერვინ დაემდურებოდა მეფეს. სწორედ ასედაც მოხდა. ლიპარიტმა თავისი არ დაიშალა, ფიცი გასტეხა და კვლავ პყრობილ

იქმნა და ექსორიად ჰყვეს: ასე მოუგრიხეს ურჩ თავგასულს ერთისათვის ქედლი. იმ დროს სამღვდელოებასაც დიდი გავლენა და მნიშვნელობა ჰქონდა და მისი დახმარება მეტად საჭირო იყო საქართველოს გაერთიანების საქმეში. სამღვდელოებაშიაც გვარიშვილობას დიდი ადგილი ჰქონდა და, რა თქმა უნდა, იგი ყოველთვის დიდგვარიან ფეოდალებთან ერთად იქნებოდა. საჭირო იყო ამ ძალების განცალკევება. დავითმა გასაოცარის ენერგიით და სიმტკიცით ესეც მოახერხა. რუის-ურბნისის საეკლესიო კრებამ ეკლესიის მსახურთა შორის წოდებრივობა განდევნა, ბევრნი უღირსნი მღვდელ-მთავარნი, მიუხედავად იმისა, რომ დიდი გვარის შვილები იყვნენ, განდევნა და მხოლოდ პირად ღირსებაზე დაამყარა საეკლესიო თანამდებობაზე დანიშვნა. რა თქმა უნდა ახალი წესით დანიშნული საეკლესიო მსახურნი მეფის ერთგულები და მისი პოლიტიკის მომხრენი იქნებოდნენ, ჩვენ განზრახ შევეხებით გაკვრით მაინც დავით აღმაშენებლის მეფობის პირველ ხნის პოლიტიკურ მოღვაწეობას, რადგანაც ამ მოღვაწეობას დიდი მნიშვნელობა ჰქონდა დავითის მომავალ სამხედრო მოქმედებებს. ასათვის, დავითს კარგად ესმოდა, რომ ვიდრე საქართველო ჯერ შიგნიდან არ გამაგრდება, შეუძლებელია გარეშე მტრის განდევნა და მოგერიება. ბრძნული, წინ-დახედული პოლიტიკოსი იყო დავით აღმაშენებელი და ეს უეჭველად საჭიროა ქვემარჩი სარდლისათვის. პოლიტიკა ყო-

ველთვის ნიადაგს უმზადებს სტრატეგიას და ბევრჯელ სამხედრო მოქმედების ღირსება-ნაკლულეევანება და ომის შედეგი იმაზედაა დამოკიდებული, რამდენად გვარიანად მოუმზადებს პოლიტიკა ნიადაგს სტრატეგიას. შეიძლება გამოჩენილი პოლიტიკოსი როგორც სარდალი არაფრად აღირღეს, მაგრამ დიდი გამოჩენილი სარდალი უსათუოდ ბრძნული წინდახედული პოლიტიკოსიც უნდა იყოს.

დავით აღმაშენებელმა მტკიცედ მოუარა შინაურ საქმეებს. ლიპარიტის განდევნამ კარგად აგრძნობინა დიდ გვარიან თავადებს, თუ რა პიროვნებასთან აქვთ საქმე. სამღვდელოება რადიკალური ზომის წყალობით მიიმხრო და ახლა შეეძლო სამეთოს გაერთიანების საქმეს შესდგომოდა. რითი დაეწყო ეს საქმე? ტფილისის საამიროს და მის სანახეების დაპყობით? ეს ხომ უახლოესი მიზანი და მასთან უსაქიროესი იყო? მაჰმადიანები დაუძღურდნენ თანდათან. ევროპამ ჯვაროსნობის ომები იწყო. ამავე დროს სპარსეთის სელჯუკიანთა თურქებშიაც არეულობა დაიწყო. პირველ შეხედვით თითქოს ცხადია, რომ სწორედ ამით უნდა ესარგებლა და ტფილისის საამიროს დასცემოდა. მაგრამ სწორედ აქ გამოიჩინა დავითმა დიდი სტრატეგის ნიჭი და შორს-მკვრეტელობა. მას კარგად ესმოდა, რომ მისი წადილი საქართველოს გაერთიანებისა, კახეთის მეფისათვის და იქაურ მთავრობისათვის საამო და სასურველი არ იყო და კახეთი ყოველთვის ისარგებლებდა შემ-

თხვევით რათა ამ საქმისათვის ხელი შეეშალა და თუ კი დავითი დაეცემოდა ტფილისის საამიროს, მოსალოდნელი იყო, რომ კახეთის მეფე გულხელდაკრეფილი არ დაშთებოდა, ან პირდაპირ დაეხმარებოდა ამირას და დავითის ჯარს ზურგით დაეცემოდა, ან და გადალახავდა არაგვს და ქართლს შეესეოდა და ამით აგრედვე განსაცდელში ჩააგდებდა დავითის ჯარს. გარდა ამისა, ტფილისის ამირაზე დაცემა უსათუოდ რანის და შირვანის გამოლაშქრებას გამოიწვევდა. საჭირო იყო ყველა ამის თავიდან აცდენა, საჭირო იყო ტფილისის საამიროს წინააღმდეგი ოპერაციის მოწყობა და მომზადება, რომ მართლაც იგი სრულის და საბოლოო გამარჯვებით დაგვირგვინებულყო. სწორედ ამიტომ დავითმა ნიშანში ჯერ კახეთი ამოიღო. მართალია, მან წინასწარ თანდათანობით ალაგმა და შეზღუდა თურქთა თარეში სომხეთის მთიდან მტკვრის ნაპირებისაკენ. მაგრამ პირველი ნამდვილი ოპერაცია კახეთი-აკენ იყო მიმართული. უკვე აქ უახლოეს მიზნის დასახვაში გამოსჭვივის წინდახედული სტრატეგია.

დავით აღმაშენებელმა შემოიერთა კახეთი და ჰერეთი და ამას მოჰყვა ახლა ბრძოლა რანის მპყრობელთან, როელიც, რა თქმა უნდა, ვერ შეურიგებოდა კახეთის დაპყრობას. მისთვის ეფრო სასურველი და ხელსაყრელი ეზობელი იყო სუსტი კახეთი „ცუნდ-იუკ“ „და ყოვლად უმეცარ მეფე აღაოთანით, ვიფრე ძლიერი გაერთიანებული საქართველო და მერმე ისეთი

მეფის ხელში, როგორც დავით. იყო. მიუხედავად იმისა, რომ „დავითის წინააღმდეგ ყოფილან „სულთანისა იგი სპანი ურიცხუნი, ათაბეგი განძისა და... კახთა ქვეყანისა ერთი მტერთავეთანა გარემოდგომილი“, მაგრამ... ოაეთი. მაინც ძლევა-მოსილი გამოვიდა („ქართ. ერის ისტორია“ ი. ჯავახიშვილი) როგორც მოსალოდნელი იყო განძის მფლობელი დაეხმარა კახეთს, მაგრამ ძლეულ იქმნა და დავითმა კახეთი და ჰერეთი საბოლოოდ შემოიერთა. ამ რიგად იგი სამი მხრით შემოერთა ტფილისის საამიროს და სამი მხრით ხელს ველარავინ. შეუშლიდა: კახეთი დაპყრობილი იყო, განძის მფლობელი საგრძნობლად დამარცხებული და ლიპარიტი განდევნილი. დარჩა ღია მხოლოდ ტფილისის საამიროს სამხრეთი ნაწილი და ამის ჩაკეტისათვის და საამიროს ამ რიგად სრული გარემოცვისათვის საჭირო იყო სამშვილდს ხელში ჩაგდება. ეს უკანასკნელი საქმე ფარულად და სწრაფად უნდა მომხდარიყო, რათა ამირას ვერ მოესწრო ზომების მიღება და სამხრეთიდან მაშველი ჯარის გამოძახება. აქ დავით აღმაშენებელმა ხერხს მომართა, რომელსაც შემდეგში არა ერთხელ მიმართამდა ხოლმე. თვითონ აფხაზეთს წავიდა და თურქები დარწმუნებული, რომ მეფე შორს არის, არხეინად იყვნენ და არას მოელოდნენ. და სწორედ ამ დროს თრიალეთის და კლდეკარის ერისთავი, რა თქმა უნდა, მეფე დავითის დარიგებით, მოულოდნელად და სამშვილდეს და დაიპყრა იგი. ამას მოჰყვა სომხეთის

ციხეების დაპყრობაც, მაშასადამე მთელი გარდაბანი, ქართლის უმნიშვნელოვანესი ნაწილი დაპყრობილ იქმნა დავითის მიერ და თვით ტფილისი ყოველ მხრივ გარშემორტყმული. აღნიშნული ხერხი, რომელსაც მიმართა დავითმა და რომლისათვისაც შემდეგში არა ერთხელ მიუმართავს, მართო უბრალო ხრიკი არ იყო, მტრის მართო უბრალო მოტყუებათ არ ჩაითვლება. მას საფუძვლად უფრო ღრმა სტრატეგიული მოსაზრება ედვა: მეფე თვითონ აფხაზეთს გადავიდოდა და ქართლში კი ჯარის შეგროვებას უბრძანებდა. რა თქმა უნდა, აფხაზეთშიაც იმავე ღროს გროვდებოდა ჯარი. დავითი იცდიდა, როდესაც გამოირკვეოდა თუ საითკენ მოდის მტერი, რაგზით და მიმართულებით და რა მხრითაც უფრო ხელსაყრელი იქნება მტერზედ თავდასხმა, სწრაფად გაეშურებოდა აფხაზეთში მოგროვილ ჯარითურთ და სწორედ მტერს სუსტი მხრით დაეცემოდა სრულიად მოულოდნელად. და ასეთი მოულოდნელი თავდასხმა, მერე სწორედ იმ მხრით, საიდანაც უფრო საშიში იყო რა თქმა უნდა, მტერს თავზარს სცემდა და დიდს ეფექტს ახდენდა.

უკვე დავითის პირველ ოპერაციებში ცხადად ვამჩნევთ თანდათანობას, ერთგვარ მეთოდს, ღრმა მოფიქრებას. მოქმედება შეესაბამება გარემოებას. გათვალისწინებული აქვს სახელოვან სარდალს მოპირდაპირის ფსიხიკა. მიზნად ყოველთვის დავითს დასახული აქვს უახლოესი საგანი. ერთსა და იმავე

დროს რამდენიმე საგანს არ ებლაუქება. გეგმა მარტივია, მაგრამ რაკი აღსრულებას შეუდგება, იგი არ აყოვნებს, სწრაფად და დიდის ენერგიით ყოველთვის მოქმედობს. ყოველთვის ცდილობს დაასწროს მტერს და სრულიად მოულოდნელად დაეცეს. ეს ჭეშმარიტი და მაღალი ხარისხის სტრატეგია არის. მართალია, ეს ოპერაციები მხოლოდ მოსამზადებელი ოპერაციები იყო მომავალ ფართე სამხედრო მოქმედებისათვის, მაგრამ უკვე ამ მომზადებაში სჩანს სისტემა და ცხადად გამოსქვივის დიდი სტრატეგიული ნიჭი.

დავითის შემდეგ მოქმედებაში ეს უფრო ნათლად გამოჩნდება.

ჩვენ დავით აღმაშენებლის ყოველი ლაშქრობის დაწვრილებითი განხილვას ვერ შევუდგებით, მხოლოდ ჩამოვთვლით გაკვრით იმ ოპერაციებს, რომელნიც მოსამზადებელ ოპერაციებად უნდა ჩაითვალოს.

თურქები ვერ შეურიგდებოდნენ სამშვილდის დაკარგვას, ვერ შეურიგდებოდნენ აგრედვე იმას, რომ დავითმა საშუალება მოუსპო ზამთრობით მტკვრისა და ივრის ველებში დაშეებულიყვნენ და აქ დაეზამთრად. დიდის ძალებით წამოვიდნენ თურქები გარდაბანში. მემატიანეს სიტყვით მათი ჯარის რიცხვი უდრიდა 100,000. საზოგადოდ ამ ციფრებს ფრთხილად უნდა მოვეპყრათ. ძნელი წარმოსადგენია იმ დროინდელ პირობებში ასეთი დიდი ძალების მოძრაობა და ბრძოლა, მაგრამ ყოველ შემთხვევაში საკ-

მაოდ დიდი ძალებით უნდა წამოსულიყვნენ. უკვე ჩვეულნი თურქნი ფრობილად და უჩუმრად მოდიოდნენ და თრიალეთს მიადგნენ. მეფე დავითი ამ დროს ნაქარმაგევში იყო (გორის მახლობლად). რა წამს თურქების შემოსევა გაიგო, სწრაფად დაიძრა იმ ჯარით, რაც იმ დროს ხელთ ჰყავდა და გასაოცარის სისწრაფით გადმოლახა მტკვარი და თრიალეთის მთები და სრულიად მოულოდნელად დაეცა თურქების მარცხენა წვერს და საშინლად დაამარცხა. ამის შემდგომ ჰყონდიდელმა დაიპყრო ციხე რუსთავი, მაშასადამე ტფილისის საამიროს სამხრეთ-აღმოსავლეთისაკენაც გზა შეუქრა.

ამ რიგად ტფილისის საამიროს თან და თან სამხრეთით და სამხრეთ-აღმოსავლეთითაც გზები არამც თუ ეკარგებოდა, არამედ თვით თურქებსაც საშუალება აღარა ჰქონდათ საამიროს სამხრეთ-აღმოსავლეთის მხრით მიშველებოდნენ. მაგრამ დავითი თითქოს კიდევ რაღაცას უცდის, საამიროს წინააღმდეგ ოპერაციას აყოვნებს. დავითს კარგად ესმოდა, რომ საამირო ხელიდან ვერ წაუვიდოდა, მაგრამ გამაგრებულ ტფილისის აღებას მაინც კარგა ხანი დასჭირდებოდა და ამ ხნის განმავლობაში ან შირვანის ხანი მოეშველებოდა ან და თურქები საქართველოს სხვა მხრით, მაგალითად სამხრეთ-დასავლეთის მიმართულებით შემოესეოდნენ. საქირო იყო ჯერ ამ ორივე მხრით უზრუნველყოფა და მერმე ტფილისის ამირას ადვილად გა-

უსწორდებოდა. თავის-თავად ცხადია რაოდენად დიდი მნიშვნელობა ჰქონდა საქართველოს დედა ქალაქის, ტფილისის, განთავისუფლებას, შემოერთებას და გარემოებაც პირველ შეხედვით ისეთი იყო, რომ თითქმის მეტად ადვილად მოხერხდებოდა ეს საქმე. სხვა, დავითზე ნაკლებ შორს მკვრეტი, სარდალი რომ ყოფილიყო, შესაძლებელია ტფილისის ხელში ჩაგდების სურვილს ისე გაეტაცნა, რომ მთელის თავის ძალით დასცემოდა დედა ქალაქს და ვინ იცის მთელი აქნობამდისინ გაკეთებული საქმე ჩაფუშულიყო და კვლავ სამშვილდე და მთელი გარდაბანი ისევ მტრის ხელში ჩავარდნილიყო. ფრთხილად და დინჯად იქცეოდა დავითი და ყოველ მხრით ამზადებდა იმ ოპერაციას, რომელსაც უნდა დაეგვირგვინებინა ესოდენი მისი შრომა და ღვაწლი.

საქირო იყო დავითისათვის თურქების ზრახვის გამოაშკარავება და მან კვლავ ნაცად ხერხს მიმართა, გადვიდა ზამთრობით აფხაზეთს. ეტყობა, იგი თურქთა ლაშქარს მოელოდა და ამიტომ უბრძანა ქართლელთა და მესხთ ჯარი მზად ჰყოლოდათ. დავითის ექვი გამართლდა და თურქები ბასიანით და ტაოთი შემოესივნენ საქართველოს. დავითისათვის უკვე ცხადი იყო როგორ უნდა მოქცეულიყო. როგორცა სჩანს, თურქები ქოროხის ველით უნდა წამოსულიყვნენ. დავითი უბრძანებს ქართლელების და მესხეთის ჯარს, დაუხვდნენ თურქებს კლარჯეთში, ე. ი. პირის-პირ შეებნენ. ჩვენ თუ მოვიგო-

ნებთ ამ ასპარეზის თვისებებს, სადაც მტერს წინ დაუხვდებოდნენ კლარჯეთის მთები, შემდეგ იმერხევი და მერმე შავშეთის მთები, მივხვდებით, რომ ამ ბუნებრივ სიმაგრეთა წყალობით ქართლელებს და მესხებს შეეძლოთ ხანგრძლივი წინააღმდეგობა გაეწიათ. მტერი დასავლეთისაკენ ვერ მიტრიალდებოდა და ცენტრალურ ასპარეზს ვერ შეესეოდა, რადგანაც ქართველები მას ზურგით დაეცემოდნენ, მაშასადამე ქართლისაკენ მიმავალი გზები უზრუნველ-ყოფილნი იყვნენ. მაგრამ მარტო მტრის შეჩერება დავითისათვის ცოტა იყო, საჭირო იყო მისი დამარცხება და განდევნა. დავითმა გაბედულ და იმ დროისთვის თითქმის უცნობ მანევრს მიჰმართა. ეს იყო შორით მტრის შემოვლა, სტრატეგიული შემოვლა და საკვები გზის გადაჭრა. ასეთს საშუალებას ჩვეულებრივ მიმართავს ხოლმე ის, ვისაც მტერზედ ბევრით მეტი ჯარი ჰყავს. დავითს კი პირიქიდ თურქებთან შედარებით ბევრად ნაკლები ჯარი ჰყავდა. მაგრამ მაგარიც ის არის, რომ დავითს გარემოება კარგად გამოცნობილი და აწონილ-დაწონილი ჰქონდა. იგი კარგად იცნობდა ბრძოლის ველის ბუნებრივ თვისებებს. მან იცოდა რომ კლარჯეთ-შავშეთის მთაგორიან და ხევიან ადგილებში თურქები საბრძოლველად დიდს ძალებს ვერ გაშლიდნენ და ქართლელების და მესხების ჯარი მიუხედავად თავისი მცირე რიცხოვნებისა მათ გაუმკლავდებოდა. მან კარგად იცოდა ფსიხიკა

მტრისა, რომელსაც მოულოდნელი შემოვლა უსათუოდ თავზარს დასცემდა, მით უმეტეს როდესაც ეს შემოვლა საკვები გზის გადაჭრას უქადიდა. საჭირო იყო მხოლოდ სწრაფი მოქმედება და დავითი სწორედ ასე მოიქცა. მან თავისი დანარჩენი ჯარით სწრაფად გადალახა კოროხის პირი და ხუფათით წამოვიდა კოროხის მარცხენა ნაპირით. ჯარის მარცხენა წვერს კოროხი ჰფარავდა, მარჯვენას კი მაღალი მთების ქედი. შეუმჩნეველად და თურქებისათვის უცნობლად შემოუარა დავითის ჯარმა მათ მარცხენა წვერს და ქართლელების და მესხების ჯართან ერთად ორის მხრით დაეცა და გაანადგურა მტერი. რადგანაც მემამულეები სიტყვით ქართველებს აუარებელი ტყვე და ნადავლი ჩაუვარდათ ხელთ, უნდა ვიფიქროთ, რომ დავითმა მოასწრო მტრის საკვები გზის გადაჭრა. აღსანიშნავია, რომ დავითმა არამთუ შეასრულა ასეთი გაბედული მანევრი, არამედ ისეთის ზედმიწევნით გამოიანგარიშა და მოაწყო ჯარების მოძრაობა, რომ საჭირო დროს, საჭირო ადგილზე ჯარის ორი ნაწილი ერთი მეორეს შორი მანძილით დაშორებული შეაერთა და მტერს საერთო ძალით ეკვეთა. ნუ დაგვავიწყდება, რომ დღესაც კი, როდესაც სარდლებისათვის მზადაა ტელეგრაფი, ტელეფონი და ჰაერობლანები, იშვიათად თუ ხერხდება ჯარის ნაწილების ასეთი შეთანხმებული მოქმედება. ნუ დაგვავიწყდება, რომ თანამედროვე სტრატეგიის დებულება: „ცალცალკე სვლა

და ერთად დაკვრა“, მხოლოდ მეცხრამეტე საუკუნის დამლევს პირველად გამოსთქვა დიდმა მოლტკემ. მართალია მტრის წვერის ბრძოლის ველზე შემოვლა უძველეს დროშიაც იყო მიღებული, მაგრამ მხოლოდ ბრძოლის ველზე, ე. ი. ტაქტიური შემოვლა. მაგრამ შორით შემოვლა, მთელის ასპარეზით, ე. ი. სტრატეგიული შემოვლა, ახალი სტრატეგიის ხილია.

რა გასაკვირველია რომ ბრწყინვალე ოპერაცია ბრწყინვალე გამარჯვებით დაგვირგვინდა, ე. ი. მტრის განადგურებით. თუ სტრატეგიის მთავარი დებულებაა მოქმედება გარემოების მიხედვით და თუ სწორეთ გარემოების კამოცნობაში და მის დაფასებაში აჩენს თავს სარდლის ნიჭი, უნდა კალიაროთ, დავითმა ბრწყინვალედ, ავსებით დაიცვა ეს დებულება და სის მოქმედებაში ცხადად გამოსქვივის ენიოსი სარდლის ნიჭი.

მართალია ტაო-ბასიანიდან თურქები ანდევნილ იქმნენ, მაგრამ მაინც ეს აზღვარი საკმაოდ უზრუნველყოფილი რ იყო და ყოველთვის შემოსევა მოალოდნელი იქნებოდა. მით უმეტეს, რომ ბიზანტიაც მახლობლად ყო და იმისაც შეეძლო საქარველოსაკენ გამოლაშქრება. ბიზანტია ა თურქები ერთმანეთს მტრობდნენ ა დაგითვისთვის ხელსაყრელი იქნებოდა ან ერთთან ან მეორესთან დახლოვება. თურქებთან ახლო მომალში ბრძოლა მოელოდა, ამიტომ დავითმა ბიზანტია არჩია და პოლიტიკას მიმართა. თავისი ერთი ასული

საბერძნეთის მეფის რძლად „გაგზავ-
 ნა.“ (ი. ჯავახიშვილი. „ქართ. ერის
 ისტორია“ გვ. 513) არც შორეული
 აღმოსავლეთით მოსაზღვრე შირვანი
 ავიწყდებოდა დავითს. მეორე თავისი
 ასული შირვანშაჰს მიათხოვა (იქვე).
 ალბად ამ უკანასკნელმა დამოყვრებამ
 დავითს გააბედვინა და საშუალება
 მისცა აღმოსავლეთის ასპარეზი უფრო
 გაეთართოვებინა და გაემაგრებინა,
 დავითმა აიღო ციხე გიში (ეხლანდელ
 ნუხთან) და თვით შირვანში ციხე ქა-
 ლადორი. აღმოსავლეთით ზურგ გამაგ-
 რებული დავითი უბრუნდება უმთავ-
 რეს სამხრეთ-აღმოსავლეთის საზღვარს.
 მას გარდაბანის საბოლოო გამაგრება
 სწადია. იგი შორს რახსის პირამდე
 ილაშქრებს, დაამარცხებს თურქებს,
 იმავე დროს აღიღო მან ციხე ლორი
 და ამრიგად ზემოდ აღნიშნულ სამ-
 კუთხედის, კარი-ანისი-ლორი, ნაწილი
 უკვე მის ხელში გადავიდა.

ალბად ამ სიშორეზე გალაშქრებამ
 მეფე დაარწმუნა, რომ იმ გრანდიოზუ-
 ლი გეგმის აღსრულებისათვის, რომე-
 ლიც მას დასახული ჰქონდა, ე. ი. სა-
 ქართველოს საბოლოო გაერთიანებისა-
 თვის, მისი საესებით განწმენდისა-
 თვის და საზღვრების აქტიური
 დაცვისათვის უფრო მეტი ძალა
 და საშუალებანი არის საჭირო,
 ვიდრე იმ დროს დავითს ხელთ
 მოეპოვებოდა. დავითი შეუდგე-
 ბა თავის სამხედრო ძალების ძირითად
 რეფორმის განხორციელებას. დავითის
 ეს რეფორმა მეტად მნიშვნელოვანია და
 საჭიროა უფრო ვრცლად შევეხოთ მას.

მემატიანე გვიამბობს: „ჭხედვიდა მეფე დავით ესე-ოდენთა ზეგარდმოთა ღეთისა მიერ წყალობათა, შეწევნათა, ძლევათა და გამარჯვებათა თვისთა, და რომელთა ღმერთი მოსცემდა სამეფოთა ქვეყანათა, ქალაქთა და ციხეთა, რამეთუ არა იყო ესე-ოდენი სიმრავლე ლაშქართა სამეფოსა შინა მისსა, რათამცა ქალაქთა და ციხეთა შინა მდგომად და დამჭირველად, და კვალად თვის-თანა მყოფელად, და მოლაშქრედმცა კმა იყვნეს დაუცხრომელად, და სამარადისოსა მისსა მიმოსვლასა ზამთარ და ზაფხულ განაღდა სადამე ლაშქრობასა.“ დავითმა განიზრახა მუდმივი ჯარის დაარსება. მაგრამ სწორედ ზემოდ მოყვანილ მოსაზრების მიზეზით ამ მუდმივ ჯარს მარტო ქართველებით ვერ შეავსებდა.

იმ დროინდელი ჯარი შესდგებოდა დიდგვარიან თავადიშვილების ყმებისაგან და მართალია დავითმა ცოტა არ იყოს დააწყენარა და დააშინა თავგასული თავადები, მაგრამ ყოველთვის მოსალოდნელი იყო, რომ მათში კვლავ ორგულობა და ურჩობა იჩინდა თავს და საჭირო დროს მეფეს საჭირო დახმარებას ჯარის მოკრებაში არ აღმოუჩინდნენ. გარდა ამისა, მართალია გაოხრებული ქვეყანა თანდათან მოშენდა და გამოკეთდა, მაგრამ ამ მხრივ კიდევ ბევრი გასაკეთებელი იყო. დავითის საქმე კი მუდმივ ლაშქრობას და ციხე-საზღვრების დარაჯობას მოითხოვდა. გარდა ამისა დავითი გამოცდილებამ დაარწმუნა, რომ სამხედრო საქმეში ჯარის რიცხვს იმდე-

ნი მნიშვნელობა არა აქვს, მეტადრე თურქებთან ბრძოლაში, რამდენიც სწრაფ მოქმედებას, ჯარის გაწვრთნას და გამოცდილებას. მაშასადამე ჯარის მოგროვებისათვის დიდი სისწრაფე იყო საჭირო, ჯარის ჩქარი მოქმედება და ჯარის მუდამ მზად ყოლა. ადგილობრივი მცხოვრებნი, რომელნიც ერთსა და იმავე დროს ქვეყნის მოშენება-გამოკეთების ზრუნვაში ყოფილიყვნენ და მასთანვე ერთად მუდამ იარაღში ჩასხმულნი მტრის დახვედრის მზადებაში, რა თქმა უნდა ვერც ერთს და ვერც მეორე საქმეს კარგად და წესიერად ვერ შეასრულებდნენ.

უბრალო დაქირავება ჯამაგირით ჯარის-კაცებისა არ იყო სასურველი. განათლებულს და მწიგნობარს მეფე დავითს კარგად ეცოდინებოდა რას წარმოადგენს და რა საშიშია სახელმწიფოსათვის ასეთი დაქირავებული მეომარნი. მას ეცოდინებოდა რას წარმოადგენდნენ რომის და ბიზანტიის დაქირავებული პრეტორიანელნი. დაჭითმა გასაოცარის დაკვირვებით და ღრმა მოსაზრებით მოუარა საკითხს და აქაც დიდი სარდლის და დიდი პოლიტიკოსის ნიჭი გამოიჩინა.

საშუალო საუკუნოებში დასავლეთ ევროპაშიაც შეზოილეს მუდმივი ჯარი, მაგრამ ჯერ ერთი ეს ბევრით უფრო გვიან მოხდა, ვიდრე საქართველოში და მეორეც—ეს პირდაპირ დაქირავებული ჯარის კაცები იყვნენ, ვიგინდარა მაწანწალები, ყოველგვარ ზნეობრივ ღირსებას მოკლებულნი. ასეთი ჯარი პირდაპირ ღვთის რისხვა იყო საზოგადოებისა-

თვის. მაშინდელი ჯარის კაცები ოქროზე ჰყიდნენ თავის სისხლს და სიცოცხლეს და როგორც პროფესიონალები, თავის ხელობით ვაჭრობდნენ. სადაც მეტს მისცემდნენ, იქ მიდიოდნენ. მთავრები და მეფეები ხშირად ჰქირაობდნენ ამგვარ ჯარს მხოლოდ თავისი პირადი, კერძო ინტერესების დაცვისათვის.

სულ სხვა მოსაზრებას და სულ სხვა იდეას ვხედავთ დავით აღმაშენებელის რეფორმაში.—იგი მიდის ყივჩაღთა სამეფოში და იქიდან, გადმოასახლებს ოჯახობრივ, რამდენიმე ათასს მეომრებს საქართველოში. აქ მათ დაასახლებს, მიუჩინს მიწა-წყალს და სამეფოს მკვიდრთ შეუერთებს, თავისივე ერს შეადულებს. აღსანიშნავია ზოგიერთი წერილმანი ამ საქმეში. დავითი მარტო არ მიდის ყივჩაღთა სამეფოში, მას თან მისდევენ სამხედრო საქმის სპეციალისტები, მწიგნობართ უხუცესი და ამირსპასალარი და მათთან ერთად ყივჩაღთა შორის არჩევს გამოსადეგ და შესაფერ მეომრებს. დაწვრილებითი მოთხრობას აქ ვერ შეუდგებით, ვისაც ეს აინტერესებს, მიუთითებთ „ქართლის ცხოვრებაზე“ და ი. ჯავახიშვილის „ქართველ ერის ისტორიაზე“. ჩვენთვის მხოლოდ თვით რეფორმის დაფასება და მისი მნიშვნელობა მომავალ სამხედრო მოქმედებისათვისაა ამ ეამად საინტერესო.

მართალია დავითმა ცოტა არ იყოს დიდგვარიანი თავადები დააწყენარა და დააშინა, მაგრამ მას კარგად ესმოდა, რომ სამუდამოდ ამ საშინელი სენის

აღმოთხვრა მოკლე დროში შეუძლებელი იყო. მას კარგად ესმოდა, რომ პირველსავე ხელსაყრელ შემთხვევაში; კვლავ იჩენდა თავს ურჩობა, შური და მოსალოდნელი იქნებოდა დალატიც კი. მეფე შორს გალაშქრებას და ფართო ოპერაციებს აპირებდა და ამისათვის კი ჯარის ერთსულოვნობა, ჯარის სწრაფი მოკრება, შორს წასვლის დროს, როგორც შინ აგრედვე მეტადრე საზღვრის ციხეებში საქირო იყო უაღრესად ერთგულ ჯარის და სანდო უფროსების დატოვება. საქართველო დიდი ხნის შეერთებული არ იყო, ზოგიერთ ერისთავებს ჯერ კიდევ ახსოვდათ მათი მამაპაპების თავისუფალი თარეში და დამოუკიდებლობა. ყოველივე ამის მიზეზით დავითი თავს უზრუნველად ვერ სცნობდა. ერისთავები ჰკრებდნენ და აგროვებდნენ თავის საერისთავოში ჯარს და ხშირად ომის ბედი იმაზე იყო დამოკიდებული, თუ ამ ჯარის მოგროვება დროზე და წესიერად ხდებოდა. ამ შემთხვევაში კი დავითს საკმაო გარანტია არა ჰქონდა, გარდა ამისა დავითი ისეთს ფართო სამხედრო მოქმედებას აწარმოებდა, რომ ჯარი თითქმის მუდამ იარალის ქვეშ უნდა ყოფილიყო, ეს კი მცხოვრებთ მძიმე ტვირთად ედებოდა. ყველა ამან აიძულა დავითი ისეთი - რადიკალური ზომისათვის მიემართა, როგორც ყივჩაღთა გადმოსახლება და მუდმივი ჯარის შექმნა. ცხადია ეს გადმოსახლებული ყივჩაღნი მეფის ერთგულნი და მისი ყოველი განკარგულების აღმსრულებელნი იქნებოდნენ. მათ არავითარი ინტერესი

არა ჰქონდათ ამათუ იმ ერისთავის მხარი დაეჭირათ, და მეფისადმი ურჩობა გაეწიათ. ვერც ბრძოლის პირზე უღალატებდნენ მეფეს გადმოსახლებული ყივჩაღნი: მათი ოჯახობა და მახლობელნი შინ, საქართველოში, მეფეს მძევლად ჰყავდნენ. იგივე ყივჩაღნი მთელი ოჯახობით გადმოსახლებულნი შეეგუენ და შეურთდნენ ახალს სამშობლოს, მისი ინტერესებით განიმსჯავლენ და მისდამი მამულიშვილური გრძნობაც უსათუოდ დაიბადებოდა მათში. თუ ეს ყივჩაღნი აგრედ წოდებულ „ჰეჩენგთა“ შთამომავლნი არიან, უნდა ვსთქვათ, რომ იგინი ბუნებრივი მეომარნი იყვნენ. გულადი, კარგი ცხენოსანი, სწრაფი და მარდი მოქმედებაში, იარაღის ხმარებას ჩვეული. ასე რომ ამ გვარი ხალხის გადმოსახლებით დავითმა მზამზარეული გაწრვთნილი მუდმივი ჯარიც გაიჩინა და თავის პოლიტიკასაც კარგი იარაღი შესძინა.

„ამოდენა უცხო ტომის ხალხის ჩათესლება საქართველოში დიალაც რომ გაბედული საშუალება იყო, მაგრამ ამასთანავე „სამეფოთა გონებითა“ ნააზრევი, „სივრცითა გონებისათა“ განზრახული, მეტად ბრძნული და გმირული საშუალება გახლდათ! ქართველობისათვის 225000 სულის შეძენა იმ დროს, როდესაც იგი დიდ ბუნებოვან სარდლისა და მეფის წინამძღოლობით შეუჩერებლივ წინ მიისწრაფოდა და იზრდებოდა, დიალაც რომ დიდ შემატებად ჩაითვლებოდა. ქართველთა კულტურა მაშინ იმდენად ძლიერი იყო, რომ ამოდენა უცხო თესლის

ერთბაშაღწ ჩასახლებაც ეროვნულს საფრთხეს არ წარმოადგენდა“... (ი. ჯავახიშვილი „ქარ. ერ. ის. გვ 535) ნუ დაგვაფიწყდება, რომ მტრის მრავალმა შემოსევამ ბევრი მცხოვრები გაწყვიტა და მოსახლეობა ბევრგან მოსპო. მემართიანეს სიტყვით დავითის გამეფების დროს გორსა და ტფილისს შუა მთელი მხარე გაოხრებულ იქმნა იმდენად, რომ მხოლოდ მხეცთა და ნადირთა სანავარდო ასპარეზს წარმოადგენდა. ამ გვარ პირობებში ახალი თესლის ჩამოსახლება რა თქმა უნდა სამეფოსათვის ნამდვილი შემატება და სახეირო საქმე იქნებოდა.

უნებლიედ მსოფლიოს გენიოსი სტრატეგის ჰანიბალის ასეთივე ზომა გვაგონდება. ჰანიბალი ძველი კართაგენის გამოჩენილი მხედართ მთავარი იყო. კართაგენს რომთან მეორედ ომი ჰქონდა. იგინი ერთი მეორეს მსოფლიო ბატონობაში ეცილებოდნენ. ჰანიბალმა განიზრახა კართაგენიდან, ე. ი. ჩრდილოეთ აფრიკიდან რომში გალაშქრება. იგი უნდა გადასულიყო იბერიაში (ეხლანდელი ესპანია) და აქედან ხმელეთით აღმოსავლეთისაკენ წასულიყო, გადაელახა ალპის მთები და შესეოდა რომის ტერიტორიას. შორი და მძიმე გზა მოელოდა ჰანიბალს და ამასთანავე შიშობდა, რომ როდესაც იგი შორს გასცილდებოდა სამშობლოს, აქ მისი მოქიშპე დიდგვარიანი მოხელენი ხალხს ააჯანყებდნენ და მას საშინელ მდგომარეობაში ჩააგდებდნენ. არც ახლად დაპყრობილ ესპანელების იმედი ჰქონდა. ამიტომ

ჰანიბალმა ასეთ ზომას მიმართა. ესპანიაში ჯარი მოკრიბა და ოჯახებითურთ კართაგენში გადაასახლა და კართაგენში მოგროვილი ჯარი აგრედვე ოჯახებითურთ ესპანიაში გადაასახლა. ამის შემდეგ უზრუნველად დადგა შორს გზას, დარწმუნებული, რომ როგორც მის სამშობლო კართაგენში, აგრედვე ახლად დაპყრობილ ესპანიაში მისი ინტერესები მედგრად იქნება დაცული. რომელი ისტორიკოსები აღტაცებულნი იყვნენ ჰანიბალის ასეთი ჰენიოსური საქციელით და ნუ თუ ნაკლები გენიოსობა სჩანს დავით აღმაშენებელის რეფორმაში, რომელსაც ბევრით მეტი სახელმწიფოებრივი სარგებლობა და ქვეყნის ინტერესი უდევს სარჩულად?

მუდმივ ჯარით უზრუნველყოფილს დავითს თამამად შეეძლო ფართო სამხედრო მოქმედებას შესდგომოდა და შეუდგა კიდევ.

საჭიროა წინასწარ მაშინდელი ჯარის საომარ წყობილების და ბრძოლის წესის გახსენება. ზოგიერთ ცნობებს ამის შესახებ მკითხველი ჰპოვებს ვახუშტის გეოგრაფიაში (მოსე ჯანაშვილის რედაქცია 1904 წ.), „ქართლის ცხოვრებაში“ და ი. ჯავახიშვილის „ქართ. ერის ისტორიაში“. გარდა ამისა „ივერიაში“ დასტამბული იყო და მეორედ „სახალხო ფურცელში“ დაისტამბა თათარხან დადეშქელიანის წერილი „მოკლე განხილვა საქართველოს მხედრობისა“.

ვახუშტი სწერს: „ხოლო ლაშქართა წესნი აქუნდათ: მეფეთა ჰყვა როქითა

(ჯამაგირით), რაოდენი ძალედვა, სპანი მცველად თვისად, ვითარცა იტყვის მირიანისასა და აღმაშენებლისასა და ათასსა მარადის მცველად მისად. და დავითთასა არღარა განიყოფოდა სა-ქურჭლე სპათა ზედა, და პატრვი ამათი იყო სხვა. ხოლო სხვანი სპანი იყუნენ ქვეყანათაგან და ერისთავთა ქვეშე დაწესებულნი, რომელთა მოუწოდნიან ჟამად.“

მაშასადამე დავითს 60 ათასი მუდმივი ჯარი ჰყავდა და გარდა ამისა საერისთავოების ჯარები, რომელთაც ჰკრებდნენ საჭიროებისამებრ. იგივე ვახუშტი გვამცნობს: „ხოლო წესთა ამათთა იყო ყოველი ივერია ანუ გიორგია, ოთხ სადროშოთ განყოფილი. რამეთუ წინა-მბრძოლნი იყუნენ თორელნი, ციხის ჯვარელნი და ახალციხელნი, და მიმყოლნი მათნი სულიად მესხნი და კლარჯნი და სომხითისა, რომელნი ეპყრათ; ხოლო შემპრჯუნე მიმსვლელ-მცემელნი სრულიად ლიხთიქითი აფხაზ-ჯიქითურთ; მემარცხნეთ მიმსვლელ-მცემელნი სულიად ჰერკახნი; ხოლო მეფისა აღმის მპყრობელნი ქართველნი და რომელნი როქით სპანი ეპყრნეს მეფესა. გარნა ოდესმე სამად მიმსვლელად ანუ სხვა-რიგ მიიყვანდნიან, ვითარ ამჯობინის მეფე ანუ სპასალარი“.

ამ აღწერილობიდან ჩვენთვის ნათელი და ცხადია იმ დროინდელ ქართველ ჯარის საომარი წესი და წყობილება. თათარყან დადემქელიანს ჰგონია, რომ ეს წესი ბიზანტიელებისაგან არის გადმოღებული, მაგრამ ეს შემც-

დარი აზრია. აქ უფრო არაბთა გავლენა სჩანს, მაგრამ არაბული წყობილება იმდენად არის შეცვლილი, შესწორებული და გაუმჯობესებული, რომ თამამად შეგვიძლიან ეს გასაოცარი იმ დროისთვის ჯარის დალაგების წესი ქართულ სამხედრო ხელოვნებას მივაწეროთ. იმ დროინდელ ბიზანტიის და აგრედვე დასავლეთ ევროპის რაინდების ტაქტიკა დაფუძნებული იყო მასიურ შეხლა-შეტაკებაზე. მართალია ჯარის წყება რამდენიმე ნაწილად, რამდენიმე მწკრივებად იყო დაყოფილი, მაგრამ ერთი ნაწილი ბრძოლის დროს მოსდევდა მეორის, ერთი მეორეს „დაკვრას“ აძლიერებდა და შეელოდა იქ, სადაც საჭირო იყო. ნამდვილად აქ მარქათვი ჯარი (ეხლანდელი რეზერვი) არა სჩანს. ამიტომ ამ წყებით დალაგებული ჯარი მოულოდნელ შემთხვევას, რომელიმე ადგილას მოულოდნელად მტრის ჯარის ნაწილის დაცემას ადვილად ვერ მოიგერიებდა. არაბებმა ის ცვლილება შეიტანეს, რომ იგინი ბრძოლას ერთგვარი თანდათანობით აწარმოებდნენ. პირველი წყება ბრძოლას იწყებდა და მეორე მზად იყო მის მისაშველებლად. მესამე წყება ბრძოლის კრიზისს უცდიდა და მხოლოდ მაშინ, როდესაც ბრძოლის სვლა სავსებით გამოირკვეოდა, იგი სადაც საჭირო იყო, დაეცემოდა მტერს. იგივე წყება ყოველთვის მზად იყო მოულოდნელი შემთხვევა თავიდან აეცილებინა, ან თვითონვე, თუ კი საჭირო იქნებოდა, მტრის რომელიმე წვერს დასცემოდა.

აქ უკვე რეზერვის ნასახი ცხადადა სჩანს. არაბთა პოეტურმა თანტაზიამ ჯარის წყებებს- პოეტური სახელებიც კი უწოდა. პირველი წყება, რომელიც ბრძოლას იწყებდა იყო: „დილა ძალის ყეთისა“ და მესამე წყებას, რომელიც ბრძოლას ამთავრებდა და მტერზე უკანასკნელ საშინელი იერიშით მიდიოდა უწოდებდნენ: „სალამო თავზარდაცემისა“. მეორე წყებას, რომელსაც ბრძოლის კრიზისი უნდა შეექმნა უწოდებდნენ: „შუადღე რყევისა“.

ქართველებს ჯარი ყოველთვის მტერთან შიდარებით ნაკლები ჰყავდათ, ამიტომ იგინი თავის ტაქტიკას მასიურ შეხლაზე ვერ დაამყარებდნენ, მათ მჭიდროდ შეჯგუფებულ ჯარს მრავალრიცხოვანი ჯარი ადვილად გარშემოერთყმებოდა და გაანადგურებდა. გარდა ამისა ქართველ ჯარს ბრძოლა ყოველთვის მთა-გორიან და უსწორ-მასწორ ადგილებში უხდებოდა, სადაც ფართო მასის მოძრაობა და მწყობრი მოქმედება შეუძლებელი იქნებოდა. ამიტომ ბიზანტიელთა წყობილებას ქართველები ვერ გამოიყენებდნენ. ვერც არაბების წესს მიიღებდნენ უცვლელად. ამიტომ შეიმუშავეს ზემოდმოყვანილი წყობილება, რომლის მზგავს ქველ ისტორიაში ჩვენ ვერსად ვნახავთ. აღწერალობის ტერმინებიდან ცხადად სჩანს როგორი იყო ეს წყობილება. წინა-მბრძოლნი ე. ი. რომელნიც წინ იბრძოდნენ, პირველნი დაეტაკებოდნენ და ებრძოდნენ მტერს. ეს იყო პირველი წყება, რომელსაც თავისი მიმყოლნი (რეზერვი) სრუ-

ლიად მესხნი და კლარჯნი... ჰყავდა. მემარჯვენე მიმსვლელ-მცემელნი, ე. ი. პირველ წყების მარჯვნივ და უკან იმყოფებოდნენ და ასეთივე მემარცხნე მიმსვლელ - მცემელნი, რომელიც იმავე პირველ წყების მარცხნივ და უკან იმყოფებოდნენ. სულ უკან იდგა მეოთხე წყება, რომელიც მთავარ-სარდლის განკარგულებაში იყო და ან საერთო მაშველი ჯარის როლს ასრულებდა, ანდა განსაკუთრებულ მოვალეობას. ეს უკანასკნელი წყება თავის დანიშნულებით და ადგილით უკვე ნამდვილი თანამედროვე რეზერვის სწორია (Общій резерв). დავაკვირდეთ ამ წყობილებას. ჯარის ასეთი დანაწილება, სადაც ყოველ ნაწილს შეეძლო თავისუფალი და სხვებთან შედარებით დამოუკიდებელი მოძრაობა-მოქმედება, შეფარდებული იყო ბრძოლის ველის ადგილობრივ თვისებებთან. მთა-გორიან ადგილებში ასეთი წყობილება უფრო ადვილად იმოძრაებდა, ყველა ჯარის ნაწილს შეეძლო ცალკე გზით სარგებლობა და თავის ძალების მტრისაგან უფრო ადვილად დაფარვა-დამალვა. წინამბრძოლს მტერი წვერებით ვერ შემოუვლიდა და გარს ვერ შემოერთებდა, რადგანაც წინამბრძოლის წვერები დაფარული იყვნენ და დაცული მემარჯვენე და მემარცხენე მიმსვლელ-მცემელნით, რომელნიც შემომვლელს მტერს ზურგით დაეცემოდნენ. თუ მტერი მთელს ამ წყობილებას გვერდით დაეცემოდა მაგ., მარჯვენა მხრით, მაშინ მემარჯვენე მიმსვლელ-მცე-

მელნი მარჯენიე მიტრიალდებოდნენ, რაც შედარებით პატარა წყებისათვის ადვილი იყო და ამავე დროს წინა მბრძოლიც მარჯენიე მიტრიალდებოდა და მემარცხნე მიმსვლელის მოვალეობას იკისრებდა. უკან მდგომი საერთო რეზერვი კი მიტრიალდებოდა აგრედვე და მემარჯენე მიმსვლელის როლს იკისრებდა და წინად მემარცხნე მიმსვლელად ყოფილი ახლა საერთო რეზერვად იქცეოდა. ცხადია რამდენად კარგად იყო შეფარდებული ეს წყობილება ადგილობრივ პირობებთან და რამდენად უზრუნველყოფილი იყო იგი მოულოდნელ შემთხვევისაგან. მაგრამ მისი უპირატესობა მარტო ამით არ ისაზღვრება. რადგანაც ჯარი რამდენიმე ნაწილად იყო დაყოფილი და ყველა ამ ნაწილს განსაკუთრებული დავალება და მიზანი ჰქონდა, შედარებით დამოუკიდებლად მოქმედებდა, ამიტომ ნაწილების უფროსებს დიდი ინიციატივის გამოჩენის საშუალება ეძლეოდათ და ეს გარემოება მთავარსარდალს ჯარის მოხმარებას და ბრძოლის საერთო ხელმძღვანელობას მეტად უადვილებდა. გარდა ამისა, თუ ერთს რომელიმე ნაწილს მარცხი დემარტებოდა და იგი აირეოდა და უკან დაიხევდა, ეს სხვა ნაწილებში არეულობას არ გამოიწვევდა, პირიქით ამ ნაწილებს შეეძლოთ თავისუფლად დახმარებოდნენ უკუქცეულ ჯარს და მის მღევარს წვერებით ან და ზურგით დასცემოდნენ.

აიღეთ თანამედროვე ტაქტიკის სახელმძღვანელოები და დაინახავთ, რომ

დღეს ევროპიელ ჯარებში სწორედ ასეთი წყობილებაა შემოღებული. თანამედროვე ბატალიონი, ან პოლკი, ანუ უფრო დიდი ნაწილი ჯარისა სწორედ ამგვარ სქემით სარგებლობს. სამხედრო წესდებაში (Воинский уставъ) პირდაპირ დაკანონებულია „გაშლა ბატალიონებისა ზოტებად (Строй по ротам), რომელიც სწორედ ზემოდ მოყვანილ მოსაზრებათა მიხედვით არის შემოღებული. ევროპის ჯარებმა ამ გვარი წყობილება შემოიღეს ნაპოლეონის ომების შემდეგ.

გარდა ამისა მემატიანე კიდევ იმას გვაძეცნობს: გარნა ოდესმე სამაღ მიმსგლელად ანუ სხვა-რიგ მოიყვანდიან, ვითარ ამჯობინის მეფე ანუ სპასალარი.“ ეს ზემოდ მოყვანილი წყობილება შაბლონი არ იყო და ყოველგვარი ცვლილება და ვარიაციები შეიძლებოდა გარემოების და ადგილობრივ პირობათა მიხედვით. აქ უკვე ცხადი შემოქმედებითი ნიჭი სჩანს და სამხედრო ხელოვნების მაღალ განვითარებას გვიმტკიცებს.

რადგანაც წყობილების ერთს ნაწილს შეადგენდა მუდმივი ჯარი (როქი), უნდა ვიფიქროთ, რომ ეს წყობილება შექმნილი და შემოღებულია დავით აღმაშენებლის მიერ, რაიც გვიმტკიცებს რომ გენიოსი სტრატეგი იმავე დროს გენიოსი ტაქტიკოსიც ყოფილა. ძველ საბერძნეთში ეპამინონდმა გენიოსი სარდლის სახელი გაითქვა მხოლოდ იმით, რომ მან პირველმა შემოიღო სოლებრივი წყობილება და ბასრი სოლივით შე-

ჯგუფებულ ჯარით შუაზე გააპო მოპირდაპირის ოთხკუთხედიანი ფალანგა.

ნუ თუ დავით აღმაშენებელს ნაკლები უფლება აქვს ამ ტიტულისა? ქართველ ჯარის წყობილებას თან სდევს კიდევ ერთი დიდი ღირსება. თუ ყურადღებას მივაქცევთ ჯარის ნაწილთა შემადგენლობას, დავინახავთ რომ თითო ნაწილი უსათუოდ ერთდა იმავე კუთხის მცხოვრებთაგან შესდგებოდა, ე. ი. აქ მტკიცედ არის დაცული ტერიტორიალური პრინციპი, რასაც ბრძოლისათვის დიდი მნიშვნელობა აქვს. ერთი მხრის ხალხი ერთი მეორეს კარგად სცნობს, იცნობენ მათ კარგად აგრედვე მათი უფროსები, მეომარნი ერთმანეთს უფრო გულიანად და მეტის ხალხით ეხმარებიან და რა თქმა უნდა მეზობლის წინაშე თავის შერცხვენას უფრო ერიდებიან. ჯარის გამოკვება უფრო ადვილი იყო ამ შემთხვევაში. სხვა და სხვა კუთხეებში ხალხი სხვა და სხვა იარაღს და სურსათ-საკვებს იყო ჩვეულები და მისი გამოკვება ამ შემთხვევაში უფრო ადვილდებოდა, ვიდრე მაშინ, როდესაც ყველა კუთხის ხალხი ერთიერთმანეთში არეულნი იქნებოდნენ. ჯარის ნაწილების ასეთს შემადგენილო? ას თათარუან დადემქელებიანი ერთგვარ ტრადიციაზე ამყარებს და საქართველოს სხვა და სხვა კუთხეთა შემოერთების ქრონოლოგიას უფარდებს. იქნებ ეს ასეც იყო, მაგრამ რომ სხვა უფრო ღრმა და პრაქტიკული მოსაზრებასაც ჰქონდა ადგი-

ლი ამას წინა მბრძოლის შემადგენლობა გვიმტკიცებს. ეს ნაწილი სამცხის, ჯავახეთის და კლარჯეთის მცხოვრებთაგან შესდგებოდა და აქვე იყვნენ აქარელნი და შავშელნი, ე. ი. იმ კუთხეების მცხოვრებნი, სადაც უფრო ხშირად ხდებოდა დიდი ბრძოლა. ამ მცხოვრებთ, რა თქმა უნდა, კარგად ჰქონდათ შესწავლილი და შეთვისებული ბრძოლის ასპარეზი, გაცნობილნი იყვნენ ადგილობრივ პირობებს, კარგად იცოდნენ ყველა გზები, გადასავალ-გადმოსავალი, საფარი და გაშლილი ადგილები, ფონი, ხიდი და ადგილის ყველა თვისებანი. რა თქმა უნდა სწორედ ასეთი ხალხი უნდა ყოფილიყო იმ ნაწილში, რომელიც ჯარის მსვლელობის დროს წინმავალი რაზმის (ავანგარდის) როლს ასრულებდა და ბრძოლის დროს წინაშე ბრძოლი იყო. გარდა ამისა იგინი უფრო მთავორიან და უსწორ-მასწორ ადგილებში ცხოვრობდნენ და ამიტომ უფრო მსუბუქი და ადვილად სატარებელი იარაღით იჭნებოდნენ აღჭურვილნი, მაშასადამე მათ უფრო ადვილად შეეძლოთ წინსვლა. უკანა რაზმის, რეზერვის, შემადგენილობაც იმით აიხსნება, რომ მუდმივი ჯარი, უფრო კარგად გაწვრთნილი და უფრო კარგად შეიარაღებული რასაკვირველია მთავარსარდლის განკარგულებაში იჭნებოდა, რათა შესაძლებელი ყოფილიყო მკაცრი და ენერგიული შეტევით ბრძოლის ბედის თავისაკენ გადმოხრა ან და, თუ წინამბრძოლი ჯარი დამარცხდებოდა მისთვის აქტიური დახმარება. რაც

შეეხებოდა მემარჯვენეთ და მემარცხნეთ, მათი წყებების შემადგენლობა იქნებ მართლა მათი სამშობლო კუთხეების მდებარეობით აიხსნებოდა.

იმ საოცარ გამარჯვებაში, რომელიც დავითის დროს ქართველ ჯარს არა ერთხელ რგებია ბრძოლის ველზე, ბევრი რამ აიხსნება ქართველ ჯარის შესანიშნავ საბრძოლველ წყობილებით, რომელშიაც ასე ბრწყინვალედ გამოსკვივის მათი დიდებულ სარდლის ნიჭი.

მრავალჯერ დაამარცხა დავითმა თურქობა, მათი თარეში მტკვრისაკენ მოსპო, აღმოსავლეთით შირვანის და რანის მხრით საზღვრები გააფართოვა და გაამაგრა, მაგრამ ჯერ კიდევ დიდი იყო ძალა თურქებისა და ყოველს ჟამს მოსალოდნელი მათი შემოსევა. საერთო უბედურებამ თურქების სხვა და სხვა საამირონი შეაკავშირა, მაგრამ იგინი შეერთებულნიც შაინც ვერა ჰბედავდნენ მარტო საკუთარი ძალებით დავითის წინააღმდეგ მოქმედებას. მიჰმართეს სულტანს თხოვნით და სულტანიც, რა თქმა უნდა, ვერ შეურიგდებოდა საქარაველოს ესოდენ გაძლიერებას და მაჰმადიანთა დაზიანებას. მან დალოცა საქართველოსაკენ გალაშქრება და თავის მხრითაც დიდი ჯარი მიუმატა და ეს დიდძალი ლაშქარი წამოვიდა საქართველოში და მოაღწია დიდგორის—მანგლისის და თრიალეთის ხაზს. მოადგა თრიალეთის მთებს. მაჰმადიანთა შეერთებული ჯარი ზოგიერთ მემატიანეთა სიტყვით 400,000 უდრიდა. ეს რა თქმა უნდა მეტად გა-

დაქარბებული რიცხვია. მაგრამ, თუ გავიხსენებთ რამდენი კუთხიდან იყო შეგროვილი ჯარი, რომ საქართველოს საზღვრებში მყოფ საამიროთა გარდა, მონაწილეობას იღებდნენ სომხითში მყოფი მაჰმადიანებიც, აგრედვე მონაწილეობდა რანიც და თავის მხრით სულტანმაც დიდძალი ჯარი მიუმატა, უნდა ვიფიქროთ, რომ ეს შერთებული ჯარი არა ნაკლებ 200,000 აღწევდა. ამოდენი ჯარი თრიალეთის მთა-გორიან ადგილებში დაბანაკდა და ცხადია ეს უშველებელი ჯარი ასეთ ადგილში წესიერად ვერ გაიშლებოდა და თავისუფლად ვერ იმოქმედებდა. ამიტომ საფიქრებელია, რომ ეს უზარმაზარი ჯარი სამ ნაწილად დაიყო და ერთი ნაწილი დიდ-გორსა, მეორე ნაწილი ქანგლისს და მესამე კიდევ დასავლეთით დადგა. ასე რომ ჯარი დანაწილდა და დავითს საშუალება მიეცა, იგი ნაწილ-ნაწილ დაემარცხებინა, მით უმეტეს, რომ თურქთა ჯარის ნაწილთა შორის, ადგილობრივ პირობათა წყალობით, ყოველგვარი კავშირი გაწყვეტილი იყო და ჩვეულებისამებრ ამისათვის არც დიდათ ზრუნავდნენ. დავითმა თურქთა ჯარის წინააღმდეგ მოუყარა თავი 61,000 მეომარს. მემართიანეს სიტყვით, თურქნი პირველ შეტევისთანავე მეოტ იქმნენ. თათარყან დადეშქელიანის სიტყვით, დავითი დავეცა მტრის მარცხენა ნაწილს, დაამარცხა იგი და ამ დამარცხებამ დანარჩენ ნაწილების უკან დახევა გამოიწვია, რადგანაც მათ საკვები და უკან დასახევი გზების გადაჭრა მოელოდა. ჩვე-

ნის აზრით, ეს შემცდარი აზრია. თუ დავითი მთელის თავის ძალით თურქების მარცხენა ნაწილს დაეცემოდა, ეს უკანასკნელი აღმოსავლეთისაკენ დაიხევდა და დანარჩენ ნაწილებს შეუერთდებოდა და მაშინ თვით დავითი დიდს გაჭირებაში ჩავარდებოდა. ყოველ შემთხვევაში თურქებს გარდა სამხრეთისაკენ მიმავალ გზებისა კიდევ სამხრეთ-აღმოსავლეთისაკენ, რანში, დასახევი გზები შთებოდათ, ასე რომ მათი მარცხენა ნაწილის დამარცხება საკვები გზების გადაჭრას არა ნიშნავდა. თუ მოვიგონებთ მემატრიანეს ცნობას, რომ თურქებმა პირველ შეხლისთანავე უკან დაიხიეს და გაიქცნენ, უფრო ახლო იქნება სინამდვილესთან, რომ დავითი მთელის თავის ძალით შუა მდგომ ნაწილს თურქთა ჯარისას მოულოდნელად თავს დაესხა და გაანადგურა. შუაში მდგომ ნაწილის დამარცხება სრულიად შესწყვეტდა მარცხნით და მარჯვნით მდგომ ნაწილების შორის ისედაც სუსტს კავშირს და არც ერთს მათგანს არ ეცოდანებოდა მეორის ბედი და სწორედ ეს აიძულებდა ერთსაცა და მეორესაც გაქცევისათვის. ეს ბრძოლაც დავითის ბრწყინვალე გამარჯვებით დამთავრდა და შეერთებული თურქთა ლაშქარი თითქმის მოსპობილ იქმნა.

ეხლა კი დავითს თამამად შეეძლო შესდგომოდა იმ საქმეს, რომლისთვისაც მან ესოდენი ღვაწლი, შრომა და ენერგია შესწირა. იგი ჩამდენიმე წელიწადს მეთოდურად, დიდის მოთმინებით და გონიერებით უმზადებდა ამ

საქმეს ნიადაგს და ვიდრე მისი კეთილად დამთავრება ყოველ მხრით უზრუნველ არა ჰყო, არ შეუდგა მას. ეს საქმე ტფილისის განთავსუფლება და შეზოერთება იყო. შირვანის და რანის საზღვრები უზრუნველყოფილი იყო. ერთი და მეორეც კარგად ჰკრძნობდნენ დავითის ძალას. სამხრეთით თურქები დიდ ხნობით ველარ მოაწყობდნენ და ვერ გაბედავდნენ შემოსევას და დავითს თამამად შეეძლო ამდენი ხნის ლაშქრობა ტფილისის აღებით დაეგვირგვინებინა. დავითი გარს შემოერთა ტფილისს და 1122 წ. „აილო მეფემან ტფილისი პირველსა ომსაო“, ამბობს მემატიანე. მართლია მალე სელტანი შირვანს მოვიდა, აილო შემახია და აქედან დავითს ემუქრებოდა, საქართველოში შემოსევას აპირებდა, მაგრამ დავითმა დაასწრო და თვითონ შეიჭრა შირვანში და მიაღვა შემახიას. შეშინებულ სულტანმა დაზავები ირჩია და შემდეგ გაიპარა კიდეც. დავითი დაბრუნდა და ეხლა კი შეეძლო აქტიურ მოგერიებითი ბრძოლას შესდგომოდა და საზღვრები გაეთართოვებინა. თანდათან მან აღმოსავლეთის საზღვარი დარუბანდამდე გასწია. ასე რომ თანდათან მთელი შირვანიც დავითის საბრძანებლად გახდა. ეხლა ყურადღება მიაქცია სამხრეთის საზღვრებს და 1123 წ. „მაისსა აიხუნა სომხითისა ციხენი“, გაგი, ტერუნაკანი, ქავასნი, ქავაზნი, ნორაბერდი, მანასგონი და ტალინჯაქარი და იენისს წარემართა ლაშქრითა, განვლო ჯავახეთი, კოლა-

კარნიფორი, ბასიანნი სპერამდინ, ბუიაოაყური და დაწუნა ოლთისი, ე. ი. სამხრეთ-დასავლეთით საზღვრები ბუნებრივ ხაზამდე იყო გაწეული და სამკუთხედი არტაან-ახალციხე-ახალქალაქი უზრუნველყოფილი. დარჩა სამხრეთ-აღმოსავლეთი და სამკუთხედი კარი-ანისი-ლორი. — ლორი, როგორც ვიციტ დავითმა წინადვე აიღო რახსის ნაპირებისაკენ გალაშქრების დროს და ახლა ანისის ჯერი იყო. ანისიც დავითმა 1123 წ. ალილო და ამით თითქმის დაამთავრა თავისი დიდებული გეგმა. ეხლა მხოლოდ კარის მიდამოები და შთებოდა და ამ უკანასკნელის დაპყრობა საბოლოოდ ჩაჰკეტავდა ოლთის-კარის-ანისის და გელაქუნის ტბის ჩრდილოეთ ნაპირის ხაზს. საქაოთველოს ტერიტორია შესევისაგან უზრუნველყოფილი იყო. დავითის მემკვიდრეებს ახლა მხოლოდ შორს გალაშქრება სჭირდებოდათ, რათა ეს ხაზი საბოლოოდ გაემაგრებინათ. დავითმა მკვიდრი და მაგარი დულაბით ამოშენებული საძირკველი დაუტოვა იმ შენობას, რომელიც მისმა მემკვიდრეებმა ადვილად ააგეს და დაასრულეს. ასეთი იყო ღვაწლი და სამხედრო მოღვაწეობა ამ საოცარი ისტორიული პიროვნებისა.

დავაკვირდეთ მის მოღვაწეობას. იგი ყოველთვის მოქმედებდა გარემოების მიხედვით. დავითს ზედმიწევნით გაცნობილი ჰქონდა როგორც მოპირდაპირის თვისებანი და ფსიხიკა, აგრედვე ბრძოლის ველის ასპარეზის თვისებანი. იგი ყოველთვის უახლოეს და

უსაქიროეს მიზანს ისახავდა. გეგმა მისი ყოველთვის მარტივი და მიზანშეწონილი იყო, ყოველ თავის ოპერაციას იგი ყოველმხრივ ნიადაგს უმზადებდა და წვრილმანებსაც კი არ ივიწყებდა. რაკი რაიმე გადაწყვეტილებას დაადგებოდა, იგი დაუყოვნებლივ და შეუჩერებლივ მის აღსრულებას შეუდგებოდა. ყოყმანი და რყევა ამ შემთხვევაში არასოდეს არ ემჩნევა. იგი მხოლოდ აქტიურ მოქმედებას აწარმოებს, ყოველთვის შეტევითი ბრძოლის მომხრეა და მოგერიებითი ბრძოლა არა სწამს. მტრის დაზვერაც და მის შესახებ ცნობების შეკრების საქმეც კარგადაა აქვს დაყენებული. იგი დიდი მომხრეა თავის ხელქვეითთა ინიციატივისა, რაიც იმით მტკიცდება, რომ მისი მწიგნობართ უხუცესი გიორგი ჭყონდიდელი თავის ინიციატივით ილაშქრებს და იპყრობს ასეთს მნიშვნელოვან ციხეებს, როგორც სამშვილდეს და რუსთავს. იმავე ინიციატივობის პრინციპი გატარებულია ჯარის იმ დროისათვის საოცარ წყობილებაში. დავითი პირისპირ შეხლას ყოველთვის ერთის ან ორივე წვერით შემოვლას ზედ ურთობს. დავითი ყოველ გამრჯვებას ბოლომდის გამოიყენებს და უკუქცეულ ჯარს მკაცრად სდევნის და საბოლოოდ ანადგურებს. — ჯარის მოძრაობის მოწყობაში და მისთვის გზების გაყვანაში დავითი დიდს ნიქს იჩენს. სწრაფად მოულოდნელი თავდასხმა მისი მოქმედების ჩვეულებრივი ხერხია. იგი ყოველისფერს ითვალისწინებს და მის საერთო მოქმე-

დებაში ცხადათ სჩანს ერთგვარი მე-
თოდი, თანდათანობა და სისტემა.
თვით სტრატეგიაში, სადაც იგი სტრა-
ტეგიულ შემოვლას მიმართავს და
ტაქტიკაში, სადაც მას საოცარი წყო-
ბილება შემოაქვს, დავითმა ბევრი რამ
ახალი, იმ დროისათვის სრულიად უც-
ნობი შემოიტანა და შექმნა. ყოველ
მის ოპერაციას უმაღლესი ხარისხის
შემოქმედებითი ნიჭის ბეჭედი ასვია.

ყველა ზემოდ ნათქვამი უფლებას გვა-
ძლევს თამამად აღვიაროთ, რომ დავით
აღმაშენებლის სახელი სრულიად ღირ-
სია იმ პანთეონში მოთავსებისა, სადაც
ოქროს ასოებით წარწერილია მსოფ-
ლიოს გენიოსი სარდლების სახელები.

1125 წელს მიიცვალა გენიოსი სარ-
დალი და პოლიტიკოსი დავით აღმა-
შენებელი. განუსაზღვრელი იყო მისი
ღვაწლი საქართველოს წინაშე საერ-
თოდ და მის სამხედრო ძლიერებისა
კერძოდ. ვისაც სურს სავსებით შეი-
გნოს მისი ნაღვაწი, მან უნდა გაითვა-
ლისწინოს თუ რა მიიღო დავითმა მე-
მკვიდრეობით თავის წინაპართა მიერ
ნაანდერძევი და რა დაუტოვა თვითონ
თავის მემკვიდრეებს. ახალგაზრდა და-
ვითს ერგო გაოხრებული, გატიალებუ-
ლი, დაქსაქსული და დანაწილებული
სამეფო, რომლის უმთავრეს ნაწილს
თურქები ჰფლობდნენ, რომლის უსა-
ქიროესი საზღვრები არამც თუ უზრუნ-
ველ-ყოფილნი იყვნენ, არამედ იმავე
მტერს ხელთ ეპყრა. და დაუტოვა თა-
ვის მემკვიდრეებს შეერთებული, მოშე-
ნებული, მოწყობილი და ძლევა-მოსი-
ლი სამეფო, გაფართოებულ და გამა-

გრებულ საზღვრებით; ძლევამოსილი, გაწვრთნილი და გამოცდილი ჯარი, რომლის საფუძველს მშვენივრად მოწყობილი მუდმივი ჯარი შეადგენდა. დავითის მუდმივ ბრძოლაში იწვრთნებოდნენ და სწავლობდნენ სარდლები და მისი გენიოსური სტრატეგია და ტაქტიკა გარდაეცემოდა მის ნიჭიერ მოწაფეებს.

დავითის მემკვიდრეებს მხოლოდ დავითის მოქმედება უნდა გაეგრძელებინათ, მხოლოდ მისი გენიოსური გეგმა ლოლიკურად დაესრულებინათ. დავითმა გზაც გაუკვლია და საშუალებანიც დაუმზადა.

არ შეგვიძლიან არ გავიმეოროთ ის სიტყვები, რომლითაც ამთავრებს ჩვენი ისტორიკოსი ივ. ჯავახიშვილი დავით აღმაშენებელის მეფობის ისტორიის მოთხრობას: „ქარაველმა ერმა და ისტორიამ უკვდავ ჰყო დიდებულ მეფე დავითის, სიქართველოს გამაერთიანებელის და აღმაშენებელის, მისის პოლიტიკურისა და ეკონომიურის ძლიერების შემქმნელის, სოციალურ სამართლიანობისათვის მებრძოლის სათაყვანებელი სახელი. ქართველი ხალხი დავით აღმაშენებელის სამარადისო ხსოვნას თავის გულის სიღრმეში ატარებს და შეჰხარის მას ვითარცა სრულიად საქართველოს ერთობისა და ძლიერების სიმბოლოს“. („ქართ. ერის ისტორია“ გვ. 542).

✓ ამას ჩვენის მხრით დაუმატებთ, რომ თუ ოდესმე ქართველ ერის ისტორია მსოფლიო ისტორიაში სამართლიანად დარსებულ ადგილს დაიკავებს, მაშინ

აგრედვე სამართლიანად დავით აღმაშენებელი მსოფლიოს გენიოს სარდალთა რიცხვში ჩაწერილ იქმნება, რამეთუ მან უკვდავ ჰყო ქართული სამხედრო ხელოვნება და ამ ხელოვნების ისეთი მარგალიტები გვიჩვენა, რომლის მგზავსს მხოლოდ გენიოს სარდალთა მოღვაწეობაში ვხედავთ.

დავითის შემდეგ ქართველები სამხედრო საქმეში დიდებულ მეფის ნაანდერძევს ასრულებდნენ, მისივე გემას ანხორციელებდნენ. დავითისძე მეფე დემეტრე, რომლის შესახებ ნაკლები ცნობებია შერჩენილი, მართალია სახელოვან მამასთან შედარებით, როგორც სარდალი, ბევრით განსხვავდებოდა, მაგრამ როგორც მისი მოწათე და მოწმე გენიოს სარდლის მოღვაწეობისა ღირსეულად განაგრძობდა მამის მიერ ნაანდერძევ პოლიტიკას. იგი დავითსავით შორს მკვრეტი არ იყო და, მისს ფართე ფანტაზიას და შემოქმედებითი ნიქს მოკლებული, მხოლოდ მამის მემკვიდროების შერჩენა-შენახვასა ცდილობდა. მის სამხედრო მოქმედებაში მხოლოდ მოგერიებითი ომებს და საზღვრების დაცვასა ვხედავთ. დემეტრემ განსაკუთრებული ყურადღება სამხრეთ-აღმოსავლეთის საზღვრებს მიაქცია. რანში გალაშქრებით დაიპყრა მნიშვნელოვანი ციხე ხუნანი, რომელიც მდ. ქციის და მტკვრის შესართავთან მდებარეობდა. ეს ციხე დარაჯობდა განძიდან ტფილისისაკენ მიმავალ გზებს და ჰკეტავდა მტკვრის და ქციის ველებს. ალილო დემეტრემ აგრედვე ციხე ღმანი-

სი, რომელიც სამშვილდის და ლორის შუა მდებარეობდა და ამ ციხის დაპყრობით საბოლოოდ გაამაგრა და უზრუნველ ჰყო სამხრეთ-დასავლეთი საზღვარი. ამ საზღვრის უფრო მეტი გამაგრებისათვის დემეტრემ განდაშიაც კი გაილაშქრა და გამარჯვებული დაბრუნდა, რანი საგრძნობლად დააუძლურა და აქედან შიში აღარ მოელოდა. როგორც მოსალოდნელი იყო თურქები ანისის დაკარგვას ვერ შეურიგდებოდნენ. მეტად დიდი მნიშვნელობა ჰქონდა ამ ციხე—ქალაქს. სამხრეთიდან ამ ქალაქით მიდიოდნენ საუკეთესო და უახლოესი გზები ტფილისისაკენ, როგორც სამშვილდით, აგრედვე თრიალეთით. მეორეს მხრით ანისი ქართველ ჯარისათვის საუკეთესო და მოხერხებული ბაზა იყო სამხრეთისაკენ, რახსის ნაპირებისაკენ, გალაშქრებისათვის. ასე რომ თვით თავის საკუთარ ტერიტორიის დაცვისათვის თურქებისათვის მეტად საჭირო იყო ანისი. სწორედ ამიტომ ამირა სალდუხი 1154 წელს ქ. ანისს მოადგა და გარს შემოერტყა. დემეტრე სწრაფად გამოეშურა ანისისაკენ და დაეცა თურქებს, დაამარცხა და თვით სალდუხი ტყვედ წაიყვანა. ანისი კვლავ გამაგრებულ იქმნა.

ამრიგად სამხრეთ-აღმოსავლეთის საზღვრები, როგორცა ვსთქვით, საკმაოდ გამაგრებული იყო. დემეტრეს მოსდევს გიორგი მეფე, რომელიც უფრო თავის პაპას—დავით აღმაშენებელს წააგავს სამხედრო ხელოვნებაში. უშიშარი და ენერგიით სავსე სარდალი, იგი მარ-

ტო საზღვრების დაცვით არა კმაყოფილდება და აქტიურ მოგერიებითი ოპერაციებს აწარმოებს. მართალია მას დავითთან შედარებით ნაკლები შორსმჭვრეტელობა, სიღინჯე, გამჭრიახობა და ნებისყოფა აქვს, მაგრამ დავითის იდეა სამეფოს დაცვისა და თვით სამხედრო მოქმედების წარმოებისა კარგად შეგნებული ჰქონია. იგი მთავარ ყურადღებას სამხრეთის ასპარეზს აქცევს, განსაკუთრებით ანისის მიდამოებს. მას კარგად გათვალისწინებული ჰქონდა ამ ქალაქის მნიშვნელობა და კარგად ესმოდა, რომ მისი საუკეთესო დაცვა აქედან შორს სამხრეთით გალაშქრება იქნებოდა. როგორც ეტყობა გიორგი ლორის-ანის და კარის სამკუთხედის მნიშვნელობასაც კარგად ჰგრძნობდა და ამიტომ პირველხნობითვე ყურადღება აქეთ მიაქცია. პირველი მისი გალაშქრება ყალზევანისკენაა, როდესაც მან „წარმოტყუენა ყოველი ხევნები კლდოვანნი და ქალაქები აშორნისა“, რომელნიც შაჰარმენის ხელთ იყო“ (ივ. ჯავახ. „ქართველი ერის ისტორია“ გვ. 553). ყალზევანი (ეხლანდელი კალიზმანი) კარის სამხრეთით მდებარეობს. ასე რომ ამ გალაშქრებით გიორგი კარის და ანისის სამხრეთით მდებარე ხაზს იპყრობდა და, როგორცა სჩანს, ანისის დაცვის გარდა იგი კარის მიდამოების შემოვლასაც აპირებდა. ეს უკვე ლოლიკური გაგრძელებაა დავით აღმაშენებელის გეგმისა. ქართველი ჯარი თანდათან ამაგრებს ჩვენ მიერ აღნიშნულ ხაზს, ოლთისი-კარი-ანისი.

როგორც ისტორიკოსი ჯოჯიბერიძე ანისი დემეტრეს კვლავ დაებრუნებოდა მაკმადიან მმართველისათვის, მართალია საქართველოს მეფის პროტექტორატით. გიორგის კარგად ესმოდა, რომ ანისი ერთ-ერთი მძივია იმ მაგარ ხაზისა, რომელსაც უნდა დაეფარა სამხრეთით საქართველო და მარტო პრაქტიკორატით გიორგი არ დაკმაყოფილდებოდა. ამიტომ, კალზევანზე გალაშქრების შემდეგ, გიორგი მიუბრუნდება ანისს და კვლავ სავსებით დაიპყრობს. აქ ჩააყენებს მცველად თავის სპასალარს და მასთან 2000 მეომარს. როგორც ვსთქვით ანისი თურქებისათვისაც მეტად მნიშვნელოვანი იყო და ამიტომ კვლავ შეერთდნენ და შეერთებული ძალით წამოვიდნენ ანისისაკენ, გარშემოერთყნენ ქალაქს. გიორგი დავითისებურად სწრაფად და მოულოდნელად (არც კი მოუცადა ჯარის ბოლომდე შეგროვებას) მტერს დაეცა და საშინლად დაამარცხა. მაგრამ გიორგი ამას არ კმარობს. მას სწადია ანისის საბოლოოდ უზრუნველყოფა ახლა სამხრეთ-აღმოსავლეთის მხრით, საიდგანაც უფრო მოსალოდნელი იყო მტრის შემოსევა, ე. ი. რახსის ველის მიმართულებით (იხ. ზემოდ.) გიორგი ილაშქრებს ქ. დვინისაკენ, რომელიც არარატის მახლობლად მდებარეობდა. („აწ რომელ არს არარატისა ძირსა ზღუარი სომხეთისა და ადარბადაჯანისა“, მათე ურჭაელის „ისტორია“. ივ. ჯავახ. „ქართ. ერის ისტ.“) აღსანიშნავია ეს ბრძოლა, სადაც ბრძოლის ველს სახელოვან დავით აღმაშენებლის შარა-

ვანდედით მოსილი აჩრდილი დასტრიალებს: გიორგის ქალაქის წინ დახვედრია მტრის ჯარი. როგორცა სჩანს, ამ ჯარისათვის ორივე მხრით შემოუვლია, მოუმწყვდევია და მხოლოდ ნაწილს მოუსწვრია გასხლტომა და ქალაქისაკენ გაქცევა. გიორგი ამათ ფეხდაფეხ დასდევნებია და მათთან ერთად ძალით შეჭრილა ქალაქში და დაუპყრო იგი. მრავალის ნადავლით და ტყვეებით გიორგი შინ დაბრუნდა.

„ანისისთან დამარცხებამ და დვინის დაკარგვამ მაჰმადიანთა ამირები და მთავრები საშინლად განარისხა. ქართველები მათს საგამგეო მიწა-წყალს კვალ-და-კვალ იჭერდნენ და განსაცდელი კარზე ჰქონდათ მიმდგარი. ამიტომ ეხლა უფრო მეტის მხნეობითა და ერთსულოვნობით შეჰკრეს პირი და გადასწყვიტეს ქართველებისათვის წინააღმდეგობა შეერთებულის ძალით გაეწიათ და ანის-დვინის დამარცხებისათვის მაგიერი გადაეხდენებინათ“. (ივ. ჯავახიშვილი „ქართ. ერის ისტორია“. გვ. 559).

მაჰმადიანთა დიდი ჯარი სამხრეთ აღმოსავლეთის საზღვრებს შემოსევია, აუღია ციხე გაგი და მიდამო აუოხრებია. გიორგიმ გაიგო რა ესა თავის მხრითაც დიდი ჯარი შეჰყარა, მოუწოდა და მიიწველა ოსებიც და მტრისაკენ წამოვიდა. გიორგის დიდს ლაშქარს შეუშინებია მტერი და იგი ციხის ზღუდეებს ამოჰფარებია და მერმე ციხეც დაუტოვებია. გიორგის დადევნება ვერ გაუბედია და ლორის და დმანისის მიდამოებში დაბრუნებულა

და, როგორც ეტყობა აქ ნადირობას და მხიარულად დროს გატარებას მისცემია. აქ იჩინა თავი დიდმა დაუდევრობამ. როგორც ეტყობა გიორგის დაავიწყდა დავეითის წესი, სიფრთხილე. მტერმა უბრძოლველად დაიხია, მას დიდი ძალები ჰყავდა და მოსალოდნელი იყო იგი დროს იხელთავდა და კვლავ შემოესეოდა სამეფოს. თუ გიორგიმ მტრის დადევნება ვერ გაბედა და თავის მხრითაც ბრძოლას მოერიდა, მით უმეტეს საჭირო ზომები უნდა მიეღო და ფრთხილად მოქცეულიყო. ნამდვილად კი სულ სხვასა ვხედავთ. გიორგი განცხრომას მიეცემა და არავეითარ ზომებს არ მიიღებს მოულოდნელ თავდასხმის თავიდან აცილებისათვის. უფრო მეტი. როგორც ეტყობა ქართველი ჯარი თავის მეფითურთ ისე იყო გართული დროს გატარებაში, რომ ჯარის ბანაკში მოდის აშკარად ჯაშუში თურქებისა, ყოველისფერს დაათვალიერებს, გაიცნობს და შეატყობინებს თურქებს. როგორც ირკვევა ეს ჯაშუში გამაჰმადიანებული ქართველი იყო ხლათის სულტნის მიერ გიორგისადმი ვითომ და მოციქულად წარმოგზავნილი. ამ უცნაურმა მოციქულობამ არავეის როგორცა სჩანს იქვე არ დაუბადა. არავეინ არ გააკვირვა, რატომ დასჭირდათ თურქებს მოციქული, როდესაც დამარცხებულ არ იყვნენ და არც გაჭირებულ მდგომარეობაში იმყოფებოდნენ. მაგრამ „მოციქულმა“ თავისი მოვალეობა კარგად შეასრულა და ერთს მშვენიერ

დღეს მთელი თურქთა ლაშქრობა გიორგის ჯარს სრულიად მოულოდნელად თავს დაასხა და თავზარი დასცა. თურქებმა მძინარეებს მოასწრეს ქართველებს და ისე საშინლად დაამარცხეს, რომ თვით მეფემ ძლივს უშველა თავს.

ეს დიდი დამარცხება იყო. მას, გარდა მორალური მნიშვნელობისა, დიდი სტრატეგიული შედეგიც მოჰყვებოდა. დავით აღმაშენებელის დროიდან დაწყებული თითქმის ყველა ბრძოლაში ქართველები იმარჯვებდნენ. ზედიზედ დამარცხებით მაჰმადიანებს თავზარი დასცეს და ქართველ ჯარის ესოდენი მსხვერპლი და შრომა ბრწყინვალედ ბოლოვდებოდა სამეთოს საზღვრების გაფართოება-გამაგრებით და ეხლა კი გიორგის დაუდევრობამ ასეთი მარცხი გამოიწვია. მაჰმადიანობა გამხნედა და ამ გამხნეებას კი ქალაქ ანისის დაკარგვა მოჰყვა. გიორგი იძულებული გახდა ზავს დათანხმებულიყო და ქალაქი ანისი კვლავ მაჰმადიანებისათვის დაებრუნებინა. საქართველოს სამხრეთ-აღმოსავლეთის საზღვარი კვლავ გაიღო და მის გამაგრებისათვის შეწირულმა ამდენმა შრომამ ფუჟად ჩაიარა. ბრწყინვალე და ნიჭიერი სარდალი იყო გიორგი, მაგრამ ეს უკანასკნელი მარცხი, რომელიც მხოლოდ დაუდევრობით იყო გამოწვეული გვიმტკიცებს, რომ მას საკმაო სიდინჯე და სიფრთხილე აკლდა. ასეთი დამარცხება გიორგისათვის კიდევ სხვა მხრით იყო მნიშვნელოვანი. დავითმა, დემეტრემ და თვით გიორგიმაც საკმაოდ მოუხარეს ქედი დიდ-

გვარიან თავადებს. ძლევა მოსილ და ყოველთვის გამარჯვებულ მეფეებთან დიდგვარიანი მოხელეები ვერასა ბედავდნენ და ვერც მრავალგზით დამარცხებულ გარეშე მტრის დახმარების იმედი ექნებოდათ. ამიერიდან კი როგორც იტყობა დიდგვარიან თავადებს კვლავ გაელვიდათ იმედი. იწყება შეთქმულება მათშორის, რომელსც დემნას განდგომით და შინაურ განხეთქილებით მთავრდება. მართალია ბოლოს და ბოლოს აქ გიორგიმ გაიმარჯვა, რა თქმა უნდა მუდმივი ჯარის წყალობით და უფრო იმით, რომ ქართველობა წესიერებას შეეჩვიდა და სრულიად საქართველოს ერთიანობის იდეას შეეგუა, მაგრამ ამ შინაურმა განხეთქილებამ თვით გიორგიზედაც მეტად მძიმედ იმოქმედა და სამხედრო მოქმედება, საზღვრების გაფართოება-დაცვისაკენ მიმართული, დიდი ხნით შეაჩერა. მართალია გიორგიმ შემდეგ საქმე კოტათი გამოაბრუნა და 1173 წელს ანისი კვლავ დაიბრუნა, მაგრამ ანისის მიდამოები და ქ. დვინი კვლავ სხვის ხელში იყო. დემნას განდგომის დროს გიორგიმ გაჭირებაში დიდი ენერჯია და შეურყეველი ნების ყოფა გამოიჩინა და ამბოხების დაწყნარების შემდეგ რადიკალური ზომა მიიღო და სამეფოს უმაღლესი თანამდებობა დიდგვარიანთა მაგიერ სრულებით უგვარო კაცს ნაყივჩადარს ყუბასარს ჩააბარა.

გიორგის ლორესთან დამარცხებით და დემნას განდგომით გამოწვეულ არეულობით თურქებმა მაინც ვერ ისა-

რგებლეს, მიუხედავად იმისა, რომ ამბოხებულთ მათი იმედი ჰქონდათ და მიმართეს კიდეც. და სწორედ ეს ფაქტი მაჩვენებელია რამდენად დაუძლურდნენ თურქები და სამაგიეროდ რამდენად გაძლიერებულ და გამაგრებულ იქმნა თვით საქართველო.

ეს ნაყოფი იყო სახელოვან დავით აღმაშენებელის და მის ღირსეულ მემკვიდრეების ამაგის და ღვაწლისა. იმ შენობის კედლები, რომელსაც დავით აღმაშენებელმა ჰკვიდრი და მაგარი საძირკველი ჩაუყარა აშენებულ იქმნენ და მხოლოდ ბრწყინვალე სახურავი აკლდა. დავითის მიერ აგებულ ძეგლს მის სამშობლოს ძლიერებისა და აღყვავებისა, მხოლოდ მშვენიერებით შემკული გვირგვინი აკლდა და ეს აღასრულა და საბოლოოდ განაპრწყინა დავითის ღირსეულმა შთამომავალმან დიდებულ მეფემან თამარმან.

როგორც ნათქვამი გვქონდა, გიორგი მესამის გარდაცვალების შემდეგ, საქართველოს საზღვრები საკმაოდ გამაგრებული და უზრუნველყოფილი იყო. შირვანი და რანი ქართველთა ჯარის მიერ ხშირად დამარცხებული იმდენად დაუძლურდნენ და დაქვეითდნენ, რომ ქართველების მოხარკედ გახდნენ და ამ მხრით საქართველოს ტერიტორიას შიში არ მოელოდა. პირიქით საქართველოს სახელმწიფოებრივი ინტერესი მოითხოვდა ამ სუსტ საამიროთათვის მფარველობა გაეწიათ ქართველებს და მტრისაგან დაეცვათ. უკვე გიორგი მესამე დაეხმარა შირვან შახს და ლეკებისა და დარუბანდელთა შე-

მოსევისაგან დაიფარა. შემდეგ ქართველები რანის მფლობელსაც არა-ერთხელ დახმარებიან. ასე რომ აღმოსავლეთის საზღვრებმა თავის უწინდელი მნიშვნელობა დაკარგეს და ახლა მათი მნიშვნელობა მხოლოდ იმით განისაზღვრებოდა, რომ ამ მხრის სამხრეთიდან წამოსულ სპარსეთის სულტნებს და ამირებს შეეძლოთ საქართველოში შემოსევა. ამიტომ ეხლა საქმე მარტო საზღვრების დაცვაში კი არ იყო, არამედ იგინი საბოლოოდ უნდა უზრუნველყოთ სამხრეთ-აღმოსავლეთისაკენ შორს გალაშქრებით, ფართო აქტიური მოქმედებით.

სამხრეთ საზღვრების შუა ნაწილში მხოლოდ კარი და მისი მიდამოები ქართველთა ხელთ არ იყო და ამ ალაგას, მაშასადამე, საზღვარი ჯერ კიდევ ღია შთიებოდა. მართალია ქანისი გიორგიმ დაიბრუნა, მაგრამ მისი მიდამოები მოპირდაპირეს ეკუთვნოდა და ამ მხრით მტერს ყოველთვის შემოსევა შეეძლო. ოლთისის მიმართულებით ქართველებმა ბასიანსაც კი მიაღწიეს, მაგრამ აქ სამხრეთით დიდი და საკმაოდ ძლიერი საამიროები იყვნენ, როგორც არზრუმისა, რუმ-ჯურჩიანისა (ხოროსნისა) და ხლათისა. ამ საამიროთა შეერთებული ჯარი მაშინდელ დროში თითქმის ურიცხვს ძალას წარმოადგენდა და ამ ძლიერ ჯარს აგრედვე შეეძლო საზღვრების გარღვევა და საქართველოში შემოსევა.

მაშასადამე აქაც ქართველების მხრით საჭირო ხდებოდა საზღვრების აქტიუ-

რი დაცვა, კიდევ სამხრეთით გალა-
შქრება. ცხადია თავის მოქმედებაში
რა გეგმას უნდა დასდგომოდა გიორ-
გი III მემკვიდრე.

სამეფო ტახტზე აღვიდა ბრწყინვა-
ლე მეფე თამარი. ამ სახელის ირგვ-
ლივ ქართველის გული და აზრი, ქარ-
თველი ერი სამშობლოს გაერთიანე-
ბის, ძლევამოსილების და კულტურულ
გაბრწყინვალების ოქრო-მარგალიტე-
ბით გამოჰქედილ ძეწკვს ავლებს. თამა-
რის დროს საქართველოს სახელმწი-
ფოებრივმა და კულტურულმა განვი-
თარებამ იმ დროისათვის უმწვერვა-
ლესობამდე მიაღწია და თავისთავად
ცხადია, რომ მისი სამხედრო ძა-
ლაც და ძლიერებაც მაღალ სა-
ფეხურს მიაღწევდა. მაგრამ თუ
დავაკვირდებით თამარის მეფობის
ამ უკანასკნელ დარგს დავინახავთ,
რომ ეს შედეგი იყო მისი ბრწყინვალე
წინაპართა მოქმედებისა, ლოლიკური
დასკვნა მათი მოქმედებისა და ღვაწ-
ლისა. ყველა ეს გაგრძელება და აღ-
სრულება იყო დიდებულ დავით აღმა-
შენებლის დიდებულ გეგმისა. გამოც-
დილი და გაწვრთნილი ძლევა-მოსილი
ჯარი და თითქმის ყველა მოსაზღერე
სტრატეგიის მხრით დიდათ მნიშვნე-
ლოვან რაიონების დაპყრობა, მკვიდრი
საფუძველი და ძლიერი საშუალება
იყო მომავალი ბრწყინვალე ლაშქრო-
ბისა. თამარისავე წინაპრებმა გამოზარ-
დეს და გამოწრთენეს მთელი რიგი
სარდლებისა, რომელთაც კარგად და
ზედ-მიწევნით შესწავლილი და შეგნე-
ბული ჰქონდათ სამხედრო საქმე და

ის დიადი იდეა, რომელიც გენიოსმა დავითმა უანდერძა ქართველ მხედრობას. ხანგრძლივმა ომებმა და ბრძოლამ კარგად შეაგნებინა მათ სტრატეგიული მნიშვნელობა სხვა და სხვა მოსაზღვრე რაიონებისა და ჩვენ დავინახავთ, რომ თამარის სარდლებს ეს კარგად გათვალისწინებული ჰქონდათ და თავის მოქმედებას ყოველთვის ამაზე ამყარებდნენ.

მართალია, თამარის გამეფების უმაღლეს დიდგვარიან თავადთა და მაღალ მოხელეთა შორის სხვა და სხვა მიდრეკილებამ იჩინა თავი, მაგრამ იმდენად განმტკიცებული იყო თამარის წინაპართა მიერ შექმნილი წესწყობილება, რომ ბოლოს და ბოლოს თამარმა სძლია და გამარჯვება მაინც მას დარჩა. ჩვენ ამ პოლიტიკურ მოძრაობას არ შევყვებით. აღვნიშნავთ მხოლოდ, რომ დიდგვარიანთა ამხედრება და გაფიცვა გამოწვეული იყო გიორგი III მიერ მიღებულ ზომით. როგორც გვახსოვს, დემნას განდგომილობის შემდეგ გიორგი მოხელეობის სფეროშიაც იმ გზას დაადგა, რომელიც სამღვდელთა შესახებ ირჩია დავით აღმაშენებელმა. შთამომავლობას და გვაროვნობას პირადი ღირსება და დამსახურება დაუპირდაპირა. რა თქმა უნდა, იგი საქმის ინტერესით ხელმძღვანელობდა, მაგრამ მეორეს მხრით ეს საუკეთესო ზომა იყო დიდგვარიანთა ვადების საბოლოო დაუძლურებისათვის და იმ საშინელ სენის მოსასპობად, რომლის წყალობით საქართველოს ესოდენი უბედურება დასტეხია თავს.—

მაგრამ იმავე ზომამ გამოიწვია სახელმწიფო მმართველობის ასპარეზზე ახალი ელემენტი, დამსახურებული მოხელეობა, რომელიც მართალია, შთამომავლობით და გვაროვნობით ვერ მოიტანდა თავს, მაგრამ როგორც ახალი ელემენტი, სახელმწიფოს ახალ ცხოვრებასთან უფრო შეგუებული პირველხნობითვე დიდს და მნიშვნელოვან ძალად იქცეოდა. იმდენად გაძლიერდა უკვე თამარის მეფობის პირველ წლებში ეს ახალი ელემენტი, რომ შეთქმულობაც კი მოახდინეს და არსებულ სახელმწიფოებრივ წესწყობილების შეცვლაც კი მოიწადინეს. და თუ ბოლოს და ბოლოს წადილს ვერ მიაღწიეს, მხოლოდ იმიტომ, რომ შათსა და დედგარიან თავადთა შორის ინტერესების წინააღმდეგობა სუფევდა და მეფემ სწორედ ამით ისარგებლა და ორივე მოძრაობა დასაწყისშივე ჩააქრო. ეს ჩხოლოდ იმისი მაჩვენებელია, რომ მეფის უფლება ჯერ-ჯერობით იმდენად ძლიერი იყო და მეორეს მხრით, დედგაროვან თავადების წადილი უკვე ხალხის თანაგრძნობას ვერ მოიხვეჭდა. დავით აღმაშენებლის და მის მემკვიდრეების ძლევამოსილმა ლაშქრობამ სამეფოს დადი სიმდიდრე შესძინა ქვეყანა დაამშვიდა და შოაშენა, მტრის შემოსევა და რბევა-აოხრება თითქმის დაავიწყდათ და ყველა ამას ხალხი, რა თქმა უნდა, დამყარებულ წეს-წყობილებას მიაწერდა და თვითმპყრობელი მეფის ავტორიტეტი დიდი იზნებოდა. სწორედ ამით აიხსნება, რომ მიუხედავად იმისა, რომ სამეფო ტახტ-

ზე ქალი აღვიდა და თვით სამეფოში მალალ წრეებში ორი ზედი-ზედ სხვა დასხვა გვარი მოძრაობა დაიწყო, ვერც ერთმა საჭირო ნიადაგი და საკმაო ძალა ვერ ჰპოვა და ორივე ძლეულ იქნა. თვით სამეფო ოჯახშიაც განხეთქილება მოხდა და განდევნილმა თამარის პირველმა ქმარმა აჯანყება მოაწყო, ბევრი დიდგვარიანი თავადები მიიმხრო, მაგრამ მაინც ვერას გახდა და დამარცხდა.

სწორედ ამითვე აიხსნება, რომ მიუხედავად ამ არეულობისა და აჯანყებისა, ქართველების ჯარმა მაინც არ დაჰკარგა ის თვისებანი და ღირსებანი, რომლითაც იგი შემკული იყო და სხვადასხვა პირთა ხელში დიდების მოპოების იარაღად არ გახდა.

როგორც ვიცით, თამარის პირველი ქმარი იყო რუსი გიორგი, რუსის მთავრის შვილი. ეს გიორგი პირველ ხნობით გამოცდილ და მამაც სარდლად გვეხატება. იგი ამარცხებს და უკუაქცევს თურქებს, რომელნიც არანიდან გელაქუნის ტბის ჩრდილოეთით წამოსულნი პალაკაციოს შეესივნენ. დაამარცხეს ქართველებმა აგრედვე თურქები, რომელნიც კარნუქალაქიდან შავშეთს შეესივნენ. როგორც ეტყობა, ეს ნხოლოდ კერძო ხასიათის ნაევარდობა იყო თურქთა მხრით. მაგრამ უკვე ამ ნაევარდობამ ქართველებს აჩვენა, რომ საზღვრები საკმაოდ უზრუნველყოფილნი არ არიან. ამიტომ ფართო გალაშქრება მოაწყეს და კარისაკენ გაემართნენ. აიღეს კარი, კარნიფორი და ბასიანს მიაღწიეს.

ანისის გასამაგრებლად მხარგძელებმა დვინისაკენ გაილაშქრეს, გაილაშქრეს გელაქუნისკენაც. ერთი სიტყვით ჯერ-ჯერობით ქართველი ჯარი მხოლოდ აქტიურად საზღვრებს იცავდა და მტერს საშუალებას უსპობდა შემოსევისათვის.

მაგრამ მალე საჰეთო დიდს განსაცდელში ჩაეარდა. თამარი პირველ ქმარს გაეყარა და რუსი გიორგი განდევნეს. რა თქმა უნდა, ექსორიად ქმნილი გიორგი ამ გვარ ბედს არ შეურიგდებოდა და 1190 წ. ბიზანტიიდან კარნუქალაქში მივიდა და აქ ქართველ დიდგვარიანთა მოხელეებს ამცნო თავისი სურვილი დაბრუნების შესახებ. რა თქმა უნდა ზოგიერთ თავადებისათვის ეს მეტად სასიამოვნო ამბავი იქნებოდა და მათ მხარი დაუჭირეს. პირველი მიემხრო კლარჯეთის და შავშეთის ერისთავი, მას მიჰყვნენ სამცხის და დასავლეთ საქართველოს მფლობელები. მუამბოხენი სამცხეში შეერთდნენ. მიუხედავად დიდი გამოცდილებისა გიორგის აქ დიდი შეცდომა მოუვიდა. მან ჯარი ორად გაჰყო. ერთი ნაწილი ნაქარმაგვეს და გორის მიდამოებში გადვიდა, მეორე კი ციხე ოძრხესთან. საკვირველია, რომ იმ გვარ პირობებში გიორგიმ ორად გაჰყო თავისი ჯარი და ნაწილ-ნაწილ დამარცხებას არ შეუშინდა. მისთვის მუამბოხეთა ჯარი არც იმდენად სანდო იყო და ამ ჯარის დიდი ნაწილის ხელიდან გაშვება ან დაუდევრობის შედეგია, ან და სხვა რაიმე მიზეზით მოხდა. უფრო საფიქრებელია, რომ დიდგვარიანი მე-

ამბიწენი ერთად ვერ მოთაქსდნენ და ცალ-ცალკე მოქმედება ირჩიეს. ნაქარმაგევისაკენ წასულმა ჯარმა მისვლის უმაღლესიანა ააოხრა და ძარცვაგლეჯა დაიწყო. ამით, რა თქმა უნდა, მცხოვრებთა სიმპატიას ვერ დაიმსახურებდა და გასაკვირველი არ არის, რომ შეამბოხებთა ამბავი, მათი ჯარის დანაწილება და მდგომარეობა სწრაფ თამარს აცნობეს. შეამბოხეთ უნდოდანთ ჯავახეთით და შემდეგ თრიალეთ-სომხეთით წამოსვლა, ალბად იმედი ჰქონდათ, რომ რანის მთავარსაც მიიმხრობდნენ. თამარმა თავის ერთგულთა შორის ჯარი მოაგროვა და თავის საუკეთესო სარდლებს უბრძანა გალაშქრება. რადგანაც მტრის გეგმა იცოდნენ, საკუთარი გეგმის აშენებაც ადვილი იყო. თამარის ჯარი შეერთებულის ძალით ჯერ შეამბოხებთა იმ ნაწილისაკენ გაეჰართა, რომელიც სამცხეში იმყოფებოდა. ჯავახეთში მეფის ჯარს მესხებიც მიემატნენ და ეს გაძლიერებული მხედრობა მტკვარს მიაღება. შეამბოხეთ უკან დაიხიეს, თამარის ჯარმა არ დააყოვნა, გადალახა მტკვარი, დაედევნა მტერს და თმოგვსა და ერუშეთის შუამედგრად ეკვეთა და საშინლად დაამარცხა. ამ ერთი დაკვრით შეამბოხებთა ბედი გადაწყვეტილი იყო. შეამბოხებთა მეორე ნაწილმა, რა წამს გაიგო თავისი ჯარის დამარცხება ერუშეთთან, დაიშალა და გაიქცა.

ამის შემდეგ ქართველების ჯარი განაგრძობდა კერძო ლაშქრობას და საზღვრების აქტიურ დაცვას. მაგრამ

ახლა ქართველ ჯარის მთავარსარდლად იყვნენ მეფე დაჟით სოსლანი და ზაქარია მხარგძელი. ეს გამოჩენილი სარდლები მარტო ამგვარი ლაშქრობით არ დაკმაყოფილდებოდნენ. მათ, როგორცა სჩანს, კარგად შეთვისებული ჰქონდათ მეფე დაჯთ აღმაშენებელის და გიორგი III გევმა. ქართველების ჯარი შორს განძის აღმოსავლეთისაკენ ილაშქრებს ბარდავში (ეველახის სამხრეთით). ილაშქრებენ აგრედვე კარნუ ქალაქისაკენ (არზრუმისაკენ). ცხარე ბრძოლაში თურქებს დაამარცხებენ და დიდის ნადავლით ბრუნდებიან. მიდიან ლაშქრობით გელაქუნის ტბის სამხრეთით, აქაც იმარჯვებენ და ბრუნდებიან. ეს შორს გალაშქრებანი არსებითად იგივე ნაწარლობა იყო მხოლოდ უფრო ფართოდ მოწყობილი და მოსაზრებული.

ადარბაგანის სულტანი ათაბაგი ყიზილ არსლანი მოკლდა და მისი სამფლობელო სამმა შეილმა გაიყო. შემდეგ მათში უთანხმოება მოხდა და ერთი მეორეს დაერია. ბოლოს და ბოლოს გაიმარჯვა აბუბაქარმა და შემდეგ ეს აბუბაქარი შირვანს შეესია. თამარმა თავის მოხარკე შირვანს მხარი დაუჭირა და გამოექომაგა, ალბად იმ მოსაზრებით, რომელიც ზემოდ იყო მოყვანილი. თამარმა დიდძალი ჯარი შეკრიბა, ასე რომ მემატიანეს სიტყვით „მათი სიმრავლითა აღიესნეს მტკურის პირი, ალგეთის პირი, (ქციის პირი და ქურდავაქრის პირი), ესე ოთხნივე მდინარენი ტფილისით ყარალაჯამდის“ მოფენილი იყვნენ

ქართველთა მხედრობით“. (ივ. ჯავახიშვილი. „ქართ. ერის ისტორია“, გვ. 603). „და ვითარცა წარემართნეს, მოგვითხრობს „ქართლის ცხოვრება“, და დაიბანაკეს წყალსაზედა ელკეცისასა, და მუნით აყრილნი მივიდეს ძაგამს (ძეგამი, ეხლანდელი რკინის გზის სადგური), სიახლესა შანქორისასა, თთვესსა იენისსა, დღესა ხუთშაბათსა..“ („ქართ. ცხოვრ. ზ. ქიქინაძის გამოცემა). იქვე მემატიაზე მოგვითხრობს, რომ მეფესთან მოვიდნენ „კაცნი წინამაჲალნი აეშაგთანი“ და უამბეს, რომ მათ საკუთარის თვალით ენახათ „ათასნი აუ-ასთანი და ბევრნი ბევრთანი, უმრავლესნი რიცხვისანი, ვითარცა მკალნი და ვითარცა ქვიშა ზღვისა, შანქორითგან ვიდრე მთად შოთისა და ვარდანაშტისა, განძის კარაძდი ვერ მისაწთომელ არიან თუალნი განცდად და გარდაწდომად“. დავით სოსლანს გაუკვირდა, რომ მტერმა განძის სიმაგრეებს თავი დაანება და უფრო ხელსაყრელი მის ჯარისათვის ბრძოლის ველი დასტოვა და წინ წამოვიდა და ვიწრო ადგილში დაიბანაკა. შანქორის ველი მეტად ვიწროა. ერთის მხრით მას მდინარე მტკვარი საზღვრავს და მეორეს მხრით მაღალი მთები. ამ ორ ზღუდეთა შუა მდებარე ვიწრო მინდორი მრავალ პატარა მდინარეებითაა გადაჭრილი. ცხადია, რომ ეს ბრძოლის ველი ათაბაგის მრავალ რიცხოვან ჯარისათვის გამოსაყენი არ იქნებოდა, იგი ვერ გაიშლებოდა და მთელს თავის ძალას ვერ მოიხმარდა და ვერ გამოიყენებდა. ჩვენ ვიცით რაგვარი

წყობილება იყო ქართველ ჯარში შემოღებული. დავით სოსლანმა სისწორით დაათვასა ბრძოლის პირის თვისება და მდგომარეობაც გამოარკვია.

„განაწყვეს რაზმი წესისა-ებრ, ვითარცა განჩენილ არს თემთა და თემთა, მიუწია წვერმან მარჯვენით რაზმისამან მთად, და მარცხენეთა—მან მტკვრად წარემართნეს, და მივიდეს შანქორისა სიახლესა, და გარდაეცვნეს ზედა, რეცა-თუ დარწმულსა მომახურთაგან. და განყო რაზმი მიახლებამან ქალაქისამან და მუნვე დაწყებამან ომისამან. და თვთ მეფე-მან რაზმითა თვისითა დააგდო მარჯვენით შანქორი და მოსწრაფე იყო განსვლად წყალსა შანქორისა საკერძოსა.... შეიქმნა ომი და კვეთება, არა-თუ სრულობით წარმოღვრითა რაზმისათა, გარნა წინა—მსრბოლთაგან“ („ქართ. ცხოვრება“) ცხადია აქ დავით აღმაშენებელისებურ წყობილებასთან და მის ტაქტიკასთან გვაქს საქმე. დავით სოსლანს ჯარი ისე გაუშლია, რომ მარცხენა წვერი მტკვრისათვის და მარჯვენა—მთებისათვის მიუბჯენია, ასე რომ მის ჯარს მთელი მინდორი გადაუკეტია და ამ ვიწრო კარიდორით წამოსულა. თურქების მრავალ რიცხოვნობა ამ შემთხვევაში თავის უპირატესობას ვერ გამოიყენებდა და ქართველების ჯარის წვერებს ვერ შემოუვლიდა. მაგრამ თვით ჯარის ბრძოლისათვის გაშლაშიაც დავით სოსლანს ადგილობრივი პირობები მხედველობაში მიუღია. იგი წესისამებრ წინა მებრძოლთ ჰგზავნის, რომელნიც პირველად უნდა ეკვეთნენ

მტერს და ბრძოლა დაიწყო. მეორე ნაწილი ზაქარია მხარგძელის სარდლობით მემარჯვენეთ -- მცემელთა რაზმს შეადგენდა იმ შემთხვევისათვის, თუ თურქები წინა მბრძოლის მარჯვენა წვერს დააპარცხებდნენ და შემოუვლიდნენ, მაშინ შესაძლებელი იქნებოდა წინა მბრძოლ რაზმის მტკვრის ნაპირისაკენ მიგდება და სწორედ ამ შემთხვევაში ზაქარია სპასალარი მტერს ზურგით დაეცემოდა. თითონ დავით სოსლანი მესამე რაზმით, რა თქმა უნდა, უფრო ძლიერით და ნაცადით, შანქორს მხარ მარჯვენით სტოვებს და მტკვრის ნაპირით მიდის, გადავა მდ. შანქორს და თურქების მარჯვენა წვერს შემოუვლის. როგორც მემატთანე მოგვითხრობს მეფის რაზმმა ცოტა შეიგვიანა, მისი წინსვლა შეფერხდა ადგილობრივ პირობების (მრავალი მდინარენი) ბალების და საბძლების წყალობით. ასე რომ წინაბრძოლი რაზმი დიდს გაჭირვებაში ჩავარდა. რა წამს დაინახა მხარგრძელმა ამ რაზმის გაჭირვება მედგრად ეკვეთა მტერს, მაგრამ მრავალ რიცხოვანი მტერი მაგრად იღგა და ვინ იცის რით დამთავრდებოდა ეს ბრძოლა, რომ სწორედ ამ დროს თურქებისათვის სრულიად მოულოდნელად გამოჩნდა და სწრაფ თავს დაესხა მეფის რაზმი. რადგანაც თურქები შანქორის წინ იბრძოდნენ, უნდა ვიფიქროთ, რომ მეფის რაზმი ზურგით მოექცა მათ და ასეთი მოულოდნელი შემოვლა თურქებს ყოველთვის თავზარსა სცემდა და ესლაც ასე მოხდა. „...რა ჟამს იხილეს

მეფე, დაეცა რისხვა ღვთისა მათზედა. აჰა მისლვასავე იოტნეს და გააქცივნეს, და დაართვნეს ისარნი მათნი სისხლითა. და ხრმალნი მათნი სკამდეს ხორცთა მტერთა მათთასა. და მიუწია მღევარ—მან ერთ-კერძომან განძილ ბალთამდინ და ერთ კერძომან მთად გელაქუნისა, და შეხვდეს მახვილი და ძალი ღვთისა მტერთა მათთა“. რადგანაც დამარცხებული თურქთა ჯარი ორ ნაწილად გაიყო და ერთი ნაწილი აღმოსავლეთისაკენ და მეორე კი სამხრეთისაკენ გაიქცნენ, ცხადია, რომ მეფის მოულოდნელმა შემოვლამ მტრის ჯარი სრულიად არიდარია. გამარჯვება იმდენად ბრწყინვალე იყო, რომ გარდა დიდძალი ნადავლისა და მრავალი ტყვეებისა, ქართველებს ხელში ჩაუვარდათ „დროშა ხალიფასაგან ლაზოდ წარმოგზავნილი“.

მეორე დღეს შანქორმა მეფეს კარი გაუღო და ქალაქი დანებდა, მაგრამ მეფემ გარდა ქალაქისა მისი მიდამოები და ციხენიც დაიპყრა. დაპყრობილი ქვეყანა კვლავ დაუბრუნა ამირმირანს, რანის კანონიერ მფლობელს და თვითონ განძისაკენ გაეპარათა. განძა უბრძოლველად დანებდა. ძლევამოსილი ქართველთა ჯარი შინ დაბრუნდა.

შანქორის ომს დიდი პოლიტიკური მნიშვნელობა ჰქონდა. დავით აღმაშენებლის და გიორგი III შემდეგ ეს პირველი დიდი ბრძოლა იყო, სადაც თურქების და სპარსელების შეერთებული მრავალ რიცხოვანი ჯარი სა-

შინლად დამარცხდა. დაეით სოსლან-მა აქ დიდი ნიქი და უნარი გამოიჩინა. თუ დავაკვირდებით მემატიანის მოთხრობას, უსათუოდ დავრწმუნდებით, რომ ამ გამარჯვებაში დიდი წილი უდევს ამარ სპასალარს ზაქარია მხარგრძელს. იგი თავის ინიციატივით, სწორედ მაშინ, როდესაც საქირო იყო ეკვეთა მტერს და მასთან ისე მოხერხებულად და ისე მკაცრად, რომ არამც თუ მისი შეტევა შეაჩერა, არამედ აიძულა მრავალ რიცხოვანი ჯარი მოგერიებაზე გადასულიყო და ამით დრო მოიგო და მეფეს საშუალება მისცა თავისი მანევრი შეესრულებინა. მეფე სოსლანმა თავისი მოქმედება გარემოებას შეუფარდა ღ თვით გარემოებაც სისწორით ასწონ-დასწონა და ზედ მიწევნით გამოიცნო. სრულიად სამართლიანად მან მტრის ჯარის მარჯვენა წვერს შემოუარა, რათა განძისაკენ გზა გადაეკრა და მტერი მთებში გადაეყარა. თუ კა თურქთა ჯარის მომეტებული ნაწილი განძაში შევარდებოდა და მის ზღუდეებს ამოეთარებოდა, ვინ იცის რა მიმართულებას მიიღებდა და რით გათავდებოდა ეს დიდი ბრძოლა. სოსლანმა გამარჯვებაც ბოლომდის გამოიყენა და მტერს შეუჩერებლივ სდია და გაანადგურა. უნდა ვაღიაროთ, რომ ამ დიდ ბრძოლაში ცხადათ სჩანს დავით აღმაშენებლის სკოლა. „ქართველთა გამარჯვებას შანქორთან ის მნიშვნელობა ჰქონდა, რომ საქართველოს ეგოდენ მკვიდრი სამხედრო ძლიერება გამოააშკარავა, რომელსაც მაჰმადიანთა შეერთებულ ლაშქრისათვის

ჯეროვანი პასუხის გაცემა შეეძლო. განსაკუთრებით სასახელო იყო ქართველებისათვის ხალიფას მიერ უძლეველობის ნიშნად (ლაზოდ) წარმოგზავნილ დროშის წართმევა. ამიტომაც იყო, რომ თამარ მეფემ ქართველთა ძლევა-მოსილების ეს ძვირფასი ნიშანი ხახულის დიდებულს ტაძარს შესწირა“. (ივ. ჯავახიშვილი, „ქართ. ერის ისტორია“. გვ. 608).

შანქორის დიდი ომი ქართველების ბრწყინვალე გამარჯვებით დამთავრდა. წესიერად და წინდახედულობით მოწყობილმა ოპერაციამ შესაფერი ნაყოფიც გამოიღო. (ამ დამარცხებამ ნათლად დაანახა თურქებს, რომ ბრძოლის ველზე პირდაპირ შებმაში ქართველებთან ვერას გააწყობდნენ. მეტად დიდი იყო განსხვავება მათი და ქართველების ჯართა შორის. მეორეს მხრით საქართველო იმდენად გაძლიერდა, იმდენი ზარალი მიაყენა თავის მეზობელ მაჰმადიანებს, იმდენად გაამაგრა და გაათართოვა სამზღვრები და ისეთი დიდმნიშვნელოვანი ადგილები დაიჭირა, რომ ახლა თვით მაჰმადიანთა საამიროთა საზღვრებს შიში მოელოდა და ამირ სულტნებს საკუთარი ტერიტორიის დაცვისათვის უნდა ეზრუნათ. ქართველების ესოდენი გაძლიერება ეხლა მარტო ადგილობრივ ხასიათის საკითხი არ იყო. ძლევამოსილი, მოშენებული და მოლონიერებული ქართველობა უკვე დიდ მაჰმადიანთა სამეფოთ ეზუქრებოდა. ქართველებისათვის გზა სპარსეთისაკენ და აგრედვე არზრუმის და რუმის სამეფო-

ე ბისაკენ გახსნილი იყო და მაშასადამე თვით ხალაფაც კარგად ჰკადნობდა, რაოდენ დიდი მნიშვნელობა ჰქონდა ქართველების ასეთს გაძლიერებას. ამიერიდან ჩვენ ვხედავთ, რომ მაჰმადიანთა ამირები მაშინაც-კი, როდესაც შეერთდებიან და დიდს ჯარს მოუყრიან თავს, მაინც პირდაპირ ვერა ჰბედავენ შორს საქართველოში შიკრას. ყოველთვის ირჩევენ ფარულად, მოულოდნელად შეიპარნენ, მოარბიონ რასაც მოასწრობენ და უკან ბრუნდებიან და თუ მაინც ქართველთა ჯარი მოასწრებს და დაეცემა, პირველ შეხლისთანავე მაჰმადიანთა ჯარი გარბის ბრძოლის ველიდან. უკვე ეს გარემოება დამამტკიცებელი იყო იმ სა, რამდენად ერთის მხრით გაძლიერდა ქართველთა ჯარი და მეორეს მხრით რამდენად დაუძლურდა და დაკნინდა მაჰმადიანთა ოდესლაც ძლევამოსილი, გამოცდილი და მამაცი ჯარი.

სწორედ ამიტომ ქართველთა სარდლებმა მოუხშირეს ლაშქრობას და ხან ერთს მხარეს ხან მეორე მხარეს შეესეოდნენ და თანდათან ახალ-ახალ ადგილებს ართმევდნენ მაჰმადიანებს.

შანქორის ომის შემდეგ აბუბაქარი ნახქევანისაკენ გაიქცა. იგი ვერ აპატიებდა რანის მფლობელს ამირ-მირანს საქართველოსთან დაკავშირებას. მაჰმადიანები ამირ-მირანს, რა თქმა უნდა, მოღალატედ სთვლიდნენ და ამიტომ აბუბაქარმა კაცები მოისყიდა და მათი დახმარებით ამირ-მირანი წუთისოფელს გამოასალმა. თავის მხრით ქართველები არ შეარჩენდნენ

ასეთ ვერაგობას აბუბაქრს და ამიტომ მისი დასჯა განიზრახეს. აღსანიშნავია ქართველების მის წინააღმდეგ გალაშქრება. რადგანაც თამარის ერთგული განძის მფლობელი ამირ-მირანი მოკლულ იყო და თუ მის ქვეშევრდომთა შორის აბუბაქრმა ჰპოვა ისეთი ადამიანები, რომელთაც მოაწყეს ღ ადასრულეს ეს მკვლელობა, ცხადია რომ განძაში და საზოგადოდ რანში ამირ-მირანის პოლიტიკის წინააღმდეგნიც ყოფილან. ეს ასედაც უნდა ყოფილიყო, განძელ მაჰმადიანთათვის რა თქმა უნდა აბუბაქარი უფრო მახლობელი და სასურველი ბატონი იყო, ვიდრე ქრისტიანი თამარი. ნუ დაგვავიწყდება, რომ რანი საქართველოს ხარკს აძლევდა და ეს რა თქმა უნდა მისდამი სიმპატიას არ გამოიწვევდა.

მაშასადამე თუ კი ქართველები აბუბაქარის წინააღმდეგ შორს სამხრეთით გაილაშქრებდნენ და განძას უყურადღებოდ დასტოვებდნენ, ამირ-მირანის სიკვდილის შემდეგ ეს განძა ვინ იცის როგორ მოიქცეოდა. ალბად ქართველებს ამის დიდი იქვი ჰქონდათ და ამიტომ აბუბაქარის წინააღმდეგი გალაშქრება მათ ორის გზით მოაწყეს. ერთი ნაწილი ჯარისა მეფე სოსლანის მეთაურობით განძისაკენ გაემართა და მეორე ნაწილი თამარ მეფეს გაჰყვა სამხრეთისაკენ. ქართველებმა დვინი აიღეს, აგრედვე განძა, სადაც დასაჯეს აბუბაქარის მოწირობები. ქართველთა ჯარი უკან დაბრუნდა და სამეფო სახლობა ლიხთიმერეთს გადავიდა ალბად დასასვენებლად. სწო-

რედ ამ დროს ბასიან-არტაანის გზით შემოესიენ თურქები საქართველოს, ააოხრეს არტაანი, ძალღის ხევი, პალაკაციოს ქვეყანა. მეტად მნიშვნელოვანი მიმართულებით წამოვიდნენ თურქები და საჭირო იყო მათი არამც თუ განდევნა, არამედ ისეთი ზომების მიღება, რომ საბოლოოდ ეს მნიშვნელოვანი მიმართულება დიდი შემოსევისაგან მაიც უზრუნველ ეყოთ.—თამარის სარდლები დიდს ოპერაციას აწყობენ და შორს გალაშქრებას აპირებენ. არზრუმის და ხოროსანის (რუმის) ამირების მოსაზღვრედ დასავლეთით ბიზანტიის ტერიტორია იყო, ტრაპეზუნთის ოლქი. ბიზანტია იმ დროს იმდენად დაუძლურდა, რომ ქართველებს თამამად შეეძლოთ მასთან შებრძოლება. თუ კი ტრაპეზუნთის მიდამოები, ისპირი და ქანეთი ან თვით თამარის ან და მის მოკავშირეს ხელთ იქნებოდა, ეს ცოტა არ იყვეს არზრუმის სულთანს სასაქართველოსაკენ გალაშქრებას გაუძნელებდა, რადგანაც მარჯვენა მხრით მას ყოველთვის საფრთხე მოელოდა. ქართველთა ჯარმა ჯერ პირდაპირ შემოსეულ მაჰმადიანების წინააღმდეგ გაილაშქრა, განდევნა იგი და სდია თვით ბასიანამდე და აღიღო ხახულ-ოშკი და ბანა. შემდეგ, როგორც მოგვითხრობს მემატეიანი, თამარ მეფე მეტად განარისხა ბერძენთა მეფემ, რომელმაც ბერებს თამარის მიერ ბოძებული ოქრო წაართვა და ამიტომ მის წინააღმდეგ გაილაშქრა. ქართველმა ჯარმა დაიპყრა ლაზიკა, ტრაპიზონი, ლიმანი, სამისონი, სინოპი, კერასუნდი,

კოტიორა, ამასტია, ერაკლია და „ყოველნი ადგილნი ფებლალიონისა და პონტოსანი. რა თქმა უნდა, ოქროს წართმევა მხოლოდ საბაბი იყო და ნამდვილად კი ეს გალაშქრება გამოიწვია დასავლეთ-სამხრეთის და სამხრეთის საზღვრების დაცვის სურვილმა. მართალია ტრაპეზუნოის მიდამოების და შავი ზღვის ნაპირების დაპყრობას საქართველოს სამეფო მსოფლიოს ასპარეზზე გამოჰყავდა, მთელი მცირე აზიის ბატონობას უმზადებდა, მაგრამ ბრძენ პოლიტიკოსს თამარს კარგად ესმოდა, რომ მისი სამეფო ჯერ არ იყო საკმაოდ მომზადებული და ძლიერი ამისთანა რთულ და დიდს მისიისათვის. ამიტომ იგი დაპყრობილ ქვეყანას არ შემოიერთებს და „მისცა ნათესავსა თვისსა ალექსის კომნიანოსსა ანდრონიკეს შვილსა, რომელი იყო მაშინ თვით წინაშე თამარისსა შემოხვეწილი“, ე. ი, გადასცა ეს ქვეყანა ბერძენთა მეფეთა საგვარეულოს წევრს, თავის ნათესავსა და ერთგულს კაცს. ამრიგად თამარმა ერთგვარი „ბუფერი“ შექმნა ბიზანტიის და საქართველოს შუა ერთის მხრით და მეორეს მხრით. საქართველოსა და მაკედონიანთა სამფლობელოს შორის.

დასავლეთის მხრით უზრუნველყოფილი ქართველების ჯარი კვლავ უზრუნდება სამხრეთის საზღვარს. იგი ილაშქრებს ხლათში და იქიდან მანაზკერტამდე მიულწევია. მაგრამ აქ ზოგიერთი ისტორიკოსების მოწმობით არზრუმისა და ხლათის სულტნების შეერთებულ ჯარს ქართველები უკუ-

უქცევია. ქართველ ისტორიკოსებს ამ დამარცხების შესახებ ცნობები არა აქვთ (ივ. ჯავახ. „ქართ. ერის ისტორია“) მაგრამ ადვილად შესაძლებელია, რომ ამ სიშორეთ წასული ქართველების ჯარი, უცნობ ადგილებში, დამარცხებულ იყოს. მაგრამ ალბად ეს დამარცხება არც იმდენად დიდი რამ იყო, რომ თითქმის იმავე წელს ქართველთა ჯარმა კარისკენ გაილაშქრა და კარი დაიპყრა. ქ. კარის მცველად თამარმა ახალციხელი ივანე დააყენა. ამ ივანემ თავისი ინიციატივით კარის მიდამოები დაიპყრა და საქართველოს შემოუერთა. ამ რიგად საქართველოს სამხრეთი საზღვარი საბოლოოდ ჩაიკეტა და უზრუნველყოფილ იქმნა. დიდებულ დავით აღმაშენებელის გეგმა ქართველმა ჯარმა სავსებით აღასრულა და დაამთავრა. მაგრამ სწორედ ეს გარემოება მომავალში იმდენად საშიში იყო მაჰმადიანთა სამფლობელოთათვის, რომ მათ ერთხელ კიდევ სცადეს შეერთებული ძალით უკან დაებრუნებინათ ის, რაც თამარის ლაშქრობამ წაართვა. მოთავედ და ინიციატორად რუმის სულტანი გამოვიდა. კარის და ბასიანის მიმართულებანი სწორედ მისთვის იყვნენ საშიშნი. ამ მიმართულებებით მიდიოდნენ უახლოესი გზები ხოროსნიდან საქართველოში და სწორედ ამ მიმართულებებით იყო მოსალოდნელი ქართველების შემოსევა. რუმის სულტანმა რუქნადინმა მოუწოდა მეზობელ ამირებს და მრავალ რიცხოვან ჯარს მოუყარა თავი. მემატიანეს სიტყვით

მან 400000 შეაგროვა. ამის ნახევარიც რომ ვიგულისხმობთ, მაინც რუქნადინს იმ დროისათვის მიკრად დიდძალი ჯარი შეუგროვებია. ყოველ შემთხვევაში იგი ქართველების ჯარს ბევრით აღემატებოდა. როგორც ვიცით რუქნადინმა თამარს წერილი „სიბრიყვითა და თავხედობით აღსაფსე“ წარუგზავნა და დამორჩილებას სთხოვდა.

ქართველების ჯარი ჯავახეთში შეიყარა, რადგანაც აქედან უფრო მოსალოდნელი იყო მტრის შემოსევა. ამავე დროს რუქნადინის ჯარი ბასიანში და ბოლოსტიკთან დაბანაკდა. დავით სოსლანს კარგად ესმოდა, რომ ქართველთა შედარებით მცირე რიცხოვანი ჯარი პირდაპირ და ახდლად რუქნადინის ჯარს ვერ შეეებებოდა და მხოლოდ მოულოდნელი თავ დასხმით თუ სძლევდა მტერს. იგი მზვერავეებს გზავნის მტრის ბანაკის დასათვალიერებლად. მზვერავენი ამბავს მოუტანენ, რომ მართლაც აურაცხელი ჯარი ჰყავს რუქნადინს, მაგრამ ბანაკის დასაცავად და სადარაჯოთ არაერთარი ზომები არა აქვთ მიღებული, ამიტომ ფარულად და მოულოდნელად თავს დასხნა შესაძლებელი ხდებოდა. დავითმა აღარ დააყოვნა და მტრისკენ წამოვიდა. წინამბრძოლის მეთაურად ზაქარია მხარგძელი იყო. მას მოსდევდნენ მარჯვნივ და მარცხნივ, წესისამებრ ერთის მხრით „აფხაზნი და იმერნი“ და მეორეს მხრით ჰერ-კახნი. ჯარი მოულოდნელად მიაწყდა და ეკვეთა

მტრის ბანაკს და „იქინა ომი ფიცხელი და ძლიერი, და განგრძელდა მყოვარ ჟამ. და მოსწყდეს ორგნითვე ურიცხვნი, ხოლო უმეტეს სულტნისა სპანი მოისრვოდეს, და ეს-ოდენ განგრძელდა ომი, რომელ ცხენი მოუკლეს ივანეს მსახურთ-უხუცესსა, ზაქარიას, გრიგოლს და ახალციხელთა შალვას და ივანეს, და სხვათა მრავალთა თავადთა, და კნინლა სივლტოლად მიდრკეს ქართველნი, და ქვეითად დარჩეს რაზმსა შინა მხნენი-იგი ქართველნი. მაშინ ვითარცა იხილნეს ლაშქართა თვისთვისნი პატრონნი ქვეითნი, გაწირნეს თავნი სიკუდილად, ჩამოჰხდეს ცხენისა-გან და პატრონთა მათთა გვერდსა დაუდგეს, ქვეითნი ქვეითთა. და ეგრეთ ძლიერი ომი შეიქმნა, და ვითარ იხილა დავით მხნემან, მორიდა ერთკერძო, და მარჯვენასა მხარსა მოჰრიდა ზაქარია მხარ-გრძელმან, დავითარ ქართუპლთა განეშორნეს, რათა არა ცხენთა მათთა-გან დაითრგუნენ ქვეითნი ქართველნი, და მიმართნეს სპარსთა კერძო. მსწრაფლ მიეტევნეს ერთ-კერძო სოსლან-დავით, და ერთკერძო ზაქარია, ვითარ მგელნი ცხოვართა, ეგრეთ შეუტევდეს ურიცხუთამათ სპათა სულტანისათა. და... ანაზ-დად ეგე-ოდენი-იგი სიმრავლე განსქდა, იძლია და დაიფანტა“. („ქართ. ცხოვრება“, ზაქ. ქიქ. გამოცემა, გვ. 468—469).

ბოდბის ვიხდით ამ გრძელ ამონაწერის გამო, მაგრამ ეს ამონაწერი საუცხოვო ნიმუშია სამხედრო მწერ-

ლობისა. რამდენიმე სტრიქონში მშვენივრად, გარკვეულად და საესებით დასურათებულია ფართე და შესანიშნავი ბრძოლა. ცხადია ჩვენთვის ეს სურათი. ზაქარია მხარ-გრძელი წინამბრძოლთა მეთაური საშინელის სიმკაცრით მოულოდნელად ეკვეთა მრავალ-რიცხოვან მტერს და „ფიცხელი ომი“ შეიქმნა. როგორც ეტყობა მტერს მაინც მოუსწვრია და შეკბმია წინამბრძოლთ. რა თქმა უნდა მტერი იმდენად სქარბობდა რიცხვით, რომ წინამბრძოლთ საქმე მეტად გაუჭირდებოდათ და როგორცა სჩანს მემარცხნეთ მიმსვლელ-მცემელთა ოდ აგრედვე მემარჯვენეთ მიმსვლელ-მცემელთა დახმარებაც საკმაო არა ყოფილა და ქართველები „კნინლა სივლტოლად მიდრკეს“-ო. იმდენად მკაცრი ბრძოლა ყოფილა, რომ თითქმის ყველა თავადებისათვის ცხენები დაუხოცნიათ და მაშინ ჯარის კაცებიც ჩამოწხტარან და ქვეითნი შეკბმიან მტერს. რა თქმა უნდა, მიუხედავად დიდი მამაცობისა და თავგანწირულებისა, ეს გარემოება არა ხელსაყრელი იქნებოდა ქართველ ჯარისათვის. როგორც მოგვითხრობს მემატთანე ქართველებს ცხენები მოუშორებიათ და შემდეგ ამისა, როდესაც ბრძოლამ უკიდურესობამდე მიაღწია, დავით სოსლანმა ცხენოსანი ჯარი ორად გაჰყო და ორის მხრით დავითი მარცხნით და ზაქარია მარჯვენით ცხენოსანი რაზმებით საშინელის სიმკაცრით ეკვეთნენ მტერს და ამ კვეთებამ მტრის ჯარი სრულიად არივ-დარია, რასაც თან და-

მარცხება და გაქცევა მოჰყვა. საუბედუროდ აქ კოტა რამ გამოურკვეველია. თუ ცხენების დატოვება და განზე გაყვანა სწორედ ბრძოლის დროს მოახდინეს, ეს საქმის მოწესრიგების და გაადვილების მაგიერ, უსათუოდ უფრო არეულობას და შეშლას გამოიწვევდა, რითაც მტერი უსათუოდ ისარგებლებდა. უფრო სინამდვილესთან ახლო იქმნება ვიფიქროთ, რომ თვით დავითს თავის განკარგულებაში ჰყავდა ცხენოსანი ჯარი, რომელიც რეზერვის როლს ასრულებდა. ეს მაშინდელ საბრძოლველ წყობილებას უფრო ეგუება და გარდა ამისა აღწერილობიდან სჩანს, რომ დავითს პირველ შეხლაში მონაწილეობა არ მიუღია. იგი უცდიდა ბრძოლის კრიზისის მომწიფებას, იგი ინახავდა რეზერვს. როგორც ეტყობა ზაქარიაც მოწინავე რაზმში არა ყოფილა და მხოლოდ შემდგომ მოუგროვებია ცხენოსანი მეომარნი, მოუვლია მტრის მარცხენა წვერისათვის და ამავე დროს დავითს რეზერვით, რომელსაც აგრედვე ცხენოსანი ჯარი შეადგენდა, მტრის მარჯვენა წვერისათვის შემოუვლია და დასცემია. და ეს ორ მხრივი თავდასხმა სწორედ მაშინ მომხდარა, როდესაც გათამამებული მტერი გართული იყო „ფიცხელ ომში“ და მისი „შემბმელნი კნინლა სივლტოლად მიდრკეს“. მომენტი მეტად კარგად იყო არჩეული და შესაფერი ნაყოფიც მოიტანა.

ამ ბრძოლაში აღსანიშნავია მიზანშეწონილი მოხმარება რეზერვისა. მთავარ სარდლის თვალი დიდის სისწო-

რით სკვრეტს ბრძოლის მიმდინარეობას და სწორედ საჭირო დროს შესაფერისად დაჰკრავს მტერს.

ეს დიდი ბრძოლა კიდევ ერთხელ გვაჩვენებს რამდენად განვითარებული იყო მაშინდელი ქართველების სამხედრო ხელოვნება.

ქართველი სარდალი კარგად იცნობს თავის მტერს, მის თვისებას და ჩვეულებას. იგი წინასწარ მზვერავებსა გზავნის ჯარის დასათვალთვრებლად და უტყუარ ცნობათა შეგროვის შემდეგ თავის მოქმედების გეგმას შეადგენს. რა წამს გეგმა შეუშავებულა, დაუყოვნებლივ მის აღსრულებას იწყებს. მიუხედავად მოულოდნელად თავდასხმისა, მტრის უმრავლესობისა და საკუთარი ჯარის სიმცირისა, იგი მაინც ჯარის ნაწილს რეზერვად იტოვებს და სწორედ ეს საშუალებას აძლევს ბრძოლის კრიზისი თავისკენ გადმოხაროს. დიდის სიმტკიცით და დინჯად უთვალთვალეებს იგი ბრძოლას და მხოლოდ მაშინ, როდესაც საბოლოოდ გამოირკვევა ბრძოლის ვითარება, მხოლოდ მაშინ მიუსევს მტერს შენახულ რეზერვს. ხასიათის დიდი სიმტკიცეა ამისათვის საჭირო და ძლიერი ნებისყოფა, რომ სარდალმა თავი დაიქიროს და თავისივე რაზმის უკიდურეს გაჭირვებამ უდროოდ ხელიდან რეზერვი არ გამოსტაცოს. ამ ბრძოლაშიაც იჩენს თავს ამირსპასალარის მხრით ინციატივის უნარი. ჩვენ უკვე ვიცით, რომ შესანიშნავ სარდალს ზაქარია მხარგრძელს არაერთხელ გამოუჩენია ასეთი უნარი. აღსანიშნავია

აგრედვე, რომ ქართველ სარდლებს კარგად ესმით ცხენოსან ჯარის თვისებანი და მნიშვნელობა.. მათ ხელში ცხენოსანი ჯარი განსაკუთრებულ და დამოუკიდებელ მოვალეობას კისრულობს და ბრწყინვალედ ასრულებს.

რუქნადინის დამარცხება პირდაპირ აპოთეოზი იყო თამარის ლაშქრობისა. მაჰმადიანთა შეერთებული მრავალრიცხოვანი ჯარი მეორედ საშინლად დამარცხდა.

„ყველასათვის ცხადი გახდა, რომ კავკასიის სამხრეთის სამზღვარზე საქართველოს სახელმწიფოს არც აღმოსავლეთით, არც დასავლეთით საშიშარი მეტოქე აღარა ჰყავდა. რუქნადინის დამარცხების შემდგომ, ვალე მიიცვალა მეფე დავით სოსლანიც, „კაცი აღსავსე ყოვლითა კეთილითა საღმრთოთა და საკაცობოთა, შესახედავად განშვენებული, ხოლო წყობათა და ომთა შინა მხნე... უხვი და მდაბალი და სხვითა ყოვლითა სიკეთეთი აღმატებული“. (ი. ჯავახიშვილი, ქართ. ერის ისტორია“. გვ, 617—618).

რუქნადინის დამარცხების შემდგომ საქართველოს ძლევა-მოსილებამ მაღალ საფეხურამდე მიაღწია. როგორც ნათქვამი იყო, მოსაზღვრე სულტნები და ამირები ეხლა მხოლოდ ფარულად შემოპარვას ჰბედავდნენ. სწორედ შემთხვევით ისარგებლა არდაბილის სულტანმა. როდესაც თამარი თავის სარდლებითურთ გეგუთს იმყოფებოდა, სულტანი ფარულად შემოვიდა და მიაღვა ანისს. ანისამდე არც ერთი ქალაქი ან სოფელი არ აუოხრებია,

რათა დაეფარა თავისი შემოსევა. ანისში მან საშინელი ხოცვა-ჟლეტა მოახდინა და შემდეგ თავისას დაბრუნდა.

რა წამს გაიგო თამარმა ანისის აოხრება-აწიოკება, უმაღ წარგზავნა თავის ჯარი არდაბილის სულტნის დასასჯელად. ქართველებმა მეტად ხერხიანად მოაწყეს ეს გალაშქრება. ჯარი ნაწილ-ნაწილად წავიდა ფარულად ანისში და მხოლოდ მაშინ როდესაც მოახლოვდა მაჰმადიანთა დღესასწაული, „საჩქაროდ წარემართნეს არდაველს, გარდაველს გელაქუნი და ჩავლეს ისპიანი, გავიდეს ხუაფრიდის ხიდსა და მიმართეს არდაველს“ და აქ ანისის ჯავრი იყარეს. თვით სულტანი მოჰკლეს და დიდი ნადავლით და მრავალი ტყვეებით დაბრუნდნენ შინ.

„სპარსეთში ლაშქრობამ ამირსპასალარს ზაქარიას, მსახურთ-უხუცესს ივანეს და სხვა სარდლებს სპარსეთის ნამდვილი ვითარება დაანახვა, მისი უძლურება და დაქსაქსულობა. ამიტომ „მოვიდეს მხარგრძელნი ამირსპასალარი ზაქარია და მსახურთ-უხუცესი ივანე და ვარამ გაგელი მეფეს წინაშე“ და სპარსეთში თავრიზს და ხოროსანს გალაშქრება ურჩიეს. „თამარ მეფემ ვაზირების მოხსენება და მეტად გაბედული წინადადება უმაღლეს სახელმწიფო დაწესებულებას გადასცა განსახილველად... ბჭობის შემდგომ „სთნა ყოველთა თქმული მათი და დაასკუნეს ლაშქრობა“ (ი. ჯავახ. „ქართ. ერის ისტ.“ გვ. 624). ქართველთა ჯარი ნახჭევანის მიმართულებით წავიდა,

გადვიდა ჯულფას და აღვიდა მარანდს. ეს შორი გალაშქრება სტრატეგიის თვალსაზრისით მხოლოდ იმითაა საყურადღებო, რომ შესანიშნავად მოწყობილი იყო ჯარის მსვლელობა. ჯარს ყოველთვის წინმავალი რაზმი მიუძღოდა, რომელსაც „ამბის უცნობლად“ მტერთან შეებმა აკრძალული ჰქონდა. მისი მოვალეობა მხოლოდ გზის გაკვლევა, მტრის დაზვერა და მოულოდნელ თავდასხმის თავიდან აცილება იყო. ამიტომ, როდესაც ეს წინმავალი რაზმი მარანდელებს გამოეკიდა, დაედევნა და გამარჯვებული დაბრუნდა, „თუმცა ყველანი გახარებულები იყვნენ, რომ წინაშეობრივი გამარჯვებულნი და უვნებლად ნახეს, მაგრამ ამირ სპასალარი წინამებრძოლთა რაზმის მხედართ-მთავარს თაყაიდინს „აბრალობდეს“, მკაცრად ამხილებდა და უჯავრდებოდა „ამბის უცნობელად შებმისათვის“. (ივ. ჯავახიშვილი „ქართ. ერის ისტორია“, გვ. 626). როგორც ხედავთ, ქართველ ჯარშიაც იმ დროს დისციპლინა საკმაოდ დაცული იყო. ინიციატივა ინიციატივად, მაგრამ თუ კი ეს ინიციატივა რაზმის პირდაპირ დანიშნულებას ეწინააღმდეგებოდა და შესაძლო იყო მთავარი ჯარის ხითათში ჩაგდება, რა თქმა უნდა, დაგმობილ უნდა ყოფილიყო. ქართველთა ჯარმა აიღო თავრიზი, ყაზვინი, მერმე დასავლეთისაკენ მიბრუნდა, მივიდა თვით ხოროსნამდე და დიდის ნადავლით დაბრუნდა შინისკენ.

ამ დიდ გალაშქრებით დამთავრდა საქართველოს საზღვრების აქტიური დაცვა და გამაგრება. ეხლა კი საქართველოს სამხრეთით საშიში მეტოქე აღარაეინა ჰყავდა. ყოველ მხრით საზღვრები დაცული იყო და გაძლიერებული და გამაგრებული საქართველო მთელს მცირე აზიაში უძლიერეს სახელმწიფოს წა'მოადგენდა. და თუ ჩვენ გაეხსენებთ, რომ ყველა ეს ერთი გეგმის მეთოდური და სისტემატიური აღსრულების ნაყოფი იყო, კვლავ წარმოგვევლინება გენიოს სარდლის დიდებულ დავით აღმაშენებელის უაღრესი ნიჭი და შორსმჭვრეტელობა. ფართოდ მოფიქრებული, მიზანშეწონილი გეგმა მთელმა რიგმა სახელოვან სარდლები-სამ ბოლომდის მიიყვანა და დიდებულ წინაპრის მიერ ნაანდერძევი ძეგლი ბრწყინვალედ დააგვირგვინა.

თამარ მეფეა გამომხატველი და სიმბოლო ამ ბრწყინვალე დაგვირგვინებისა და რა გასაკვირველია, რომ „რამეთუ სახელთა ზედა აკროსტიხურად, თამარის შესხმათა დასწერდეს ბექედთა ზედა, და დანათა და არგანთა შეამკობდეს, და ზედა თამარის ქებათა დასწერდეს. და ყოველთა პირნი ერთბამად მზა იყუნეს, რათა ღირსი რამე თამარის საქებულობისა სიტყვა აღმოთქვან: ყრმანი მემროწელნი, განკებასა შინა ორნატთასა, თამარის ქებათა მელექსეობდიან... ხოლო საქმეთა მისთა-თვს რადლა საკმარ არს თქმად, რამეთუ კიდით-კიდემდე განისმეს, ვითარცა თვთ მოწამე არს ყო-

ველი ჩვენ მიერ ხილულმა სიტყვისა-
 ებრ ბრძნისა“. (ჩქ. ც-ბა“, კიკ. გა-
 მოც.) ასე გვიხატავს თამარის და ააწლს
 მემატთანე და მგონი მეტიც ვერ
 ითქმის.

